

ang
REPORTORMASYONG
pamantalaan

Vol. 66, No.4

**PAG-ADTO SA
TIBUOK KALIBUTAN**

SEMANA SA PAG-AMPO | DECEMBRE 5-14, 2025

NIINI NGA BALASAHON

Editorial	3
Sila Nagahulat Kanato	

Ang Atong Hataas nga Pagkatinawag	
Kita gisultihan sa pag-abante, uban sa Labing Gamhanan nga naggiya sa dalan sa atong kiliran	4

Diha sa Atong Panimalay	
Ang gugma nga nagadan-ag gikan sa mainit nga panag-uban diha sa panimalay mahimong molungtad sa walay katapusan	8

“Hatagi Ninyo Sila ug Makaon”	
Bisan kung ang mga butang ingon nga imposible, ang malalangan nga gahum sa Makagagahum anaa	12

Ngadto sa Mga Dagko ug Gagmay nga Mga Kadalanan	
Usa ka pribilehiyo nga mangalagad sa mga tawo sa tanang kultura, mga klase, ug mga komunidad!	16

“Ang Imong Pagtuo Maoy Nakaayo Kanimo”	
Bisan kinsa nga indibiduwal nga adunay bisan unsang sakit giawhag sa paghangyo pinaagi sa pagtuo ngadto sa Dakong Mananambal	21

Gipanganak ug Gitudloan sa Pagpangalagad	
Usa kita ka mapasalamaton sa pagkat-on ug pag-ugmad sa mga batasan sa pagserbisyo sa sayo nga kinabuhì!	25

Paghimog Mga Tinon-an	
Mga ginikanan ug mga magtutudlo adunay sagrado nga katungdanan sa pagpahat sa tinuod nga edukasyon uban ang walay katapusang mga tumong	28

Padayon sa Paglakaw Karon!	
Usa ka balaknon nga hangyo sa pagpalagsik ug pagpalapad sa atong natad sa pag-alagad	32

PAGPANGANDAM SA PAG-ADTO

Usa na usab ka tuig ang milabay.
... Unsa ka mapasalamaton kita nga
nagpuyo gihapon sa yuta sa mga buhi!
Ang Dios sa madagayon mihatag kanato
ug dugang pa nga panahon; managmaya
ug managlipay kita niini. Ang katapusan
sa tuig nga Semana sa Pag-ampo
kanunay naghatag ug mabungahon nga
kahigayonan sa pagsusi sa atong mga
kasingkasing ug pagpaduol sa mga isigka
magtutuo nga nagmanggad usab sa atong
bililhong pagtuo sa haduol nga pag-abot
ni Jesus.

Karong tuiga, ang atong tagaan
ug pagtagad mao ang usa ka
mapinadayonan, makapalagsik nga
misyon—nianang pagpakaylap sa
presente nga kamatuoran sa tibuk
kalibutan. Sa madali nga kini nga misyon
gihimo, mas maayo alang sa tanan!

“Ang atong Heneral, kinsa wala
makahimo ug sayop, nag-ingon kanato,
Abante. Sulod sa bag-ong teritoryo.
Ipataas ang sumbanan, pagtukod ug mga
handumanan sa matag dapit. Ipahibalo
nga ang Dios adunay katawhan dinhi
sa yuta nga wala makalimot nga Siya
adunay balaod, nga nagbugkos sa tanang
tawhanong mga binuhat.”¹

Samtang kita sa kamainampoon
magpadayon niini nga mga balasahon
diha sa tema, Pag-adto ngadto sa Tibuk
Kalibutan, uban ang tumong sa aktibong
pagtuman niining mahinungdanon
nga bulohaton, ang atong kalipay
modagayday sa dakong sukd.

Atong siguraduhon ang pagpahat
sa talagsaong panalangin niini nga mga
balasahon ngadto sa uban kinsa nag-
inusara o anaa sa balay, ug dugang sa
paghinumdom sa mosunod nga mga
petsa:

Pag-ampo uban ang pagpuasa: Sabado, Decembre 13
Halad alang sa mga misyon: Domingo, Decembre 14

Kini mao ang atong pag-ampo nga
kining Semana sa Pag-ampo mahimong
modasig sa matag usa kanato sa pag-
adto sa matinud-anon nga pagbuhat
ingon nga mga instrumento sa kahayag,
nga mosidlak sa kangitngit sa kalibutan.
Amen.

¹ *The Australasian Union Conference Record*,
January 1, 1900.

Opisyal nga Pinatik sa Iglesia
Seventh Day Adventist Reform Movement

*Ang pinakadako nga panginahanglan sa kalibutan mao ang panginahanglan sa
mga tawo – mga tawo kinsa dili mapalit o dili mabaligya. —Education, p. 57.

Editor B. Montrose
Layout and Design D. Conceição

Web: <http://www.sdarm.org>; E-mail: info@sdarm.org

ANG REPORMASYONG PAMANTALAN® (ISSN 0482-0843) mga
gipadayag nga mga butang diha sa doktrina sa Biblia nga mopalambo sa
spirituhanong kinabuhì niadtong kinsa nangita sa dugang nga pagkahibalo
mahitungod sa Dios. Kini gipatik kaduha sa usa ka bulan pinaagi sa Seventh
Day Adventist Reform Movement General Conference, P. O. Box 7240,
Roanoke, VA 24019-0240, U.S.A.

Gipatik ug giapud-apud pinaagi sa Reformation Herald Publishing
Association. Mga manuskrito, mga pangutana, mga kausaban sa adres, mga
suskrisyon, mga bayad, ug mga donasyon kinahanglan ipadala sa adres nga
anaa sa ubos. Ang periodikal nga selyo gibayran sa Roanoke, Virginia 24022.

Subscription rates:

United States: \$18.00; Foreign countries: \$16.00 plus shipping;
Single issue: \$4.00 plus shipping
<https://subscriptions.reformationherald.com>

POSTMASTER: Send address changes to The Reformation Herald,
P. O. Box 7240, ROANOKE, VA 24019.

Vol. 66, No. 4; Copyright © 2025 October–December issue.

Illustrations: Adobe Stock on the front cover; Freepik on pp. 3, 6, 8, 11, 12,
17, 19, 20, 23, 28, 31; Midjourney on pp. 4, 16, 21, 25, 32.

SILA NAGAHULAT KANATO...

Kadaghanan kanato sinati sa kasinatian ni Felipe sa dihang gitawag siya nga makigsulti sa usa ka inpluwensyado nga tawo gikan sa Etiopia.

“Ang manulonda sa Ginoo nagsulti kang Felipe, nga nagaingon, Tumindog ka, ug umadto ka sa habagatan sa dalan nga lugsongon gikan sa Jerusalem padulong sa Gaza, nga kamingawan. Ug siya mitindog ug miadto: ug, ania karon, ang usa ka Etiopiahanon, eunuco nga gamhanan ilalum ni Candace, ang reina sa mga Etiopiahanon, kansang mga bahandi siya ang tinugyanan, nga mi-adto sa Jerusalem aron sa pagsimba, sa nagapauli na siya, ug nagalingkod sa iyang karwahe nga nagbasa sa Isaias nga manalagna. Unya ang Espiritu mi-ingon kang Felipe, Dumuol ka, ug umadto ka niana nga karwahe. Ug si Felipe midalagan ngadto kaniya, ug hindunggan kini nga nagabasa kang Isaias nga manalagna, ug miingon: Nakasabut ka ba sa imong ginabasa? Ug nag-ingon siya, Unsaon ko paghimo kong walay usa nga magtudlo kanako? Ug gihangyo niya si Felipe aron nga mosakay ug molingkod sa uban kaniya. . . . Unya gibuka ni Felipe ang iyang ba-ba, ug misugod sa mao nga kasulatan, ug nagwali ngadto kaniya mahitungod kang Jesus” (Buhat 8:26–31, 35).

Kini dili lamang usa ka storya, apan usa ka tinuod nga makasaysayan nga panghitabo. Kanunay ba natong gitagaan ug pagtagad kung unsa kini ka hinungdanon sa matag usa kanato karon?

“Kining Etiopiahanon nagrepresentar sa usa ka dako nga hut-ong nga kinahanglang tudloan sa maong mga misyonaryo sama kang Felipe — mga tawo nga makadungog sa tingog sa Dios ug moadto diin Siya magpadala kanila. Adunay daghan nga nagbasa sa Kasulatan nga wala makas-abut sa ilang tinuod nga kahulogan. **Sa tibuok kalibutan ang mga lalaki ug mga babaye nag-tan-aw sa langit. Ang mga pag-ampo ug mga luha ug mga pangutana gikan sa mga kalag nga nangandoy alang sa kahayag, alang sa grasya, alang sa Balaang Espiritu. Daghan ang anaa sa ngilit sa gingharian, naghulat lamang nga tigumon.**

“Usa ka manulonda migiya kang Felipe ngadto sa usa nga nangita sa kahayag ug kinsa andam sa pagdawat sa ebanghelyo, ug karon ang mga manulonda mogiya sa mga tunob niadtong mga magbubuhat nga motugot sa Balaang Espiritu sa pagbalaan sa ilang mga dila ug pagputli ug pagtuboy sa ilang mga kasingkasing. Ang manulonda nga gipadala ngadto kang Felipe makahimo sa pagbuhat sa iyang kaugalingon alang sa Etiopiahanon, apan kini dili maoy paagi sa Dios sa pagbuhat. Kini maoy Iyang plano nga ang mga tawo mobuhat alang sa ilang isigkatawo.

“Sa pagsalig nga gihatag ngadto sa unang mga tinon-an, mga magtutuo sa matag kapanahonan mipahat. Ang matag usa nga nakadawat sa ebanghelyo gihatagan ug sagrado nga kamatuoran aron ipaambit ngadto sa kalibutan. Ang matindog-anon nga mga tawo sa Dios kanunay nga agresibo nga mga misyonaryo, nagpahinungod sa ilang mga kapanguhaan alang sa kadunggan sa Iyang ngalan ug maalamon nga naggamit sa ilang mga talento diha sa pag-alagad kaniya.

“Ang dili hinakog nga paghago sa mga Cristohanon kaniadto kinahanglan nga usa ka leksyon ug usa ka inspirasyon alang kanato. Ang mga membro sa iglesia sa Dios kinahanglan nga magma-kugihon sa maayong mga buhat, nga magbulag gikan sa kalibutanon nga ambisyon ug mag-lakaw sa mga tunob Niya nga naglakaw sa pagbuhat ug maayo. Uban sa mga kasingkasing nga napuno sa simpatiya ug kalooy, sila magaalagad niadtong nanginahanglan sa tabang, nga magadala ngadto sa mga makasala ug kahibalo sa gugma sa Manluluwas. Ang maong buloha-ton nagkinahanglan ug paghago, apan kini nagdala ug madagayaong ganti. Kadtong nagabuhat niini uban sa pagkasinsero sa katuyoan makakita sa mga kalag nga madaug ngadto sa Manluluwas, kay ang inpluwensya nga nagauban sa praktikal nga pagtuman sa diosnon nga sugo dili kapungnan.

“Dili lamang sa ordinado nga ministro ang responsibilidad sa pag-adto aron sa pagtuman niini nga sugo. Ang matag usa nga midawat kang Cristo gitawag sa pagbuhat alang sa kaluwasan sa iyang isigkatawo. . . .

“Ang sugo sa Manluluwas gihatag ngadto sa tanan nga mituo sa Iyang ngalan. Ang Dios mopadala ngadto sa Iyang ubasan ug daghan nga dili matinugyanon ngadto sa pangalagad pinaagi sa pagpandong sa mga kamot.”¹

“Sa kasinatian ni Felipe ug sa Etiopiahanon gipresentar ang buhat diin ang Ginoo nagtawag sa Iyang katawhan. . . . Adunay mga tawo sa kalibutan nga nagabasa sa Kasulatan, apan dili makasabut sa ilang kahulogan. Ang mga lalaki ug mga babaye nga adunay kahibalo sa Dios gikinahanglan sa pagpasabut sa pulong niini nga mga kalag.”²

Kon ikaw napanalanginan niini nga kahibalo, ikaw usa kanila! *R*

Mga Reperensya:

¹ *The Acts of the Apostles*, pp. 109, 110. [Pagpatin-aw gidugang.]

² *Testimonies for the Church*, vol. 8, p. 58.



ANG ATONG HATAAS NGA PAGKATINAWAG

GIHUGPONG GIKAN SA MGA SINULAT
NI ELLEN G. WHITE

Ang panawagan sa pagbutang sa tanan sa altar sa pag-alagad moabut sa matag usa. Dili kitang tanan gihangyo sa pag-alagad sama sa pag-alagad ni Eliseo, ni kitang tanan giagda sa pagbaligya sa tanan nga anaa kanato; apan ang Dios naghangyo kanato sa paghatag sa Iyang pag-alagad sa unang dapit sa atong mga kinabuhi, sa pagtugot nga walay adlaw nga molabay nga walay pagbuhat ug usa ka butang aron sa pagpalambo sa Iyang buhat dinhi sa yuta. Siya wala magdahom gikan sa tanan sa samang matang sa serbisyo. Ang usa mahimong tawgon sa pagministeryo sa lang-yaw nga yuta; ang lain mahimong hangyoon sa paghatag sa iyang kinitaan alang sa pagsuporta sa buluhaton sa ebanghelyo. Ang Dios modawat sa halad sa matag usa. Kini mao ang pagtugyan sa kinabuhi ug sa tanan nga mga in-teres niini, kana maoy gikinahanglan. Kadtong naghimo niini nga pagtugyan makadungog ug motuman sa tawag sa Langit.

Ngadto sa matag usa nga mahimong umalambit sa Iyang grasya, ang Ginoo mitudlo ug usa ka buhat alang sa uban. Sa tag-sa-tagsa kita mobarug sa atong bahin, nga magaingon, “Ania ako; ipadala ako.” Bisan ang usa ka tawo usa ka ministro sa Pulong o usa ka mananambal, bisan siya usa ka mag-papatigayon o mag-uuma, propesyonal nga tawo o mekaniko, ang responsibilidad anaa kaniya. Maoy iyang buhat ang pagpadayag ngadto sa uban sa ebanghelyo sa ilang kaluwasan. Ang matag patigayon nga iyang gisudlan kinahanglan nga usa ka paagi alang niini nga katuyoan.¹

Unsaon Nako sa Pagsugod?

Walay usa nga maghulat hangtud nga tawagon sa usa ka halayo nga kaumahan sa dili pa magsugod sa pagtabang sa uban.

Bisan asa ka, makasugod ka dayon. Ang mga kahigayonan anaa ra haduol sa tanan. Buhata ang buluhaton diin ikaw adunay tulubagon—ang buluhaton nga kinahanglang buhaton sa imong panimalay ug sa imong mga silingan. Ayaw paghulat nga awhagon ka sa uban nga molihok. Diha sa kahadlok sa Dios, padayon sa unahan sa walay paglangan, hinumdomi ang imong indibidwal nga responsibilidad ngadto Kaniya nga naghatag sa Iyang kin-abuhi alang kanimo. Lihok sama sa imong nadungog nga si Cristo nagtawag kanimo nga personal nga buhaton ang imong labing maayo sa Iyang pag-alagad. Ayaw tan-awa kung kinsa pa ang andam. Kon ikaw sa tinuod matinugyanon, ang Dios buot, pinaagi sa imong kahimanan, magdala ngadto sa kamatuoran sa uban nga iyang magamit ingon nga mga agianan sa pagpahat sa kahayag ngadto sa daghan nga nagapangapkap sa kangitngit.



Ang tanan makahimo sa usa ka butang. Sa paningkamot nga mangatarungan sa ilang kaugalingon, ang uban moingon, “Ang akong mga katungdanan sa panimalay, akong mga anak, mokuha sa akong panahon ug ang akong kinitaan.” Mga ginikanan, ang inyong mga anak kinahanglang mao ang inyong katabang, nga makadugang sa inyong gahum ug abilidad sa pagtrabaho alang sa Agalon. Ang mga kabataan mao ang gagmay nga mga membro sa pamilya sa Ginoo. Kinahanglang matultolan sila sa pagtugyan sa ilang kaugalingon ngadto sa Dios, kang kinsa sila Iyaha pinaagi sa paglalang ug pinaagi sa katubsan. Kinahanglang tudloan sila nga ang tanan nilang gahum sa lawas, hunahuna, ug kalag iya. Kinahanglang bansayon sila sa pagtabang sa lainlaing matang sa dili hinakog nga pag-alagad. Ayaw itugot nga ang inyong mga anak mahimong babag. Uban kaninyo

ang mga bata kinahanglang moambit sa spirituhanon ingon man sa pisikal nga mga palas-anon. Pinaagi sa pagtabang sa uban ilang madugangan ang ilang kaugalingong kalipay ug kapuslanan.²

Maoy katuyoan sa Dios nga ang Iyang katawhan mahimong usa ka nabalaan, naputli, balaan nga katawhan, nagpahibalo sa kahayag ngadto sa tanan nga naglibut kanila. Kini mao ang Iyang katuyoan nga, pinaagi sa pagpakita sa kamatuoran sa ilang mga kinabuhi, sila mahimong usa ka pagdayeg dinhi sa yuta. Ang grasya ni Cristo paigo na aron kini mahitabo. Apan himoa nga ang mga tawo sa Dios mahinumdom nga samtang sila motuo ug magbuhat sa mga baruganan sa ebanghelyo nga Siya makahimo kanila nga usa ka pagdayeg dinhi sa yuta. Sa diha lamang nga ilang gamiton ang ilang hinatag sa Dios nga mga katakus diha sa Iyang pag-alagad nga sila makatagamtam sa kahingpitan ug gahum sa saad diin ang iglesia gitawag sa pagbarug. Kon kadtong nag-angkon nga nagtoo kang Cristo ingon nga ilang Manluluwas makaabot lamang sa ubos nga sukdanan sa kalibutanong sukod, ang iglesya mapakyas sa pagdala sa madagayaong ani nga gipaabot sa Dios. “Nakaplagan nga kulang” maoy nasulat sa iyang talaan. . . .

Ang mga tinon-an dili na maghulat sa mga tawo nga moduol kanila. Kinahanglang sila ang moadto sa mga tawo, mangita sa mga makasasala sama sa usa ka magbalantay nga nangita sa nawala nga carnero. Si Cristo nag-abli sa kalibutan ingon nga ilang luna sa pagtrabaho. Sila kinahanglang nga moadto “sa tibuok kalibutan, ug mosangyaw sa ebanghelyo ngadto sa matag linalang.” Marcos 16:15. Mahitungod sa Manluluwas ang ilang iwali, ang Iyang kinabuhi sa dili hinakog nga pag-alagad, sa Iyang kamatayon sa kaulaw, sa Iyang walay katugbang, walay pagkausab nga gugma. Ang iyang ngalan mao ang ilang bantayanang pulong, ang ilang bugkos sa panaghiusa. Diha sa Iyang ngalan ilang buntogon ang mga salipdanan sa sala. Ang pagtuo sa Iyang ngalan mao ang pagtimaan kanila ingon nga mga Cristohanon.

Sa paghatag sa mga tinon-an ug dugang nga mga instruksiyon, si Cristo miingon: “Kamo makadawat ug gahum, sa human nga ang Espiritu Santo mokunsad kaninyo: ug kamo mahimong mga saksi Kanako sa Jerusalem, ug sa tibuok Judea, ug sa Samaria, ug hangtud sa kinatumyan sa yuta.” “Apan pabilin kamo sa ciudad sa Jerusalem, hangtud nga masul-uban kamo sa gahum gikan sa kahitas-an.” Buhat 1:8; Lucas 24:49.

Sa pagtuman sa pulong sa ilang Agalon ang mga tinon-an nagtigum sa Jerusalem sa paghulat sa katumanan sa saad sa Dios. Dinhi sila migugol ug napulo ka adlaw, mga adlaw sa lawom nga pagsusi sa kas- ingkasing. Ilang gisalikway ang tanang kailan ug nagkasuod diha sa Cristohanong

panag-uban.

Sa katapusan sa napulo ka adlaw gitu-man sa Ginoo ang Iyang saad pinaagi sa usa ka talagsaon nga pagbubo sa Iyang Espiritu. “Sa kalit miabut ang usa ka lanog gikan sa langit ingon sa huros sa makusog nga hangin, ug kini mipuno sa tibuok balay diin sila nagalingkod, ug dihay nagpakita kanila nga mga dila nga daw kalayo, ug kini mi-tungtong sa matag usa kanila. Ug silang tanan napuno sa Espiritu Santo, ug misugod sa pagsulti sa lain nga mga pinulongan, sumala sa gihatag sa Espiritu kanila nga isulti.” “Ug sa maong adlaw gidugang ngadto kanila ang mga tulo ka libo ka mga kalag.” Buhat 2:2–4, 41.

“Ug sila nanglakaw, ug nagwali sa tanang dapit, ang Ginoo nagbuhat uban kanila, ug nagpamatuod sa pulong pinaagi sa mga ilhanan nga nagsunod.” Marcos 16:20. Bisan pa sa mabangis nga pagsupak nga nasugatan sa mga tinon-an, sa hamubo nga panahon ang ebanghelyo sa gingharian gipalanog ngadto sa tanang gipuy-an nga mga bahin sa yuta.

Ang sugo nga gihatag ngadto sa mga tinon-an gihatag usab kanato. Karon, sama kaniadto, ang usa ka gilansang ug nabanhaw nga Manluluwas pagabayawon atubangan niadtong kinsa walay Dios ug walay paglaum sa kalibutan. Ang Ginoo nagtawag ug mga pastor, mga magtutudlo, ug mga magwawali. Gikan sa pultahan ngadto sa pultahan ang Iyang mga alagad kinahanglang nga magmantala sa mensahe sa kaluwasan. Ngadto sa matag nasud, kalit-watan, pinulongan, ug katawhan ang balita sa pagpasaylo pinaagi ni Cristo pagadalhon.

Dili sa paus, walay kinabuhi nga paglitok nga ang mensahe igahatag, kondili uban sa tin-aw, desidido, makapukaw nga mga pulong. Gatasan ang naghulat sa pasidaan nga makaikyas alang sa ilang kinabuhi. Ang kalibutan nagkinahanglang nga makita diha sa mga Cristohanon ang usa ka ebidensiya sa gahum sa Pagka-Cristohanon. Dili lamang sa pipila ka mga dapit, kondili sa tibuok kalibutan, gikinahanglang ang mga mensahero sa kalooy gikinahang- lan. Gikan sa matag nasud madungog ang singgit: “Umari ka, . . . ug tabangi kami. Ang datu ug kabus, taas ug ubos, nagtawag alang sa kahayag. Mga lalaki ug mga babaye gigutom sa kamatuoran ingon nga kini anaa kang Jesus. Sa diha nga sila makadungog sa ebanghelyo nga gisangyaw uban sa gahum gikan sa kahitas-an, sila makahibalo nga ang bangkete giandam na alang kanila, ug sila motubag sa tawag: “Umari ka; kay ang tanang mga butang andam na.” Lucas 14:17.

Ang mga pulong “Panglakaw kamo sa tibuok kalibutan, ug iwali ang ebanghelyo ngadto sa tanang binuhat” (Marcos 16:15) gisulti ngadto sa matag usa sa mga sumusunod ni Cristo. Ang tanan nga mitugyan



Dili lamang ngadto kang kinsa nagwali sa pulong sa Dios gibutang ang responsibilidad sa pagpangita aron maluwas ang mga makasasala. Siya naghatag niining bulohaton sa tanan. Ang atong mga kasingkasing kinahanglan mapuno sa gugma ni Cristo aron ang atong mga pulong sa pagpasalamat mopainit sa ubang mga kasingkasing. Kini mao ang pagpangalagad nga ang tanan makahimo.

ngadto sa kinabuhi ni Cristo gitudlo sa pagbuhat alang sa kaluwasan sa ilang isigkatawo. Ang sama nga pangandoy sa kalag nga Iyang gibati alang sa pagluwas sa nawala mao ang madayag diha kanila. Dili ang tanan mabutang sa parehas nga lugar, apan alang sa tanan adunay lugar ug bulohaton. Ang tanan nga nahatagan sa mga panalangin sa Dios motubag pinaagi sa aktuwal nga pag-alagad; ang matag gasa gamiton alang sa pag-uswag sa Iyang gingharian.

Usa ka Dili Mausab nga Saad

Si Cristo naghimo sa bug-os nga tagana alang sa pagpahigayon sa buhat nga gipiyal ngadto sa mga tinon-an, ug mikuha sa Iyang kaugalingon sa kapangakohan sa kalampusan niini. Hangtud nga ilang gitu-man ang Iyang pulong, ug nagbuhat uban Kaniya, dili sila mapakyas. Lakaw ngadto sa tanang kanasuran, Iyang gisugo sila. Lakaw ngadto sa kinalay-ang bahin sa mapuyan nga kalibutan, apan hibalo nga ang Akong presensya anaa didto. Pagbuhat sa pagtuo ug pagsalig, kay dili moabot ang panahon nga Ako mosalikway kanimo.

Sa ato usab gihatag ang saad sa presensya ni Cristo. Ang paglabay sa panahon wala mohimo sa kausaban sa Iyang panamilit nga saad. Siya kauban nato karon sama sa Iyang pag-uban sa mga tinon-an, ug Siya mag-uban kanato “bisan hangtud sa katapusan.”

“Lakaw kamo sa pagsangyaw sa ebanghelyo ngadto sa tanang kanasuran,” ang Manluluwas nag-ingon kanato, “aron sila mahimo nga mga anak sa Dios. Ako uban kaninyo niini nga buhat, pagtudlo, paggiya, paghumpay, pagpalig-on kaninyo, paghatag kaninyo ug kalampusan sa inyong buhat sa pagdumili sa kaugalingon ug pagsakripisyo. Akong palihokon ang mga kasingkasing, sa pagdani kanila sa sala, ug pabalik sila gikan sa kangitngit ngadto sa kahayag, gikan sa pagkadili-masinugtanon ngadto sa pagkamatarung. Sa akong ka-

hayag sila makakita sa kahayag. Ikaw makasugat ug pagsupak sa mga ahensya ni Satanas, apan ibutang ang imong pagsalig Kanako. Ako dili mopakyas kani-mo.”

Wala ba kamo maghunahuna nga si Cristo naghatag bili niadtong hingpit nga nagkinabuhi alang Kaniya? Wala ba kamo maghunahuna nga Siya mibisita niadtong kinsa, sama sa hinigugma nga si Juan, alang Kaniya sa lisud ug ma-sulayon nga mga dapit? Siya nakakaplag sa Iyang mga matinumanon, ug nakig-uban kanila, nagdasig ug nagpalig-on kanila. Ug ang mga manulonda sa Dios, nga labaw sa kusog, gipadala sa Dios aron sa pag-alagad sa Iyang tawhanon nga mga magbubuhut nga nagasulti sa kamatuoran niadtong wala mahibalo niini.

Ngadto sa ministro sa maayong balita gihatag sa Dios ang buhat sa paggiya ngadto kang Cristo niadtong nanghi-salaag gikan sa sigpit nga dalan. Siya kinahanglan nga magmaalamon ug matinguhaon sa iyang mga paningkamot. Sa katapusan sa matag tuig siya kinahanglan nga makahimo sa pagtan-aw pagbalik ug makakita sa mga kalag nga nalu-was ingon nga resulta sa iyang mga paghago. Ang uban iyang luwason uban ang kahadlok, “pagakuhaon sila gikan sa kalayo; nga nagadumot bisan sa bisti nga nabulingan sa unod,” “nagkupot sa matinumanon nga pulong ingon sa gitudlo kaniya.” Judas 23; Tito 1:9. Ang sugo ni Pablo ngadto kang Timoteo moabut ngadto sa mga ministro karon: “Busa ako magasugo kanimo sa atubangan sa Dios, ug sa Ginoong Jesu Cristo; . . . Iwali ang pulong; sa panahon, ug sa dili sa panahon; magbadlong, magsaway, magtambag uban ang bug-os nga pagkamainantuson ug pagtulon-an.” 2 Timoteo 4:1, 2.

Apan dili lamang kanila nga nagwali sa pulong nga gibutang sa Dios ang responsibilidad sa pagpangita sa pagluwas sa mga makasasala. Siya naghatag niini nga buluhaton sa tanan. Ang atong mga kasingkasing kinahanglan mapuno sa gugma ni Cristo nga ang atong mga pulong sa pagpasalamat

makapainit sa ubang mga kasingkasing. Kini ang serbisyo nga mahimo sa tanan, ug gidawat kini sa Ginoo ingon nga gitanyag sa Iyang kaugalingon. Siya naghimo niini nga epektibo, nga naghatag ngadto sa matinguhaon nga magbubuhut sa grasya nga nagpasiguli sa tawo ngadto sa Dios.

Hinaut nga ang Ginoo motabang sa Iyang katawhan nga makaamgo nga adunay matinguhaon nga buhat nga pagabuhaton. Hinaut nga Siya motabang kanila sa paghinumdom nga diha sa panimalay, sa simbahan, ug sa kalibutan sila magbuhat sa mga buhat ni Cristo. Sila wala pasagdi nga mag-inusara sa pagbuhat. Ang mga manulonda mao ang ilang mga katabang. Ug si Cristo mao ang ilang magtatabang. Dayon himoa sila nga maghago nga matinud-anon ug walay kakapoy. Sa tukma nga panahon sila magaani kon sila dili maluya.³

Mga Misyonaryo nga Nagsuporta sa Kaugalingon

Sa daghang mga lugar ang mga misyonaryo nga nagsuporta sa kaugalingon mahimong malampuson nga mga magbubuhut. Maingon nga usa ka nagsuporta sa kaugalingon nga misyonaryo nga si apostol Pablo naghago sa pagpakaylap sa kahibalo ni Cristo sa tibuok kalibutan. Samtang adlaw-adlaw nagtudlo sa ebanghelyo diha sa dagkung mga ciudad sa Asia ug sa Uropa, siya nagtrabaho sa patigayon sa usa ka artesano aron sa pagpadayon sa iyang kaugalingon ug sa iyang mga kauban. Ang iyang panamilit nga mga pulong ngadto sa mga anciano sa Efeso, nga nagpakita sa iyang paagi sa pagtrabaho, adunay bililhon nga mga leksyon alang sa matag magbubuhut sa ebanghelyo:

“Kamo nahibalo,” siya miingon, “sa unsang paagiha ako nag-uban kaninyo sa tanang panahon: . . . ug ngano nga wala ako magtago ug bisan unsa nga mapuslanon kaninyo, kondili nagpakita kaninyo,

ug nagtudlo kaninyo sa dayag, ug sa balay ngadto sa balay. . . . Wala akoy gikaibogan nga salapi, o bulawan, o bisti ni bisan kinsa. Oo, kamo sa inyong kaugalingon nahibalo, nga kini nga mga kamot nag-alagad sa akong mga kinahanglanon, ug kanila nga uban kanako. Akong gipakita kaninyo ang tanang mga butang, nga sa ingon nga paghago kinahanglan kamo sa pagtabang sa mga mahuyang, ug sa paghinumdom sa mga pulong sa Ginoong Jesus, sa unsa nga paagi Siya miingon, Labi pang bulahan ang paghatag kay sa pagdawat.” Buhat 20:18–35.

Daghan karon, kon nagiyahan sa samang espiritu sa pagsakripisyo sa kaugalingon, makahimo ug maayong buluhaton sa samang paagi. Tugoti ang duha o daghan pa nga magsugod nga magkauban sa buluhatong pagpangwali. Tugoti sila sa pagbisita sa mga tawo, mag-ampo, mag-awit, magtudlo, magpasabut sa mga Kasulatan, ug mag-alagad sa mga masakiton. Ang uban makabuhi sa ilang kaugalingon isip mga canvasser; ang uban, sama sa apostol, makatrabaho sa usa ka buhat sa kamot o sa ubang mga linya sa paningkamot. Samtang sila magpadayon sa ilang buluhaton, makaamgo sa ilang pagkawalay mahimo, apan mapaubsanong nagsalig sa Dios, sila makaangkon ug usa ka bulahan nga kasinatian. Ang Ginoong Jesus mag-una kanila, ug taliwala sa mga adunahan ug mga kabus sila makakaplag ug pabor ug tabang.

Kadtong nabansay alang sa medikal nga misyonaryo nga buhat sa langyaw nga mga nasud kinahanglan nga dasigon sa pag-adto sa walay paglangan diin sila nagpaabut sa pagtrabaho, ug magsugod sa pagtrabaho taliwala sa mga tawo, sa pagkat-on sa pinulungan samtang sila nagtrabaho. Sa dili madugay makahimo na sila sa pagtudlo sa yano nga mga kamatuoran sa pulong sa Dios.

Sa tibuok kalibutan, gikinahanglan ang mga mensahero sa kalooy. Adunay tawag alang sa Cristohanong mga pam-ilya sa pag-adto sa mga komunidad nga anaa sa kangitngit ug kasaypanan, sa pag-adto sa langyaw nga mga kau-mahan, sa pagsinati sa mga panginahanglan sa ilang isigkatawo, ug sa pagbuhat alang sa kawsa sa Agalon. Kong ang mao nga mga pamilya mopuyo sa mangitngit nga mga dapit sa yuta, mga dapit diin ang mga tawo gitabonan sa spir-ituhanong kangitngit, ug modan-ag ang kahayag sa kinabuhi ni Cristo pinaagi kanila, pagkamaayo nga buhat ang matuman.

Kini nga buluhaton nagkinahanglan ug pagsakripisyo sa kaugalingon. Samtang daghan ang naghulat nga ma-tangtang ang tanang babag, ang buhat nga mahimo unta nilang buhaton gipasagdan nga wala mabuhay, ug ang mga panon sa katawhan

nangamatay nga walay paglaum ug walay Dios. Ang uban alang sa kaayohan sa komersyo, o sa pag-angkon sa siyentipikanhong kahibalo, manimpalad ngadto sa dili mahimutang nga mga rehiyon ug malipayong molahutay sa sakripisyo ug kalisdanan; apan unsa kadiyutay alang sa ilang isigkatawo ang andam sa pagbalhin sa ilang mga pamilya ngadto sa mga rehiyon nga nagkinahanglan sa ebanghelyo.

Aron maabot ang mga tawo, bisan asa sila, ug bisan unsa ang ilang posisyon o kahimutang, ug sa pagtabang kanila sa tanang paagi nga possible—kini maoy tinuod nga pagpangalagad. Pinaagi sa ingon nga paningkamot mahimo nimong makuha ang mga kasingkasing ug maablihan ang usa ka pultahan sa agianan sa mga kalag nga nawala.

Sa tanan nimong buluhaton hinumdumi nga ikaw nabugkos uban ni Cristo, usa ka bahin sa dakong plano sa katubsan. Ang gugma ni Cristo, sa usa ka makapaayo, usa ka sulog nga nagahatag ug kinabuhi, modagayday sa imong kinabuhi. Samtang ikaw nagtinguha sa pagdani sa uban diha sa sirkulo sa Iyang gugma, himoa nga ang kaputli sa inyong pinulungan, ang pagkadili hakog sa inyong pag-alagad, ang kalipay sa inyong pamatasan, magsaksi sa ga-hum sa Iyang grasya. Hatagi ang kalibutan sa hilabihan ka putli ug matarung nga representasyon Kaniya, nga ang mga tawo makakita Kaniya sa Iyang katahum.

Wala kaayoy kapuslanan ang pagsulay sa pagbag-o sa uban pinaagi sa pag-atake sa kung unsa ang gihunahuna nato nga sayop nga mga batasan. Ang maong paningkamot kasagarang moresulta sa mas daghang kadaut kay sa kaayohan. Sa Iyang pakighinabi sa babayeng Samarianhon, imbis nga pakamenoson ang atabay ni Jacob, si Cristo mi-presentar ug mas maayo. “Kon nahibal-an mo pa ang gasa sa Dios,” Siya miingon, “ug kinsa kini nga nagaingon kan-imo, Paimna ako; mangayo ka unta Kaniya, ug Siya mohatag kanimo ug buhi nga tubig.” Juan 4:10. Iyang giliso ang panag-istoryahanay ngadto sa bahandi nga kinahanglan Niyang ihatag, nagtanyag sa babaye ug butang nga mas maayo pa kay sa iyang gipanag-iya, gani buhi nga tubig, ang kalipay ug paglaum sa ebanghelyo.

Kini maoy usa ka ilustrasyon sa paagi sa atong pagtrabaho. Kita kinahanglan gayud nga motanyag sa mga tawo ug usa ka butang nga mas maayo pa kay sa ilang gipanag-iya, gani ang kalinaw ni Cristo, nga labaw sa tanang pagsabut. Kinahanglang sultihan nato sila sa balaan nga balaod sa Dios, ang hulad sa Iyang kinaiya, ug usa ka pagpahayag sa Iyang gusto nga sila mamahimo. Ipakita kanila kung unsa ka labaw sa lumalabay nga kalipay ug ka-

lipayan sa kalibutan ang dili madunot nga himaya sa langit. Sultithi sila sa kagawasan ug kapahulayan nga makaplagan diha sa Manluluwas. “Bisan kinsa nga moinom sa tubig nga Akong igahatag kaniya dili na gayud uhawon,” Siya mipahayag. Bersekulo 14.

Ipataas si Jesus, nga nagasinggit, “Tan-awa, ang Cordero sa Dios, nga nagakuha sa sala sa kalibutan!” Juan 1:29, A.R.V. Siya lamang ang makatagbaw sa pangandoy sa kasingkasing ug makahatag ug kalinaw sa kalag.

Sa tanang tawo sa kalibutan, ang mga repormador kinahanglang mao ang labing dili hakog, ang labing buotan, ang labing matinahuron. Sa ilang kinabuhi kinahanglan nga makita ang tinuod nga kaayo sa dili hinakog nga mga buhat. Ang mga magbubuhay nga nagpadayag sa kakulang sa pagkamatinahuron, nga nagpakita sa pagkawalay pailub sa pagkawalay alamag o pagkadili-matinahuron sa uban, nga nagdalidali sa pagsulti o paglihok nga walay paghunahu-na, mahimong magsira sa pultahan sa mga kasingkasing aron dili niya maabot sila.

Ingon nga ang tun-og ug ang mga taligsik nga ulan mahulog sa ibabaw sa nalaya nga mga tanum, sa ingon pasagdi nga ang mga pulong mahulog sa hinay sa pagpangita sa mga tawo gikan sa kasaypanan. Ang plano sa Dios mao ang pagkab-ot una sa kasingkasing. Kita kinahanglan nga mosulti sa kamatuoran diha sa gugma, mosalig diha Kaniya sa paghatag niini ug gahum alang sa pagbag-o sa kinabuhi. Ang Balaang Espiritu mogamit sa kalag sa pulong nga gisulti sa gugma.

Sa nabatasan kita nakasentro sa kaugalingon ug matinumnon sa gusto. Apan kon kita makakat-on sa mga leksyon nga gitinguha ni Cristo nga itudlo kanato, kita mahimong umalambit sa Iyang kinaiya; sukad karon kita nagpuyo sa Iyang kinabuhi. Ang kahibulongan nga panig-ingnan ni Cristo, ang dili hitupngan nga kalumo diin Siya misulod ngadto sa mga pagbati sa uban, nga naghilak uban kanila nga nagbakho, nagmaya uban niadtong nagmaya, ki-nahanglan nga adunay usa ka halalum nga inpluwensya diha sa kinaiya sa tanan nga mosunod Kaniya sa pagkamat-inud-anon. Pinaagi sa mabination nga mga pulong ug mga buhat sila mosulay sa paghimo sa dalan nga sayon alang sa gikapoy nga mga tiil.⁴ *R*

Mga Reperensya:

¹ *Prophets and Kings*, pp. 221, 222.

² *The Review and Herald*, July 29, 1902.

³ *Testimonies for the Church*, vol. 8, pp. 14–18.

⁴ *The Ministry of Healing*, pp. 154–157.



DIHA SA ATONG PANIMALAY

NI MIGUEL MENDOZA - AUSTRALIA

PASIUNA

“Ang atong mga panimalay kinahanglang himoon nga Bethel, ang atong mga kasingkasing usa ka sanctuaryo. Bisan asa ang gugma sa Dios gimanggad diha sa kalag, adunay kalinaw, adunay kahayag ug kalipay. Si Jesus gusto nga makakita ug malipayon nga kaminyoon, **malipayon nga mga panimalay**.”¹

Sa katuigan sa 1800, sa konteksto sa Amerika, ang pinuy-anan maoy sentrong bahin sa kinabuhi sa panimalay, ilabina sa panahon sa wala pa ang modernong pagpainit o elektrisidad. Dinhi nagpundok ang mga pamilya alang sa kainit, kahayag, ug koneksyon. Si Sister White migamit sa ekspresyon nga “by the fireside o diha sa panimalay” sa paghatag ug gibug-aton sa personal, relasyon, ug spirituwal nga pakiglambigit sa usa ka kahimtang nga mailhan dayon sa iyang mga tigpaminaw ingon nga sinati ug makahuluganon. Busa, para niya, kita makaingon, “sa fireside o panimalay” dili lang pisikal nga lokasyon; simbolo kini sa pagkasuod, pagsalig, ug kahigayonanan alang sa inpluwensya aron sa pagtudlo niadtong anaa sa panimalay

sa pagkinabuhi sumala sa kahayag nga gihatag sa Dios sa Iyang katawhan ug ipaam-bit kini sa tanan sa kalibutan. Karon, samtang anaa kini sa hunahuna, atong tagdon ang atong topiko para karon ug magkat-on gikan sa lainlaing mga leksyon nga atong makuha gikan sa pulong sa Dios ug sa sulat sa Inspirasyon.

Sa Pagkabata

Sa panahon sa akong pagkabata, bisan kung ang akong pinuy-anan nga lungsod nga natawhan usa ka bugnaw nga lugar sa kadaghanan sa tuig, kami wala’y fireplace o painitan nga ingon niana. Apan akong nahinumduman nga ang among panimalay usa ka dapit diin kami makapundok nga murag anaa kami “sa kilid sa kalayo” atol sa panahon sa pagsimba ug sa ubang mga okasyon ug mogahin ug pipila ka mga gutlo sa pagdayeg sa Ginoo ug sa pagtuon sa Iyang pulong. Akong mama mipaambit kanamo sa mahinungdanon nga mga leksyon sa kinabuhi nga akong mahinumduman uban sa gugma. Siya misunod sa instruksiyon nga makaplagaan sa Proverbio 22:6, “Bansaya ang bata sa dalan nga iyang pagalakatan: ug

kon siya matigulang na, siya dili mobiya gikan niana.” Klaro nakong makita sa akong personal nga kasinatian nga kadtong mga leksyon mahinungdanon kaayo sa pagtabang nako sa paghimo ug mga desisyon nga modeterminar kon mosunod ba ako sa Ginoo o dili. Nagpasalamat ako sa Ginoo sa Iyang Pulong ug sa mga saad nga makita niini.

“Sa pagkabata ug pagkabatan-on ang kinaiya labing madanihon. Ang gahum sa pagpugong sa kaugalingon kinahanglang maangkon. Diha sa panimalay ug sa kan-anan, ang mga inpluwensya magamit kansang mga resulta sama ka malungtaron sa kahangturan. Labaw pa sa bisan unsang natural nga katakus, ang mga gawi nga naugmad sa unang mga tuig mohukom kon ang usa ka tawo magmadaugon o mapildi sa gubat sa kinabuhi.”²

Si Abraham ug si Sarah

Nabatian nato ang mahitungod kang Abraham, ang iyang pagtuo, ang iyang mga depekto apil usab ang kalihukan nga ginahimo niya uban sa mga tawo sa



puluy-anan — ug nagalakip niini sa mga tawo nga nag-alagad kaniya, ang iyang mga ulipon. Nakadawat siya ug saad gikan sa Dios: “Ug pagapanalanginan ko ang mga magapanalangin kanimo, ug ang mga magapanghimaraut kanimo, pagapanghimarauton Ko: ug diha kanimo pagapanalanginan ang tanang mga banay sa yuta” (Genesis 12:3). Ngano nga ang tanang mga banay sa yuta mapanalanginan diha kaniya? Tungod kay pinaagi sa Iyang koneksyon kang Cristo, nagpakita siya ug panig-ingnan sa pagsunod sa tingog sa Dios, ingon sa atong mabasa sa Genesis 26:5, “Tungod kay gituman ni Abraham ang akong tingog, ug gibantayan niya ang akong tulumanon, ang akong mga sugo, ang akong kabalaoran, ug ang akong mga balaod.” Dili lamang niana, apan iyang tudloan ug giyahan ang iyang pamilya sa mga paagi sa Ginoo kinsa mipamatuod, “Kay ako nakaila kaniya, nga siya magasugo sa iyang mga anak ug sa iyang panimalay sunod kaniya, ug sila magabantay sa dalan ni Jehova, sa pagbuhat sa kaangayan ug sa hustisya; aron ang Ginoo magadala kang Abraham niadtong

iyang gipamulong mahitungod kaniya” (Genesis 18:19). Bisan pa niana, wala siya mag-inusara niini nga buluhaton. Si Sara, nga iyang asawa, kauban niya ug silang duha nagbuhat ug maayo kaayong buhat “diha sa panimalay” tungod kay sila nagtudlo pag-ayo sa tanan diha sa ilang balay samtang sila mipanaw ngadto sa yuta sa saad: “Sa ilang taliwala daghan ang nadala sa mas taas nga pagtagad kay sa pag-alagad ug sa kaugalingong kasibot. Sa panahon sa ilang pagpuyo sa Haran, si Abraham ug Sara nanguna sa uban ngadto sa pagsimba ug pag-alagad sa matuod nga Dios. Kini sila miipon sa ilang mga kaugalingon ngadto sa panimalay sa patriarka, ug miuban kaniya ngadto sa yuta sa saad.”⁷³ Gikan sa kasinatian ni Abraham ug Sarah sa pagtrabaho nga magkauban alang sa gingharian sa Dios, tataw kaayo nga ang amahan ug inahan adunay mahinungdanon nga tahas sa pag-edukar sa ilang panimalay sa mga paagi sa Ginoo.

Mga Ginikanan ug Mga Pamilya

Sa akong ministeryo, sa lainlaing mga kahigayonan, samtang nagbisita sa mga pamilya, ako miapil sa mga panahon sa pagsimba uban kanila “diha sa panimalay.” Nindot tan-awon ang kakugi ug ang paningkamot nga gihimo sa mga ginikanan aron makabaton niining mahinungdanon nga panahon isip usa ka pamilya. Kini usa ka panalangin nga mag-uban sa pag-ampo, pagdayeg, ug pagbasa, paggahin ug usa ka piho nga oras aron magtigum aron simbahon ang atong Ginoo ug adunay lawom nga panag-istoryahanay bahin sa spirituhanon nga mga butang. Sa ingon niini ilang gitu-man ang ilang katungdanan sa pagbayaw sa bandera nga nabulit sa dugo ni Emmanuel batok sa mga pana sa kaaway. Mahinungdanon nga hinumdoman nga ang pamilya mao ang pinakamaayo nga natad sa misyonaryo.

“Ang mga ginikanan kinahanglang makigsulti ngadto sa ilang gagmay nga mga anak mahitungod ni Jesus, ug sa plano sa kaluwasan. Kinahanglan nilang isagol ang bililhong mga leksyon sa kinabuhi ug kinaiya ni Cristo ngadto sa mga hunahuna sa ilang mga anak aron sila mahimong mga sumusunod ni Cristo ug mga manununod sa kinabuhing dayon. Daghan ang naghisgot bahin sa langyawng misyonaryong buluhaton, apan ang buluhaton sa balay gipasagdan. Ang pinakadako nga natad sa misyon anaa sa inyong puloy-anan, ug ang dakong panginahanglan mao ang mga amahan ug mga inahan sa Israel. Sa diha nga ang mga ginikanan magsugod sa pagkaamgo sa dako nga ka-pangakohan nga anaa kanila, sila modala niining panimalay nga misyonaryo nga buhat, ug magbansay sa ilang mga anak alang sa langit. Sila mohatag sa ilang gagmay nga mga bata ug pagtulun-an human

sa usa ka pagtulun-an, ug lagda human sa usa ka lagda.”⁷⁴ “Ang atong buhat alang kang Cristo mao ang pagsugod sa pamilya diha sa pan-imalay. Ang edukasyon sa kabatan-onan kinahanglan nga lahi sa pagkahan-ay sa gihatag kaniadto. Ang ilang kaayo-han nanginahanglan ug labaw pa nga trabaho kay sa gihatag kanila. Walay misyonero nga natad nga mas mahinungdanon pa niini. Pinaagi sa sugo ug panig-ingnan ang mga ginikanan magtudlo sa ilang mga anak sa paghago alang sa wala makabig. Ang mga anak kinahanglan nga maedukar pag-ayo nga sila mosimpatiya sa mga tigu-lang ug nag-antus ug magtinguha sa pagpagaan sa mga pag-antus sa mga kabus ug naguol. Kinahanglang tudloan sila nga magmakugihon sa misyonaryo nga buhat; ug gikan sa ilang sayong katuigan ang pagdumili sa kaugalingon ug ang pagsakripisyo alang sa kaayohan sa uban ug ang pag-uswag sa kawsa ni Cristo kinahanglan isilisil, aron sila mahimong mga magbubuhat uban sa Dios.

“Apan kon sila magakat-on gayud sa pagbuhat sa tinuod nga misyonaryo nga buhat alang sa uban, sila kinahanglan gayud nga makakat-on una sa paghago alang niadtong anaa sa panimalay, kinsa adunay natural nga katungod sa ilang mga katungdanan sa gugma. Matag bata kinahanglan nga bansayon sa pagdala sa iyang tagsatagsa ka bahin sa pag-alagad diha sa panimalay. Dili gayud siya angay nga maulaw sa paggamit sa iyang mga kamot sa pag-alsa sa mga palas-anon sa panimalay o sa iyang mga tiil sa pagpadagan sa mga buluhaton. Samtang nagabuhat sa ingon niini, dili siya moadto sa mga dalan sa pagpasagad ug pagpakasala. Pila ka oras ang mausik sa mga bata ug kabatan-onan nga mahimong igugol sa pagpas-an sa ilang lig-on nga batan-ong mga abaga, ug pagtabang sa pagbayaw, sa mga kapan-gakohan sa pamilya nga kinahanglan pas-anon sa usa, sa ingon nagpakita sa usa ka mahigugmaong interes sa ama-han ug inahan. Kinahanglan usab sila nga mak-

Dinhi, sa pagbuhat alang sa Ginoo, kita giagda sa paghimamat sa mga tawo kung asa sila komportable, sa ilang puloy-anan, ug gamita kanang nasabutan nga panahon sa pagpahat sa pagtuo. Ang pagpahamutang sa panimalay nagpasabut ug usa ka hayahay, personal nga pagpakig-ambit, nga katugbang sa pormal nga mga wali o publiko nga mga debate.

agamot sa tinuod nga mga prinsipyo sa re-
porma sa kahimsog ug pag-atiman sa ilang
kaugalingong mga lawas.”⁵

Bisan pa niana, “sa kadaghanan niini
nga natad sa panimalay sa makauulaw nga
paagi napasagdan, ug panahon na nga ang
balaanong mga tinubdan ug mga tambal
gipresentar, nga kini nga kahimtang sa
pagkadautan matul-id. Unsa nga pasangil
ang mahatag sa nag-angkon nga mga su-
musunod ni Cristo sa pagbaliwala sa pag-
bansay sa ilang mga anak sa pagbuhat alang
Kaniya?”⁶

Hinigugma nga mga ginikanan, sa
panimalay, ang atong mga kabatan-onan
nanginahanglan ug pinasahi nga pag-atiman
tungod kay nakita nato ang mga kadautan sa
kalibutan nga padayon nga nag-uswag. “Ang
dako nga pagkadautan sa pagkawalay pag-
pugong nagabuhat sa makadaut nga buhat
niini sa atong yuta. Si Satanas adunay iyang
mga ahente bisan asa, kinsa mga instrumento
diha sa iyang mga kamot, sa pagdani ug
pagguba sa atong mga kabatan-onan. Dili ba
ang tingog sa pasidaan madungog sa atong
kaugalingong puloy-anan? Dili ba kita, pinaa-
gi sa lagda ug panig-ingnan, modala sa atong
kabatan-onan sa pagtinguha sa pagkab-ot sa
taas nga mga kalampusan, aron makabaton
ug halangdon nga mga tumong ug balaan
nga mga katuyoan? Kini nga buhat dili usa
ka gaan, o usa ka gamay nga buhat; apan
kini usa ka trabaho nga mohatag sa resulta.
Usa ka batan-on nga natudloan sa husto nga
pagbansay sa panimalay, magadala ug lig-on
nga mga troso ngadto sa iyang paglig-on sa
kinaiya, ug pinaagi sa iyang panig-ingnan
ug kinabuhi, kon ang iyang mga gahum
magamit sa husto, siya mahimong usa ka ga-
hum sa atong kal-ibutan sa paggiya sa uban
ngadto sa itaas ug sa unahan diha sa dalan
sa pagkamatarung. Ang kaluwasan sa usa ka
kalag mao ang kaluwasan sa daghang mga
kalag.”⁷

Mga Magbubuhat sa Ebanghelyo

Sa libro nga Evangelism, pananglitan,
ang mensahero sa Ginoo naghimo ug pan-
awagan: “Sa tanan nga nagtrabaho uban
ni Cristo ako moingon, Bisag asa kamo
makaduol sa mga tawo diha sa mga puloy-
anan, palamboa ang inyong kahigayonan.
Dad-a ang inyong Biblia, ug ablihi sa ilang
atubangan ang dagkong mga kamatuoran
niini.”⁸ Dinhi, sa pagtrabaho alang sa Gi-
noo, kita giawhag sa pagpakighimamat sa
mga tawo diin sila komportable, sa ilang
mga pan-imalay, ug sa paggamit nianang
mahinungdanon nga takna sa pagpahat
sa pagtuo. Ang puloy-anan nga luna nag-
pasabot sa usa ka relaks, personal nga
interaksyon, sukwahi sa pormal nga mga
sermon o publiko nga mga debate. Ang
kinasingkasing nga paagi gidasig sa pag-
pakaylap sa mensahe sa Dios, nga nahiuyon
sa mas lapad nga pagpasiugda sa praktikal

nga pagka-Cristohanon ug personal nga
pagpangalagad.

Lain na usab nga panawagan para sa
ato nga naglangkob sa ministryo ug mga
magbubuhat, “Mga kaigsoonan ko sa min-
istryo, ablihi ninyo ang inyo mga ganhaan
ngadto sa mga batan-on nga mga lalaki
nga naladlad sa pagsulay. Duol kamo sa ila
pinaagi sa personal nga panigkamot. Ang
kadautan nagaagda sa ila sa tanan nga ba-
hin. Tinguhaa nga mainteres sila sa butang
nga makatabang sa ila nga magkinabuhi sa
mas mataas nga kinabuhi. Ayaw ihikaw ang
imong kaugalingon gikan kanila. Dad-a sila
sa imong puloy-anan; dapita sila sa pag-
apil kanimo libot sa altar sa pamilya. Atong
hinumduman ang pag-angkon sa Dios ngari
kanato nga himoong hayag ug madanihon
ang dalan paingon sa langit.”⁹

“Akong nakita nga ang mga ministro
nga naghago diha sa pulong ug sa dok-
trina adunay usa ka dakong buhat sa ilang
atubangan, ug ang usa ka bug-at nga ka-
pangakohan anaa sa ibabaw nila. Akong
nakita nga sa diha nga sila maghago dili sila
makaduol pag-ayo sa mga kasingkasing.
Ang ilang buhat hilabihan ka kinatibuk-an,
ug kasagaran nagkatag. Ang ilang paghago
kinahanglan ipunting ngadto sa ilang gi-
hagoan. Sa dihang sila nagsangyaw diha
sa pulpito, ang ilang buluhaton nagsugod
pa lamang. Sila kinahanglan mokinabuhi
sa ilang giwali, kanunay nga magbantay sa
ilang mga kaugalingon, nga dili sila mag-
dala ug kaulawan sa kawsa sa Dios. Kinah-
anglan sila naghulagway sa panig-ingnan sa
kinabuhi ni Cristo. 1 Corinto 3:9. ‘Kay kami
mga mamumuo uban sa Dios.’ 2 Corinto
6:1. ‘Busa kami ingon nga mga magbubuhat
uban kaniya nangaliyupo usab kaninyo
nga dili ninyo dawaton ang grasya sa Dios
sa walay kapuslanan.’ Ang buluhaton sa
ministro wala mahuman sa diha nga siya
mobiya sa lamesa sa pulpito. Kinahanglan
nga dili niya isalikway ang palas-anon ug
i-okupar ang iyang hunahuna sa pagbasa
o pagsulat, gawas kon kini gikinahanglan
gayud; apan kinahanglan nga sundan ang
iyang mga buluhaton sa publiko pinaagi sa
pribado nga mga paningkamot — maghago
sa personal alang sa mga kalag bisan kanus-
a adunay higayon — makighisgot diha sa
puloy-anan, mangaliya ug mangamuyo sa
mga kalag tungod kang Cristo nga makig-
uli ngadto sa Dios. Ang atong buluhaton
dinhi hapit na matapos, ‘ug matag tawo
makadawat sa iyang kaugalingong ganti
sumala sa iyang kaugalingon nga paghago.’
”¹⁰

“Dinhi niining paningkamot sa puloy-
anan, kini nga buluhaton sa panimalay, nga
inubanan sa timailhan sa kalampusan. Sulayi
kini, mga kaigsoonan sa ministryo. Ang pip-
ila sa atong mga ministro wala mahigugma
niini nga matang sa pagpangabudlay. Sila
milikay niini. Adunay usa ka krus nga gilakip
sa ingon nga personal nga mga paningka-

mot, apan kini ang trabaho nga kinahanglan
himoan sa mga tawo kung ilang dawaton
ang dili inila nga kamatuoran. Niining suod
nga pakig-uban sa mga kalag nga anaa sa
kangitngit, ang atong kahayag mahimong
modan-ag nga mas epektibo, direkta ngadto
sa kangitngit, ug sila makakita pinaagi sa
atong pamatasan, sa atong panagsulthanan,
sa atong solemne apan malipayon, matinahu-
ron nga pamatasan, nga ang grasya sa Dios
anaa kanato, ug nga ang kalinaw sa langit
madala ngadto sa ilang mga panimalay. Sila
madani sa kamatuoran nga giubanan sa in-
gon ka bulahan nga mga sangputanan.”¹¹

Ang mosunod nga kinutlo maoy
kabahin sa mga pakigpulong nga gitumong
ngadto sa mga ministro nga nagpundok sa
kinatibuk-ang Konperensya nga kapasidad
sa Battle Creek, Michigan, sa ilang tigum
sa buntag nga gihimo niadtong Nobrembre
9, 1883: “Unsa ka sagrado nga pagsalig
ang gihatag sa Dios kanato sa paghimo
kanato nga iyang mga sulugoon aron sa
pagtabang sa buhat sa pagluwas sa mga
kalag. Siya nagsalig kanato sa dagkong
mga kamatuoran, usa ka labing solemne,
masulayon nga mensahe alang sa kalibutan.
Ang atong katungdanan dili lamang sa
pagsangyaw, apan sa pagpangalagad, sa
pagduol sa mga kasingkasing, sa paghimo
ug personal nga mga paningkamot diha
sa mga puloy-anan. Kinahanglan atong
gamiton ang gisalig nga mga talento uban
sa kahanas ug kaalam, aron atong mapakita
ang bililhong kahayag sa kamatuoran
sa labing makapahimuot nga paagi, ang
pinakamaayo nga paagi sa pagdaug ug mga
kalag.”¹²

Debotado nga Mga Cristohanon

Ang Ginoong Jesus naghatag sa Iyang
katawhan ug usa ka sugo nga kinahanglan
tumanon dayon. Atong mabasa sa Mateo
28:19, 20 “Busa panglakaw kamo, ug tudloi
ang tanang kanasuran, nga magabautismo
kanila sa ngalan sa Amahan, ug sa Anak,
ug sa Espiritu Santo: Magtudlo kanila sa
pagtuman sa tanang mga butang nga akong
gisugo kaninyo: ug, tan-awa, ako magauban
kaninyo sa kanunay, hangtud sa katapusan
sa kalibutan. Amen.” Kini atong pribilehiyo
ang pagpaminaw ug pagbuhat niini nga
mga pulong. “Dili katuyoan sa Dios nga
ang mga ministro kinahanglan pasagdan sa
pagbuhat sa labing dako nga bahin sa buhat
sa pagpugas sa mga binhi sa kamatuoran.
Mga tawo nga wala tawga ngadto sa
pagpangalagad sa ebanghelyo kinahanglan
nga dasigon sa pagpangabudlay alang
sa Agalon sumala sa ilang lainlaing mga
abilidad. Gatusan ka mga lalaki ug mga
babaye karon nga walay gibuhit makahimo
sa madinawaton nga pagpangalagad.
Pinaagi sa pagdala sa kamatuoran ngadto
sa mga balay sa ilang mga silingan ug
mga higala, makahimo sila ug dakong



Karon, karon, karon mao ang pinakaangay nga panahon sa pagbuhat. Indibiduwal nga pagbisita maoy dakog bili. Sa paghigugma kang Jesu Cristo ug sa paghigugma sa tawhanong mga kalag ang kamatuoran madala ngadto sa matag pamilya, pakighinabi sa matag panimalay nga kini posible alang kanimo sa pagpangita ug paagi.

buluhaton alang sa Agalon. Ang Dios walay pinalabi sa mga tawo. Siya mogamit sa mapainubsanon, debotado nga mga Cristohanon nga may gugma sa kamatuoran sa ilang kasingkasing. Tugoti sila nga mag-alagad sa iyang paagi sa pagpamalabaybalay nga buluhaton. Naglingkod diha sa puloy-anan, ang ingon nga mga lalaki — kon mapaubsanon, maalamon, ug diosnon — makabuhat sa dugang pa aron matubag ang tinuod nga mga panginahanglan sa mga pamilya kay sa usa ka ministro.”¹³ Alang sa tanan nga moapil niining mahinungdanon nga buhat, ang puloy-anan mahimong natural nga hawanan sa pagpaambit sa ebanghelyo ug mga leksyon sa pamilya, pagtuo, ug pagpalapnag. “Ang pagpresentar sa kamatuoran, diha sa gugma ug kayano, sa balay ug balay, nahiuyon sa instruksiyon nga gihatag ni Cristo sa Iyang mga tinon-an sa dihang Iyang gipadala sila sa ilang unang misyonaryong panaw. Pinaagi sa mga awit sa pagdayeg, pinaagi sa mapaubsanon, kinasingkasing nga mga pag-ampo, daghan ang maabot. Ang balaang Magbubuhat maanaa aron magpadala ug konbiksyon sa mga kasingkasing. ‘Ako uban kanimo kanunay,’ mao ang Iyang saad. Uban sa kasiguroan sa malungtarong presensya sa ingon nga magtatabang, kita mahimong maghago uban sa hugot nga pagtuo ug paglaum ug kaisug.”¹⁴ Busa, gusto ka bang gamiton sa Dios isip usa ka mapainubsanong instrumento sa paggiya sa uban ngadto sa tilan sa krus?

“Usa sa labing epektibo nga mga paagi diin ang kahayag mapahayag mao ang pribado nga personal nga paningkamot. Sa palibot sa panimalay, sa panimalay sa imong silingan, sa kilid sa higdaanan sa masakiton, sa hilum nga paagi makabasa ka sa Kasulatan ug makasulti ug pulong alang kang Jesus ug sa kamatuoran. Sa ingon makapugas ka ug bililhong binhi nga

moturok ug mamunga.”¹⁵

Ang Hangyo sa Dios

Samtang atong gitun-an karon, adunay mahinungdanon nga buluhaton nga pagabuhaton “sa panimalay,” sa ato man o sa uban. Isip usa ka iglesia, kinahanglan natong masabtan nga ang spirituwal nga buluhaton dili lamang sa simbahan — kini labing epektibo sa matag adlaw, pribadong mga higayon. Ang panimalay, niini nga pagsabut, mao ang nag-unang dapit alang sa pagtukod ug mga relasyon ug pagtanom ug mga binhi sa hugot nga pagtuo ug kamatuoran gikan sa kagahi sa pormal nga mga kahintang. Minahal nga pamilya sa Reform Movement, atong hangyoon ang Ginoo nga ablihan ang atong mga hunahuna ug kasingkasing aron madawat kini nga mensahe ug dad-on sa balay ang mosunod nga hangyo alang kanimo ug alang kanako samtang atong tapuson kini nga hilisgutan:

“Ang Ginoo mosusi sa paggamit nato sa mga talento nga Iyang gipiyal kanato. Iyang gibayran ang mga suhol sa Iyang kaugalingong dugo ug ang Iyang kaugalingong pagdumili sa kaugalingon ug sakripsyo ug mga pag-antus, aron masiguro ang kinabubut-ong pag-alagad sa matag kalag ingon nga usa ka magbubuhat uban sa Dios. Kon ang tanan mobati lamang sa ilang tulubagon ngadto sa Dios sa maalamon nga paagi sa paggamit sa mga gasa diha sa mga talento nga gisalig, pagkadako sa kita nga madala ngadto sa Dios pinaagi ni Jesu Cristo! Ang usa ka talento mahimo ug madugangan pinaagi sa paggamit. Ang gituohan nga labing ubos nga gasa, ang labing mapaubsanon nga pag-alagad, mahimong makaabut sa mga hunahuna ug maka inpluwensya sa mga kasingkasing

nga kadtong adunay dagkong mga talento dili makatandog.

“Karon, karon, karon mao na ang atong labing angay nga panahon sa pagbuhat. Ang indibiduwal nga pagbisita adunay dakong bili. Sa gugma alang kang Jesu Cristo ug gugma alang sa tawhanong mga kalag ang kamatuoran kinahanglang dad-on ngadto sa matag pamilya, hisgotan sa matag panimalay nga posible alang kanimo nga makakita ug agianan. ... Hinumdumi nga ang Balaang Espiritu mao ang magbubuhat. Ang tawhanong ahente nga nagtrabaho alang sa Dios wala mag-inusara. ...

“Paghago diha sa pagkamalahutayon, sa kalumo, kalooy, pag-ampo, ug gugma mobuhat ug labaw pa kay sa mga wali. Ang Ginoong Jesus, sa paghatag sa Iyang kinabuhi alang sa pagluwas sa kalibutan gikan sa tunglo sa sala, nagplano ug mas dagkong mga butang kay sa nasaksihan pa sa atong mga mata. Ang Balaang Espiritu naghulat alang sa mga agianan diin pinaagi kang kinsa molihok. ... Si Satanas dili kanunay modaog. Ang Espiritu sa Dios ibubu diha sa iglesia sa diha nga ang mga sudlanan andam na sa pagdawat niini.”¹⁶

Hinaut nga ang Ginoo madagayaon nga mopanalangin kanato ug motabang kanato sa pagbuhat niini nga buluhaton diha sa panimalay, Amen! *R*

Mga Reperensya:

- ¹ *The Faith I Live By*, p. 255. [Pagpatin-aw gidugang.]
- ² *Child Guidance*, p. 202.
- ³ *Patriarchs and Prophets*, p. 127. [Pagpatin-aw gidugang.]
- ⁴ *The Review and Herald*, April 21, 1891.
- ⁵ *Testimonies for the Church*, vol. 6, p. 429.
- ⁶ *Ibid.*, p. 430.
- ⁷ *The Review and Herald*, July 10, 1888. [Pagpatin-aw gidugang.]
- ⁸ *Evangelism*, p. 436.
- ⁹ *Gospel Workers*, p. 212. [Pagpatin-aw gidugang.]
- ¹⁰ *Testimonies for the Church*, vol. 1, p. 432.
- ¹¹ *Manuscript Releases*, vol. 7, p. 37.
- ¹² *The Review and Herald*, April 15, 1884.
- ¹³ *Welfare Ministry*, p. 109. [Pagpatin-aw gidugang.]
- ¹⁴ *Christian Service*, p. 114.
- ¹⁵ *Ibid.*, p. 118.
- ¹⁶ *That I May Know Him*, p. 330.



DOMINGO, DECEMBRE 7, 2025

"HATAGI NINYO SILA UG MAKAAON"

NI OZIEL FERNANDEZ – BRASIL

USA KA PANAWAGAN SA PAGPANGALAGAD
UG CRISTOHAONONG KALOY

Ang mga pulong nga gilitok ni Jesus, “Hatagi sila ug makaon,” milanog pag-ayo isip usa ka tawag sa pag-atiman ug responsibilidad ngadto sa uban. Makit-an sa Mateo 14:16, kini nalakip sa iladong storya sa unang pagpadaghan sa mga tinapay ug isda. Bisan pa, gawas sa pagsaysay sa usa sa inila nga mga milagro sa Biblia, kini nga tudling naglangkob usab sa sukaranan nga mga leksyon bahin sa kalooy, pagkamanggihatagon ug Cristohanong pagpangalagad, nga ang tanan naghagit sa iglesia karon sa paghimog praktikal nga aksyon sa usa ka kalibutan nga nag-atubang sa dagkong mga hagit sama sa kagutom.

Kagutmanan karon

Karon, ang kagutmanan maoy usa ka malaglagong problema sa tibuok kalibutan. “Sumala sa mga taho sa United Nations, sa 2023 lamang, sumala sa SOFI 2024, duolan sa 733 ka milyon nga mga tawo ang mag-antus sa kagutom sa tibuok kalibutan.”¹ Murag usa sa matag 11 ka tawo sa kalibutan ang gigutom ug kini nga gidaghanon nagkadaghan tungod sa mga hinungdan sama sa dili patas sa katilingban, krisis sa ekonomiya, ug armadong panagbangi. Kini nga kamatuoran lahi kaayo sa gidaghanon sa pagkaon nga giprodyus sa tibuok kalibutan, nga nagpakita nga ang problema dili ang kakulang sa mga kahinguhaan, apan ang dili maayo nga pag-apud-apud ug kakulang sa aksyon.

Sa dihang si Jesus miingon, “Hatagi sila ug makaon,” Iyang gihagit ang Iyang mga tinon-an sa pag-atubang sa usa ka sitwasyon nga daw imposible — sama nga ang hagit sa pagpakaon sa minilyon nga gigutom nga mga tawo karon. Bisan pa, sama nianang okasyona, ang mensahe ni Cristo nagpunting sa giambitan nga responsibilidad sa Iyang mga sumusunod aron matubag ang pisikal ug spirituwal nga mga panginahanglan niadtong nag-antus.

Ang Konteksto sa Biblia

Ang milagro sa pagpadaghan sa mga tinapay nahitabo wala madugay human sa balita sa kamatayon ni Juan Bautista. Kadto malagmit tungod kay ang mga tinon-an gikapoy ug nasubo sa kamatayon ni Juan nga si Jesus mipahawa uban sa mga tinon-an ngadto sa usa ka desyerto nga dapit alang sa usa ka panahon sa pagpahayahay. “Sa pagkadungog ni Jesus niini, siya mibiya didto sakay sa sakayan ngadto sa usa ka dapit nga awaaw nga halayo. (Mateo 14:13). Ang pagdapit ni Cristo sa pagpahulay usa ka pagpahayag sa Iyang pastoral nga pag-atiman sa Iyang mga tinon-an. Apan ang gitinguha nga kapahulayan sa wala madugay nabalda, samtang ang mga panon sa katawhan nakakaplag diin

Siya miadto ug misunod Kaniya nga nagbaktas. “Ang mga tawo nakakita kanila nga nanglakaw, ug daghan ang nakaila kaniya, ug nanagan sila gikan sa tanang mga ciudad, ug nanag-una kanila, ug nanagtigum ngadto kaniya” (Marcos 6:33).

“Ang Pasko haduol na, ug, gikan sa halayo ug duol, ang mga pundok sa mga langyaw sa ilang pagpaingon sa Jerusalem nagpundok aron sa pagtan-aw kang Jesus. Nadugangan ang ilang gidaghanon, hangtud nga dihay nagpundok nga lima ka libo ka mga lalaki gawas sa mga babaye ug mga bata. Sa wala pa si Cristo miabut sa baybayon, usa ka panon sa katawhan ang naghulat Kaniya.”²

Kalooy alang sa Mga Panon sa Tawo

Ang mahigugmaong Manluluwas dili gayud magpanuko sa pagtubag sa atong mga panginahanglan. Nalooy siya sa mga tawo, giabiabi sila ug gayo ang ilang mga sakit. “Ug migula si Jesus, ug nakita niya ang usa ka dakong panon sa katawhan, ug giabut siya sa kalooy kanila, ug iyang gayo ang ilang mga sakit” (Mateo 14:14).

Sa Bag-ong Tugon, ang “pagbaton ug kalooy” nagpahayag sa labing taas nga ang-ang sa simpatiya alang niadtong nag-antus, kasagaran napakita sa mga buhat ni Jesu Cristo. (Tan-awa usab sa Mateo 15:32; 20:34; Marcos 1:41; Lucas 7:13.)

Si Jesus wala gayud mosalikway sa usa ka tawo nga wala magtagad sa tanan nilang mga panginahanglan. Bisan ug nabalda ang Iyang pagpahulay, mibiya sa Iyang pagpahulay, Iyang gibuhat ang tulo ka butang sa pag-atiman kanila:

1. Siya nagtudlo sa mga panon sa katawhan mahitungod sa gingharian sa Dios, sa ingon nakatubag sa mga panginahanglan sa hunahuna.

2. Siya nag-ayo sa masakiton, sa ingon nakatubag sa ilang pisikal nga mga panginahanglan.

3. Siya mipakaon sa tibuok panon sa tinapay isip simbolo sa tinapay gikan sa langit (Juan 6:22–40).

Busa, sa ingon si Jesus nakahatag sa ilang mental, pisikal, ug spirituwal nga mga panginahanglan.

Ang Kabalaka sa Mga Tinon-an

Usa kadto ka nagkapuliki nga adlaw sa kalihokan. Si Jesus nagtudlo ug nag-ayo sa mga masakiton diha sa panon, apan ang mga tinon-an karon nabalaka kon unsaon sa pagpakaon sa mga tawo. Sa pagkaamgo kon asa sila, sila miduol kang Jesus, nagpahayag

sa ilang kabalaka ug nagsugyot nga Iyang papaulion ang mga tawo aron mangitag pagkaon sa kasikbit nga mga balangay.

“Sa pagkahapon, ang mga tinon-an miduol kang Jesus ug miingon, Kini usa ka awaaw nga dapit, ug karon ang panahon milabay na: Papahawaa sila, aron sila mangadto sa kasikbit nga kaumahan, ug ngadto sa mga balangay, ug mamalit sila ug tinapay: kay sila walay makaon” (Marcos 6:35, 36). Ang mga tinon-an wala makakita kon unsaon nila paghatag ug pagkaon sa panon; kadto labaw sa ilang badyet, ug alang kanila walay laing solusyon kondili ang pagpalakaw lamang sa panon sa katawhan. Ang tanan dili maayo; layo ang lugar, ulahi na ang oras, daghan ang mga tawo, ug wala silay igong kuwarta. Uban sa panlantaw sa kanihit, giklaro sa mga tinon-an kung unsa ang wala kanila.

Ang Mando ni Cristo

Pagpaminaw ug maayo sa sugyot sa mga tinon-an, “Si Jesus miingon kanila, Dili kinahanglan nga manglakaw sila; hatagi ninyo sila ug makaon” (Mateo 14:16). Ang mando ni Cristo wala damha ug makahasol, mao nga ang mga ti-non-an adunay tulo ka mga hagit:

1. Daghan ang panon—5,000 ka lalaki, walay labot ang mga babaye ug mga bata.
2. Anaa sila sa desyerto nga layo sa ciudad nga walay kapalitan ug pagkaon.
3. Wala silay igong kwarta.

Ang mga tinon-an tin-aw nga wala’y laing paagi—uban ang mga problema sa logistik, kakulang sa mga kahinguhaan, ug usa ka gigutom nga panon.

Apan sila nagkauyon sa paghatag sa pipila ka tipik nga anaa kanila ngadto sa mga kamot ni Cristo, tungod kay “Siya miingon, Dad-a sila dinhi kanako” (Mateo 14:18). Kanang gamay sa kamilagroso gipadaghan, ug ang tanan na-puno. Ang milagro nagtudlo kanato nga, bisan sa limitado nga mga kapanguhaan, ang Dios makahimo ug dagkong mga butang pinaagi sa mga tawo kinsa andam nga moserbisyo.

Sa dihang si Jesus nagsugo sa mga tinon-an sa pagpakaon sa mga tawo, Iyang gipukaw ang prinsipyo sa responsibilidad sa simbahan sa pag-atiman sa mga huyang nga Iyang gisulti pinaagi ni propeta Isa-

ias. Si Cristo, pinaagi sa propeta, misugo, "Ihatag ang imong tinapay sa gigutom;" "Dad-a sa imong balay ang mga kabus nga sinalikway;" "Sa diha nga ikaw makakita sa hubo, . . . bistih siya" (Isaias 58:7).

Ang Ginoo klaro nga misugo kanato: "Panglakaw kamo sa tibuok kalibutan, ug iwali ang Maayong Balita ngadto sa tanang binuhat" (Marcos 16:15). "Apan unsa ka subsob ang atong mga kasingkas-ing mikunhod, ug ang pagtuo mapakyas kanato, samtang atong makita unsa ka dako ang panginahanglan, ug unsa kagamay ang mga kahinguhaan sa atong mga kamot. Sama ni Andres nga nagtan-aw sa lima ka tinapay nga sebada ug sa duha ka gagmai nga isda, kita motuaw, 'Unsa man sila taliwala sa daghan kaayo?' Kasagaran kita magduhaduha, dili gusto nga ihatag ang tan-an nga anaa kanato, nahadlok nga mogasto ug gastohon alang sa uban. Apan si Jesus misugo kanato, 'Hatagi sila ug makaon.' Ang Iyang sugo maoy usa ka saad; ug sa luyo niini mao ang samang gahum nga nagpakaon sa panon sa kawatwan daplin sa dagat."³

Ang Panawagan sa Iglesia

Ang mga pulong, "Hatagi sila ug makaon," lapas pa sa konteksto sa paghatag ug pisikal nga pagkaon. Kini usa ka tawag alang sa iglesia, isip lawas ni Cristo, aron matubag ang spirituhanon, emosyonal ug materyal nga mga panginahanglan. Si Jesus wala magtugot sa mga tinon-an sa pagsalikway sa ilang responsibilidad sa pag-atiman sa mga panon sa katawhan, ug kining mao nga prinsipyo kinahanglan nga mogiya kanato sa iglesia karon.

"Diha sa milagro sa Manluluwas sa pagpakaon sa lima ka libo gihulagway ang pagbuhat sa gahum sa Dios diha sa pagpamunga sa ani. Si Jesus mikuha sa tabil gikan sa kalibutan sa kinaiyahan ug gipadayag ang kusog sa paglalang nga kanunay nga gigamit alang sa atong kaayohan. Pinaagi sa milagro nga Siya kanunay nagpakaon sa minilyon gikan sa naani sa mga kaumahan sa yuta. Ang mga tawo gitawag sa pagtinabangay uban Kaniya diha sa pag-atiman sa lugas ug sa pag-andam sa tinapay, ug tungod niini sila nawad-an sa panan-aw sa diosnong ahensya. Ang pagbuhat sa Iyang gahum makuha sa natural nga mga hinungdan o sa tawhanon nga galamiton, ug sa kasagaran ang Iyang mga gasa natuis ngadto sa hinakog nga mga paggamit ug nahimong tunglo imbis nga panalangin. Ang Dios nan-inguha sa pag-usab niining tanan. Siya nagahandum nga ang atong habol nga mga pagbati madasig sa pag-ila sa Iyang maloloy-on nga kaayo, aron ang Iyang mga gasa mahimo kanato nga panalangin nga

Iyang gitinguha.

"Kini mao ang pulong sa Dios, ang paghatag sa Iyang kinabuhi, nga naghatag ug kinabuhi sa binhi; ug niana nga kinabuhi, kita, sa pagkaon sa lugas, nahimong umalambit. Kini, ang gihandom sa Dios nga atong masabtan; Siya nagtinguha nga bisan sa pagdawat sa atong inadlaw nga kalan-on kita makaila sa Iyang kabubut-on ug madala ngadto sa mas suod nga pagpakig-uban Kaniya.

"Pinaagi sa mga kasugaoan sa Dios diha sa kinaiyahan, ang epekto mosunod sa hinungdan uban sa walay pagkausab nga kasigurohan. Ang pag-ani nagpamatuod sa pagpugas. Dinhi walay pagpakaaron-ingnon nga itugot. Ang mga tawo nahimong molimbong sa ilang isigkatawo ug mahimong makadawat ug pagdayeg ug bayad alang sa pag-alagad nga wala nila mahatag. Apan sa kinaiyahan walay paglimbong."⁴

"Sa ting-ani ang binhi gipadaghan. Ang usa ka lugas sa trigo, modaghan pinaagi sa balik-balik nga pagpugas, motabon sa tibuok yuta sa bulawanon nga mga binangan. Sa ingon makaylapon kaayo ang inpluwensya sa usa ka kin-abuhi, bisan sa usa ka buhat."⁵

Sa dugang nga pagkomento sa milagro sa pagpadaghan sa mga tinapay ug mga isda, Atong mabasa diha sa Espir-itu sa Tagna: "Sa buhat ni Cristo sa paghatag sa temporal nga mga kinahanglanon sa usa ka gigutom nga panon sa katawhan naputos sa usa ka lawom nga spirituhanong leksyon alang sa tanan Niyang mga magbubuhay. Si Cristo nakadawat gikan sa Amahan; Iyang gipaambit ngadto sa mga tinon-an; sila mihatag ngadto sa panon sa katawhan; ug ang katawhan ngadto sa usag usa. Busa ang tanan nga nahiusa kang Cristo makadawat gikan Kaniya sa tinapay sa kinabuhi, ang langitnong pagkaon, ug ipaambit kini ngadto sa uban."⁶

Ang kagutom nga gihisgutan ni Jesus mahimong masabtan sa mas lapad nga paagi. Daghang mga tawo sa atong palibot ang gigutom sa hustisya, kalinaw, gugma, ug paglaum. Ang iglesia adunay bulohaton nga mahimong tinubdan sa spirituhanon ug emosyonal nga pagkaon alang sa usa ka kalibutan nga anaa sa krisis. Si apostol Santiago nagpalig-on niini nga kamatuoran pinaagi sa pagpatin-aw sa kamahinungdanon sa pagtuo inubanan sa konkretong mga buhat:

"Kon ang usa ka igsoon nga lalake o babaye hubo, ug nakulangan sa inadlaw-adlaw nga kalan-on, Ug usa kaninyo moingon kanila, Pahawa sa pakigdait, pagpinit kamo ug pagbusog; bisan pa niana wala ninyo ihatag kanila ang mga butang nga gikinahanglan sa lawas; unsay ka-

puslanan niini?" (Santiago 2:15, 16). Sa samang paagi, sa iyang unang sulat, si Juan nangutana, "Apan bisan kinsa nga adunay kaayohan niining kalibutana, ug makakita sa iyang igsoon nga anaa sa kawalad-on, ug magatak-um sa iyang kasingkasing sa kalooy gikan kaniya, unsaon pagpabilin sa gugma sa Dios diha kaniya?" (1 Juan 3:17).

Ang kalibutan karon puno sa "gigutom nga panon" sa pagpangita sa kahulogan, kabtangan ug paglaum. Ang iglesia gitawag nga mahimong usa ka manggihatagon nga komunidad, andam sa pagpaambit sa tinapay sa kinabuhi ug pagdala sa makapabag-o nga mensahe ni Cristo.

Ang Atong Papel sa Pagpadaghan

Sayon nga mobati nga nabug-atan sa kadako sa mga problema sa kalibutan sama sa kagutom. Unsaon nato, uban sa atong limitado nga mga tinubdan, makahimo ug kalainan sa pag-atubang sa ingon ka dako nga problema? Ang storya sa pagpadaghan sa mga tinapay nagpahinumdom kanato nga, sa mga kamot ni Cristo, bisan ang gamay nga anaa kanato mahimong padaghanon aron makaalagad sa daghan.

"Mga panalangin, alang sa temporal ug spirituwal, magauban niadtong kinsa naghatag ngadto sa nanginahanglan ni-anang ilang nadawat gikan sa Magtutudlo. Si Jesus mibuhay ug usa ka milagro aron sa pagpakaon sa lima ka libo, sa usa ka gikapoy, gigutom nga panon. Siya mipili sa usa ka maanindot nga dapit diin maka pahaluna ang mga tawo ug nagmando kanila sa pagpanglingkod. Unya Siya mikuha sa lima ka tinapay ug ang duha ka gagmai nga isda. Walay duhaduha nga daghang mga komento ang gihimo bahin sa imposible sa pagtagbaw sa lima ka libo nga gigutom nga mga lalaki, gawas sa mga babaye ug mga bata, gikan sa gamay nga tindahan. Apan si Jesus nagpasalamat ug nag-butang sa pagkaon sa mga kamot sa mga tinon-an aron iapud-apud. Sila mihatag ngadto sa panon, sa pagkaon nga midaghan diha sa ilang mga kamot. Ug sa dihang ang panon humanag pakaon, ang mga tinon-an sa ilang kausaligin-gon nanglingkod ug nangaon uban ni Cristo sa tipiganan nga hinatag sa langit. Kini usa ka bililhon nga leksyon alang sa matag usa sa mga sumusunod ni Cristo."⁷

Sama sa mga tinon-an ni Jesus kaniadto, ang Dios naglaum sa paggamit kanato ingon nga usa ka galamiton sa pagsulti sa Iyang mga panalangin. "Ang mga tinon-an maoy agianan sa pagsulti tali kang Cristo ug sa katawhan. Kini unta ang mahimong usa ka dakong pagpadasig sa Iyang mga tinon-an karon. Si Cristo ang dakong sentro, ang tinub-dan sa tanang kusog. Ang Iyang mga tinon-an modawat sa ilang tagana gikan Kaniya. Ang pinaka maalam,

ang pina-ka manggihunahunaon sa spirituhanon, makahatag lamang samtang sila nagadawat. Sa ilang kaugalingon sila dili makahatag alang sa mga panginahanglan sa kalag. Kita makapahat lamang kon unsa ang atong nadawat gikan kang Cristo; ug kita makadawat lamang samtang kita mipahat ngadto sa uban. Samtang kita magpadayon sa pagpahat, kita padayon sa pagdawat; ug sa labi nga kita nagapahat, mas daghan ang atong madawat. Sa ingon kita mahimong kanunay magatuo, magas-alig, magadawat, ug magapahat.”⁸

Cristohanong mga tinukod, mga misyonero ug mga bulontaryo sa tibuok kalibutan nabuhi na niini nga kahimtang pinaagi sa pagtugyan sa ilang mga kinabuhian sa pagtubag sa mga panginahanglan sa mas nag-antus. Gikan sa mga programa sa pagkaon alang sa gipang gutom ngadto sa mga proyekto sa pagtanyag sa edukasyon, maayong panglawas ug nag-una nga pag-atiman, kini nga mga panghunahuna nagpakita sa gugma ni Cristo diha sa pagbuhat. Kon unsa ang daw gagmay sa atong mga panglantaw mahimong sinugdanan sa usa ka dako nga bulohaton diha sa mga kamot sa Dios. Kita dili na maghulat hangtud nga kita adunay daghan; kon unsa ang anaa kanato karon mahimong usa ka instrumento sa mga kamot ni Cristo sa paghimo sa imposible.

Ang Panawagan sa Pagbuhat

Ang hangyo ni Cristo ngadto sa Iyang mga tinon-an nagpadayon sa paglanog karon. Siya nagdapit kanato nga mahimong kabahin sa Iyang matubosong buhat sa kalibutan, ilabi na sa tibuok kalibutan nga konteksto sa hilabihan nga panginahanglan. Kagutmanan, pisikal man o spirituhanon, nagsakit gihapon sa binilyon nga mga tawo, ug ang mga Cristohanon gitawag aron mahimong tubag sa Dios niini nga mga panginahanglan.

Kini nga panawagan sa pagbuhat mahimong magsugod sa gagmay nga mga lihok: usa ka pulong sa pagdasig, usa ka donasyon sa mga nanginahanglan, o bisan sa pagtukod sa usa ka sentro sa pagtabang sa sosyal sa atong mga sim-bahan nga nagtinguha nga matubag ang pisikal ug spirituhanon nga mga panginahanglan sa atong mga komunidad. Dili nato ibaliwala ang pagkadinalian sa kagutom sa kalibutan, apan isip mga tinon-an ni Cristo, gihagit kita sa pag-buhat uban ang kalooy ug pagkamanghihatagon.

“Si Jesus wala magtinguha sa pagdani sa mga tawo ngadto Kaniya pinaagi sa pagtagbaw sa tinguha alang sa kaluho. Ngadto nianang dakong panon, gikapoy ug gigutom human sa taas, makapahinan nga adlaw, ang yano nga probisyon maoy usa ka kasigurohan sa Iyang gahum ug sa Iyang malumo nga pag-atiman kanila diha sa komon nga mga panginahanglan sa kinabuhian. Ang Manlulu-

Kanang gamay nahimong sa kamilagro modaghan, ug ang matag usa napuno. Ang milagro nagtudlo kanato nga, bisan uban sa limitado nga mga tinubdan, ang Dios makahimo sa dagkong mga butang pinaagi sa mga tawo kinsa andam sa pagpangalagad.

was wala magsaad sa Iyang mga sumosunod sa mga kaluho sa kali-butan; ang ilang kapalaran mahimong pinaagi sa kakabus; apan ang Iyang pulong nagsaad nga ang ilang pangi-nahanglan mahatag, ug Siya nagsaad nianang mas maayo pa kay sa yutan-on nga kaayohan—ang nagapadayon nga kahupayan sa Iyang kaugalingon nga presensya.

“Human gipakaon ang panon sa katawhan, dihay abunda nga pagkaon nga nahibilin. Si Jesus nagsugo sa Iyang mga tinon-an, ‘Tigoma ninyo ang mga tipik nga nahibilin, aron walay mausik.’ Juan 6:12. Kini nga mga pulong nagpasabot ug labaw pa sa pagbutang sa pagkaon ngadto sa mga bukag. Ang leksyon duha ka pilo. Walay butang nga pagausikan. Dili nato pasagdan nga makalusot ang temporal nga bentaha. Dili nato pasagdan ang bisan unsa nga makahatag ug kaayohan sa usa ka tawo. Himoa nga matigom ang tanang butang nga makahumpay sa mga kinahanglan sa mga gigutom sa dinhi sa kalibutan. Uban sa samang pagkamabinantayan atong ampingan ang tina-pay gikan sa langit aron sa pagtagbaw sa mga panginahanglan sa kalag. Pinaagi sa matag pulong sa Dios kita magkinabuhian. Walay bisan unsa nga gisulti sa Dios nga mawala. Walay usa ka pulong nga may kalabutan sa atong walay katapusang kaluwasan nga atong pasagdan. Walay usa ka pulong nga mahulog nga walay pulos sa yuta.”⁹

“Ang mga tinon-an nagdala ngadto kang Jesus sa tanan nilang nabatonan; apan wala Niya sila inbitaha sa pagpan-gaon. Siya nagsugo kanila sa pag-alagad sa katawhan. Ang pagkaon nga midaghan diha sa Iyang mga kamot, ug ang mga kamot sa mga tinon-an, nga nag-abot kang Cristo, wala gayud mapuno. Ang gamay nga tipiganan paigo alang sa tanan. Sa dihang nabusog na ang panon sa katawhan, ang mga tinon-an nangaon uban ni Jesus sa bililhong pagkaon nga gitagana sa langit.

“Samtang makita nato ang mga panginahanglan sa mga kabus, sa mga walay alamag, sa mga sinakit, unsa ka subsob nga ang atong mga kasingkasing gikumot. Kita mangutana, ‘Unsa may kapuslanan sa atong mahuyang nga kusog ug dyutay nga mga kahinguhaan aron sa pagsangkap niining makalilisang nga panginahanglan? Dili ba kita maghulat alang sa usa ka tawo nga adunay labaw nga abilidad sa

pagdumala sa buluhaton, o alang sa usa ka organisasyon nga mobuhat niini?’ Si Cristo miingon, ‘Hatagi sila sa pagkaon, Gamita ang mga pamaagi, oras, abilidad, nga anaa kanimo. Dad-a ang imong mga tinapay nga sebada ngadto kang Jesus.

“Bisan ang inyong mga kahinguhaan dili paigo sa pagpakaon sa linibo, sila mahimong paigo sa pagpakaon sa usa. Diha sa kamot ni Cristo sila makapakaon sa daghan. Sama sa mga tinon-an, ihatag kon unsay anaa kaninyo. Si Cristo mopadaghan sa gasa. Siya moganti sa matinuoron, yano nga pagsalig diha Kaniya. Kana nga daw gamay ra nga suplay mapamatud-an nga usa ka dako nga kombira.”¹⁰

Panapos

“Hatagi sila ug makaon” dili lamang usa ka pag-awhag sa gugmang putli, apan usa ka tawag sa responsibilidad. Si Jesus nagpakita nga kita dili kinahanglan nga adunay daghan aron makahimo ug kalainan; kinahanglan lamang natong ihatag kon unsay anaa kanato ngadto sa Iyang mga kamot. Sama nga ang mga tinapay ug mga isda gipadaghan, si Cristo mahimo usab nga mopadaghan sa atong mga paningkamot ug mga kapan-guhaan sa pagpakaon sa gigutom nga mga panon sa katawhan sa atong palibot sa spirituhanon ug pisikal.

Sa kalibutan diin minilyon nga mga tawo ang nag-antus sa kagutom, ang iglesia kinahanglan nga magpadayon sa pagtubag niini nga tawag uban ang kalooy, ingon sa pagpakita sa gugma ni Cristo sa usa ka katilingban nga nanginahanglan kaayo sa pag-atiman ug paglaum. *R*

Mga Reperensya:

- ¹ <https://www.wfp.org/publications/state-food-security-and-nutrition-world-sofi-report>
- ² *The Desire of Ages*, p. 364.
- ³ *Ibid.*, p. 369.
- ⁴ *Education*, pp. 107, 108.
- ⁵ *Ibid.*, p. 109. [Pagpatin-aw gidugang.]
- ⁶ *The Desire of Ages*, p. 369.
- ⁷ *Testimonies for the Church*, vol. 6, p. 263. [Pagpatin-aw gidugang.]
- ⁸ *The Desire of Ages*, p. 370.
- ⁹ *The Ministry of Healing*, pp. 47, 48.
- ¹⁰ *Ibid.*, pp. 49, 50.



NGADTO SA MGA DAGKO UG GAGMAY NGA MGA KADALANAN

NI DANIEL BALBACH – USA

Si Jesus mihatag ug usa ka makapaint-eres nga sambingay: “Usa ka tawo naghimo ug usa ka dakong panihapon, ug midapit sa daghan: Ug sa takna sa panihapon nagsugo sa iyang ulipon sa pag-ingon sa mga dinapit, Umari kamo, kay ang tanan andam na. Ug silang tanan sa usa ka pag-uyon misugod sa pagpangatarungan kanila: Ang nahauna mi-ingon kaniya: Nakapalit ako ug usa ka luna sa yuta, ug kinahanglan nga moadto ako ug tan-awon ko kini: Ako na-ghangyo kanimo nga pasayloa lang usa ako. Ug ang usa miingon: Nakapalit ako ug lima ka pares nga mga vaca, ug moadto ako sa pagsulay kanila: Ako naghangyo kanimo nga pasayloa lang usa ako. Ug ang usa miingon: Ako nang-asawa ug usa ka asawa, ug tungod niini dili ako makaadto. Busa ang ulipon miadto, ug nagsugilon sa iyang agalon niining mga butanga. Unya ang tag-

iya sa balay, nga nasuko, miingon sa iyang sulogoon: Umadto ka pagdali ngadto sa mga kalye ug mga kadalanan sa ciudad, ug dad-a dinhi ang mga kabus, ug ang amang, ug ang mga bakol, ug ang mga buta. Ug ang sulogoon miingon: Ginoo, natuman na ang imong gisugo, ug aduna pay dapit. Ug ang agalon mi-ingon sa sulogoon, Umadto ka sa mga kadalanan ug sa mga kasiklatan, ug puga sila sa pagsulod, aron ang akong balay mapuno” (Lucas 14:16–23).

Kinsa ang una nga duha ka grupo nga giagda dinhi niini nga panihapon, ug unsa ang kahulogan niini?

“Pinaagi sa dakong panihapon, si Cristo nagrepresentar sa mga panalangin nga gitanyag pinaagi sa ebanghelyo. Ang tagana walay lain kondili si Cristo mismo. Siya mao ang tinapay nga nanaug gikan sa langit; ug gikan Kaniya ang mga sapa

sa kaluwasan midagayday. Ang mga mensahero sa Ginoo nagmantala ngadto sa mga Judeo sa pag-anhi sa Manluluwas; ilang gipunting si Cristo ingong ‘ang Kordero sa Dios, nga nagakuha sa sala sa kalibutan.’ Juan 1:29. Sa pista nga Iyang gitagana, ang Dios mitanyag kanila sa labing dako nga gasa nga ikahatag sa Langit. . . . ‘Kon adunay mokaon niini nga tinapay,’ si Cristo miingon, ‘siya mabuhi hangtud sa kahangturan.’ Juan 6:51.”¹

Gikan sa kinutlo sa ibabaw atong masabtan ang duha ka nindot nga mga punto:

1. Ang ibitasyon unang gihatag sa mga Judeo, nga nagrepresentar sa mga Cristohanon karon ingon nga piniling ka-tawhan sa Dios. “Ug kon kamo iya ni Cristo, nan kaliwat kamo ni Abraham, ug mga manununod sumala sa



saad" (Galacia 3:29).

2. Isip mga alagad ug mga mensahero sa Dios ngadto sa kalibutan, kita adunay pribilehiyo sa paghatag ngadto sa kali-butan ug usa ka pagdapit sa pagdawat sa walay bayad nga gasa sa tinapay sa kinabuhi, nga mao si Cristo mismo. "Ug si Jesus miingon kanila, Ako mao ang tinapay sa kinabuhi" (Juan 6:35).

Ang nasud nga Judeo misalikway sa pagdapit tungod sa ilang spirituhanong kahimtang—naghunahuna nga sila "dato, ug dagaya sa mga butang, ug walay kinahanglan sa bisan unsa" (Bugna 3:17). Dayon ang inbitasyon gihatag ngadto sa ikaduhang klase sa mga tawo. Gisultihan dayon sa agalon ang sulugoon sa Lucas 14:21, "Pangadto kamo pagdali ngadto sa mga dalan ug mga agianan sa ciudad, ug dad-a dinhi

ang mga kabus, ug ang mga amang, ug ang mga bakol, ug ang mga buta." Kini dili kaayo naghisgot sa literal nga kahulogan kondili sa spirituwal nga kahulogan. Kung kadtong nagrepresentar nga katawhan sa Dios karon maoy mga dato sa spirituwal, unya kadtong anaa sa mga kalye ug mga kadalanan kinsa mao kadtong mga kabus, bakol, ug buta sa spiritwal.

"Ang sulugoon nga midala sa mga kabus ug mga buta mitaho ngadto sa iyang agalon, 'Natuman na ang imong gisugo, ug aduna pay dapit. Ug ang Ginoo miingon sa sulugoon, Umadto ka sa mga dagko nga kadalanan ug sa mga kasi-klatan, ug pugsila sa pagsulod, aron mapuno ang akong balay. Dinhi gipunting ni Cristo ang buhat sa ebanghelyo gawas sa gisakopan sa Judismo, diha sa mga kadalanan ug mga kasiklatan sa kalibutan."²

Unsa ang mahitungod sa katapusang duha ka grupo nga gihisgotan sa sambingay, ingon nga mga kadalanan ug mga kasiklatan? Kini nga mga grupo gitawag sa Inspirasyon isip mga tawo sa kalibutan, kadtong gawas sa atong pagtuo.

Atol sa bag-o nga mga sesyon sa pagbansay sa misyonaryo sa daghang mga simbahan, akong gipasiugda ang atong mga paningkamot—o kulang niini—sa pagkabot niadtong wala sa atong tinuohan. Sa pagsugod sa usa ka klase, akong gihangyo ang mga estudyante sa pagtan-aw sa palibot ug sa pag-ila kon pila sa lawak ang bag-ong mga magtutuo gikan sa gawas sa simbahan, nga giabiabi sulod sa milabay nga lima ka tuig. Sa maong dakong grupo, usa o duha lamang ang bag-o lang nakabatan ug pagtuo gikan sa "kalibutan." Kini nagpatung-hag kritikal nga pangutana alang sa matag usa kanato: Isip mga sulugoon ni Cristo, aktibo ba kita sa pagtabang ug pagdapit sa uban ngadto sa dakong kombira, diin si Jesus mismo mao ang tinapay sa kinabuhi?

Kita mahimong maghunahuna, "Unsaon nako pagbuhat kini nga buluhaton? Sa pagpiho, kinsa sa kalibutan ang akong maabut?" Mahimong mobati kitag kawalay kasigurohan bahin sa pag-abot sa mga tawo gikan sa lainlaing mga kaagi—kon sila ba edukado kaayo, adunahan, o tingali naghupot ug mga pagtuo nga lahi sa tradisyonal nga Cristo-hanong mga pagtulon-an. Ang uban tingali mobati nga layo sa mga relihiyosong komunidad tungod sa personal nga mga pagpili, makasasala nga estilo sa kinabuhi, o kultural nga mga panglantaw. Adunay kasagaran nga pagduha-duha kon ang maong mga indibiduwal interesado ba sa spirituwal nga mga butang o abli sa pag-apil sa simbahan.

Daghan kanato tingali maghunahuna nga tingali dili husto o angay nga dad-on ang maong mga indibiduwal ngadto sa simbahan. Kini nga mga pagduhaduha



mahimong motumaw kung gikonsiderar ang pagpangalagad. Aron sa paghumpay niini nga mga pagduhaduha, bililhon ang pagpamalandong sa unsay gisulti sa Inspirasyon mahi-tungod sa unang grupo nga gidapit ngadto sa kombira sa ebanghelyo—kadtong anaa sa "dagkong mga kadalanan."

Mga Dagkong Kadalanan

"Ang pagdapit sa kapistahan unang gihatag ngadto sa mga Judeo nga katawhan, ang mga tawo kinsa gitawag sa pagbarug isip mga magtutudlo ug mga lider taliwala sa mga tawo. . . . Sa diha nga ang tawag sa ebanghelyo gipadala ngadto sa mga Gentil, adunay sama nga plano sa pagbuhat. Ang mensahe una nga ihatag 'sa mga dagkong kadalanan'—sa mga tawo nga adunay aktibong bahin sa buluhaton sa kalibutan, ngadto sa mga magtutudlo ug mga pangulo sa katawhan.

"Tugoti nga ang mga mensahero sa Ginoo maghunahuna niini. Ngadto sa mga magbalantay sa panon, ang mga magtutudlo nga gitudlo sa Dios, kini kinahanglan nga moabut ingon nga usa ka pulong nga pagapatalinghugan. Kadtong nahisakop sa hataas nga mga ranggo sa katilingban kinahanglan pangitaon uban ang malumo nga paghigugma ug inigsoon nga pagtagad. Mga tawo sa negosyo nga kinabuhi, sa taas nga mga posisyon sa pagsalig, mga tawo nga adunay daghang mga kahanas sa pag-inbento ug siyentipikong panabot, mga tawo nga batid sa kaalam, mga magtutudlo sa ebanghelyo kansang mga hunahuna wala pa matawag sa pinashi nga mga kamatuoran alang niining panahona—kini sila kinahanglan nga una nga makadungog sa panawagan. Ngadto kanila kinahanglang ihatag ang pagdapit.

"Adunay usa ka buhat nga pagabuhaton alang sa mga adunahan. Ang adunahan nga

tawo nagkinahanglan sa imong paghago diha sa gugma ug kahadlok sa Dios. Kasagaran siya misalig sa iyang mga bahandi, ug dili mobati sa iyang kakuyaw. Ang mga mata sa iyang hunahuna kinahanglan nga madani sa mga butang nga malungtaron nga bili. . .

“Kadtong kinsa nagbarug nga hataas sa kalibutan alang sa ilang edukasyon, bahandi, o tawag, panagsa ra nga hisgutan sa personal mahitungod sa mga interes sa kalag. Daghang Cristohanong mga magbubuhat ang nagpanuko sa pagduol niini nga mga klase. Apan dili kini angay.”³

Usa ka hinigugma nga higala sa akong amahan nahisakop niini nga klase. Makasusubo, sa panahon sa pagkamatay sa akong amahan, anaa pa ako “sa kalibutan.” Apan human sa pagbalik sa pagtuo ug nahimong magbubuhat (Bible Worker), napugos ako sa pagkontak sa higala sa akong amahan. Siya usa ka mahigalaon nga tawo, mao nga ako mibisita sa iyang balay ug kami manihapon. Samtang nagpadayon ang among panaghigalaay, ako nangita sa Ginoo ug paagi sa pagpapahat sa ebanghelyo ngadto kaniya tungod kay siya agnostic o wala moila nga adunay Dios. Sa dihang moduaw ko sa iyang balay, iyang ipakita kanako ang iyang ligid sa kolon ug tapahan, kay ganahan siyang maghimog kolon ingon nga kalingawan. Sa makadaghan nangutana siya kon gusto ba kong maghimog mga kolon uban niya, apan kanunay kong mobalibad, kay dili kini makapainter sa kanako. Apan, samtang nagpadayon kami sa pagbisita, nag-ampo ko nga adunay paagi sa pagpakigbahin sa ebanghelyo ngadto kaniya. Dayon usa ka adlaw samtang ako nag-ampo, ako nadasig nga ipadayon ug dawaton ang iyang tanyag nga magdungan ug paghimo ug mga kolon (pottery)—nakaamgo nga mahimo kining usa ka makapasulod nga bahin sa pagpakigbahin sa ebanghelyo.

Sa dihang gisultihan nako kining dungganon nga tawo nga gusto kong makakat-on unsaon paghimo ug mga kolon, siya nalipay kaayo. Sa unang higayon didto, kami adunay nindot nga kasinatian nga magkauban—moto niini o dili, nakapaambit ako sa pipila ka spirituhanong mga aplikasyon kon sa unsang paagi si Cristo ang magkokolon, ug kita ang yutang kolonon. Human niini nga panag-uban, nakahimo ko sa pagpugas ug pipila ka mga binhi sa ebanghelyo dinhi ug didto—ug ang among panaghigalaay nagkalawom. Nagsugod ako sa pagsabot ug dugang bahin sa pamaagi ni Cristo sa pagdaug sa kalag:

“Ang pamaagi ni Cristo lamang ang makahatag ug tinuod nga kalampusan sa pagkab-ot sa mga tawo. Ang Manluluwas nakigsagol sa mga tawo ingon nga usa nga nagtinguha sa ilang kaayohan. Siya nagpakita ug simpatiya alang kanila, nangalagad sa ilang mga panginahanglan, ug nakuha ang ilang pagsalig. Unya Siya nag-awhag kanila, ‘Sumunod ka Kanako.’”⁴ Kini naglangkob sa pagpalawom sa mga relasyon ug pagdaug sa pagsalig sa usa ka

tawo. Dayon samtang magpalambo kita ug mas suod nga panaghigalaay sa usa ka tawo, mas makapaambit kita sa ebanghelyo. Karon, human sa 10 ka tuig, kining mao nga tawo ug ako suod gihapon nga managhigala—ug nagpadayon ko sa pagpugas sa mga binhi sa kamatuoran, nga nagalaum nga usa ka adlaw anaa siya sa gingharian sa langit.

Kita gisultihan pinaagi sa Inspirasyon nga si Cristo mihimo ug dakong paningkamot niining gitumong nga klase sa mga tawo—ug kita usab gipakita kon giunsa Niya sila pagkab-ot. Si Jesus “nangita ug kaila nga adunahan ug edukado nga Pariseo, sa Judeong halangdon, ug sa Romanong magmamando. Siya midawat sa ilang mga inbitasyon, mitambong sa ilang mga kombira, mihimo sa Iyang kaugalingon nga pamilyar sa ilang mga interes ug mga trabaho aron Siya makaangkon ug agianan sa ilang mga kasingkasing, ug makapadayag ngadto kanila sa dili madunot nga mga bahandi.”⁵

Mga Gagmay nga kadalanan

Kita usab gisultihan sa pagkab-ot niadtong anaa sa “mga kadalanan” o “mga kasiklatan.” Namulong gikan sa panahon ni Moises, ang Biblia naghigot “ang dumuloong, ug ang ilo, ug ang balo nga babaye, nga anaa sa sulod sa imong mga ganghaan, moabut, ug mokaon, ug mabusog” (Deuteronomio 14:29). Ang inspirasyon nagsulti kanato, “dili lamang kita maghunahuna sa mga bantugan ug batid nga mga tawo, ngadto sa pagpasagad sa mas kabus nga mga hut-ong. Si Cristo nagpahimangno sa Iyang mga mensahero sa pag-adto usab niadtong anaa sa mga kadalanan ug mga kasiklatan, ngadto sa mga kabus ug mga timawa sa yuta. Diha sa mga korte ug mga agianan sa dagkong mga ciudad, sa mingaw nga mga agianan sa nasud, anaa ang mga pamilya ug mga indibiduwal—tingali mga stranghero sa usa ka langyaw nga yuta—kinsa walay relasyon sa simbahan, ug kinsa, sa ilang kamingaw, mibati nga ang Dios nakalimot kanila.”⁶

Pagwagtang sa Atong Mga Pagpihig

Isip usa ka batan-on, nag-canvass ako mga lima ka oras kada adlaw aron makatabang sa pagbayad sa akong gipuyan ug tuition sa eskwelahan. Ang among magtutudlo mitudlo kanamo ug daghang maayong mga baruganan nga makita sa samingay sa dakong panihapon. Ang usa mao nga kinahanglan natong i-canvass ang tanan nga mga klase sa mga kasilinganan, dili lamang ang mga lugar kung diin kita nakahimo sa daghang halin. Usa ka adlaw moadto kami sa mga dato, sa sunod nga adlaw sa tungatunga nga klase ug sa laing adlaw sa mga kabus nga kasilinganan.

Samtang nag-canvass sa usa ka kabus nga kasilinganan usa ka adlaw, ako adunay usa ka makapalamdag nga kasinatian. Sa dihang nagkaduol na sa atubangan nga pultahan, akong namatikdan ang pipila ka mga butang nga nagpadayag sa pipila ka basis nga mga kinaiya nga nagpuyo niini nga balay. Tungod kay nagdako ako sa mas dako nga Los Angeles, California, nakaila ako sa usa ka mabangis nga baho—sa pag-abli sa pultahan, nakita nako ang usa ka grupo sa mga lalaki sa sala nga nag-inom ug alkohol ug nanigarilyo ug marijuana. Ako usab nailhan ang mga kolor ug klase sa sinina nga gisul-ob nga lagmit mga membro kini sa gang. Sa pagsugod sa akong canvass, ang una nakong gihunahuna mao nga sultihan ko, “Dili interesado!” ug ang pultahan mobunal sa akong nawong.

Apan dili ingon niini ang nahitabo. . . Nakahimo ako sa pagcanvass sa tanan nga upat o lima ka libro nga akong gikuptan samtang ang tawo mapailubon nga naminaw. Sa dihang nahuman na ako, miingon siya, “Kadiyot lang,” ug mibalik nga may dala nga \$20 nga kwartang papel, nga nag-ingon, “Kuhaon ko kana,” nga nagtudlo sa usa ka spirituhanong libro. Sa dihang miadto ko aron ihatag kaniya ang iyang sukli (kay niadtong mga panahona ang mga libro \$10 ra,) siya miingon, “Imoha na ang sukli, ipadayon ang pagbuhat nga imong gibuhat, ug panalangin ka sa Dios!”

Samtang mibiya sa maong balay, akong gipamalandong ang bililhon kaayong leksyon nga akong nakat-onan. Sa una nakong pag-abot sa balay, aduna koy gihunahuna nang daan. Ilabi na sa dihang giablihan ang pultahan, naghunahuna ko, “Nganong nanuktok ko niini nga pultahan? Kining mga tawhana klaro nga nagbuhat ug mga butang nga supak sa Dios ug sa Iyang pulong, busa nganong mag-usik man ako sa akong panahon ug sa ila pinaagi sa pagpaambit ug usa ka butang nga dili sila interesado? Apan wala gayud gisulti ang Biblia kanato nga adunay ingon niana nga mga ideya bahin sa mga kalag. Kini yanong nag-awhag kanato sa pagpangita ug pagluwas sa nawala (Lucas 19:10). Samtang gitudloan kami ug mahinungdanon nga mga butang mahitungod sa canvassing, sama sa pagsul-ob ug maayo nga sinina, pagkahibalo pag-ayo sa among canvass ug pagpabiling maayong pagkontak sa mata, nagtuo ko nga nakadayeg kini sa tawo. Tingali siya naghunahuna, “Mao kini ang paagi nga angay nakong buhaton ang akong kinabuhi,” o lagmit, “Tugoti ko nga suportahan kining batan-ong lalaki, kay anaa siya sa hustong dalan.” Ako usab nagtuo nga ang usa ka binhi gitanom uban sa libro—ug nga siya mismo gusto nga moadto sa husto nga dalan.

“Ang Dios mihatag ug pinasahi nga



Ako adunay hunahuna, “Ngano nga akong sayangan ang akong panahon ug ang ilaha pinaagi sa pagpakig-ambit sa usa ka butang nga sila dili interesado?” Apan wala ang Biblia masukad magsulti kanato nga magbaton nianang una nang namugna nga mga ideya mahitungod sa mga kalag, kini yano nga nag-awhag kanato sa pagpangita ug pagluwas sa nawala.

mando nga atong tagdon ang dumuloong, ang sinalikway, ug ang kabus nga mga kalag nga huyang sa moral nga gahum. Daghan nga makita nga bug-os nga walay pagtagad sa relihiyoso nga mga butang anaa sa kasingkasing nga nangandoy sa kapahulayan ug kalinaw. Bisan tuod sila naunlod ngadto sa kahiladman sa sala, adunay posibilidad sa pagluwas kanila. . . .

“Sultihi ang mga kabus nga nawad-an sa paglaum nga nahisalaag nga sila dili kinahanglan nga mawad-an sa paglaum. Bisan sila nasayup, ug wala makatukod ug usa ka matarung nga kinaiya, ang Dios adunay kalipay sa pagpasig-uli kanila, bisan ang kalipay sa Iyang kaluwasan. Siya nahimuot sa pagkuha sa dayag nga walay paglaum nga materyal, niadtong pinaagi kang Satanas nagtrabaho, ug naghimo kanila nga mga sakop sa Iyang grasya. Siya nalipay sa pagluwas kanila gikan sa kaligutgut nga moabut sa ibabaw sa mga masupilon. Sultihi sila nga adunay kaayohan, paghinlo alang sa matag kalag. Adunay usa ka dapit alang kanila diha sa lamesa sa Ginoo. Siya naghulat sa pagabi-abi kanila.”⁷⁷ Pagkanindot nga pagpadasig samtang atong sugdan kini nga buluhaton! Ang Dios gusto nga gamiton kamo ug ako sa pagpahat sa Iyang ebanghelyo aron Iyang mapahiuli ngadto sa Iyang kaugalingong dagway ang mga tawo sama sa tawo sa storya sa ibabaw, ug naghulat Siya nga hatagan sila ug dapit sa Iyang lamesa samtang sila motubag sa Iyang tawag sa pagdapit.

Lain pa diha sa “Mga Kadalanan” o “Mga kasiklatan”

Laing pinasahi nga storya bahin sa usa ka hinigugma nga kalag sa “mga kasiklatan” miabut sa ulahi sa dihang nanguna ako sa usa ka colporteur nga programa sa estado sa Washington. Adunay usa ka batan-ong babae nga

ginganlag Daisy sa programa (tugoti ako sa paggamit sa iyang unang ngalan). Naghinamhinam kaayo siya nga makasinati ug makakat-on ug canvassing, kay unang higayon pa niya kini. Siya adunay tinguha sa pagkab-ot sa mga kalag — ug samtang ang mga canvasser makatipig ug bahin sa ilang kinitaan, siya usab naghinamhinam nga makakwarta aron makaadto sa eskwelahan sa misyonaryo.

Usa ka adlaw samtang nagcanvass kaming tanan, nasurprisa ako sa pagkakita ni Daisy nga hilabihan ka hinam ug gani nalipay. (Siya sa kasagaran hilomon ug kalmado.) Nahitabo nga siya adunay nindot nga kasinatian uban sa usa ka babaye kinsa bag-o lang mipalit ug pipila ka mga libro pinaagi sa paghatag kaniya ug usa ka supot sa pagkaon nga puno sa salapi aron ibayad alang kanila. Sa kinatibuk-an adunay gibanabana nga \$350 sa bag sa nagkalainlaing bili sa kwarta nga papel. Sa katingala, ang ubang mga canvasser nangutana kang Daisy kabahin niining babaye. Dato ba siya?

“Dili,” tubag ni Daisy. “Siya mao ang baliktad niini, ug wala siya nagpuyo sa labing maayo nga mga kahintang.” Niadtong higayona, nakaplano ako sa pagduaw sa babaye aron pasalamatan siya sa dakong kontribusyon sa pagtabang kang Daisy ug sa pagtan-aw kon makuha ba nako ang iyang inpormasyon sa pagkontak aron ang lokal nga pastor maka-follow up kaniya. Samtang gipaambit ni Daisy ang nahimutangan sa balay, miparada ako tabok sa kalsada sa usa ka gubaon nga balay ug milakaw paingon sa pultahan. Diha sa atubangan sa balkonahe mao ang usa ka walay sapin, hugaw nga batan-ong babaye mga 12 anyos, nagtan-aw sa pipila ka mga libro nga bag-ong napalit sa iyang inahan pinaagi ni Daisy.

Samtang gihangyo ang babaye

nga makigsulti sa iyang inahan, ang pultahan nga abli, usa ka babaye nga kuwestiyonableng tan-awon ang reputasyon ug trabaho miduol sa pultahan, nga nangutana kon kinsa ako. Samtang nagpasalamat ako niya sa dako nga kontribusyon sa among igsoon nga si Daisy, mahanduraw nimo ang mga hunahuna sa akong hunahuna. Nganong kini nga babaye — sa tanang tawo — mihatag ug dako kaayong donasyon kang Daisy, ug nganong interesado man siya sa mga libro o sa spirituwal nga mga butang?

Natubag dayon ang akong mga pangutana. . . . Ako nangutana kaniya kon mahimo ba ako magbilen ug dugang nga mga libro, tungod kay kami adunay uban nga wala niya madawat, ilabina kay siya adunay igo nga donasyon. Ako nangutana usab kon makuha ba nako ang iyang kontak nga numero aron ang lokal nga pastor makatanyag ug pag-ampo, pagtuon sa Biblia, ug uban pa.

Siya mitubag nga dili niya ihatag ang iyang numero alang sa mga pagtuon sa Biblia, ug uban pa, apan nga iya kining itagana alang sa usa ka butang: Siya misulti kanako nga nakadayeg kaayo siya sa atong igsoong babaye nga si Daisy, sa iyang pamatasan, ug sa iyang tinguha sa pagsunod sa Dios ug sa pag-adto sa misyonaryong eskwelahan, nga isip nag-inusarang ginikanan gusto niya ang samang butang alang sa iyang anak nga babaye. Gusto niya nga dawaton nako ang iyang anak sa canvassing nga programa. Sa akong pagpahibalo kaniya nga ang iyang anak nga babaye gamay pa kaayo, misaad ko nga kami bisan pa niana iapil siya — ug moanhi aron sa pagkuha kaniya — aron mouban kanamo samtang manglakaw sa lainlaing laag sa panahon nga walay trabaho.

Ang babaye nagsulti kanako sa paghulat, samtang siya mipadayon sa pagsulod sa balay aron sa pagkuha ug laing



Ang katapusang mensahe sa pasidaan ug kalooy maoy modan-ag sa tibuok kalibutan uban sa iyang himaya. Kini moabot sa tanang klase sa mga tawo datu, kabus, halangdon, ug ubos nga kahimtang. “Umadto ka sa kadalanan ug siniklatan,” si Cristo miingon, “ug pugsa sila sa pag-anhi, aron ang Akong balay mapuno.”

supot sa pagkaon nga puno sa kuwarta (laing \$350 nga gibanabana). Samtang ako mobiya na sa programa sulod sa usa ka semana nianang gabhiona, gisultihan ko ni Daisy ug niadtong nahabilin nga nagdumala nga ilang nakuha ang babaye sa makaduha aron iapil siya sa lainlaing mga laag ug nga ang binhi sa ebanghelyo natanom.

Samtang akong gihunahuna pag-uab kini nga storya nahinumdom ko sa storya ni Maria Magdalena samtang didto sa balay ni Simon. Kini nga babaye, sama ni Maria, andam nga mohatag sa tanan nga anaa kaniya alang sa usa ka higayon nga makaangkon sa mahangturong katigayunan sa grasya sa gingharian sa Dios alang sa iyang anak nga babaye. Sa pagbiyahe diha sa atong panaw, samtang kita makahimamat sa uban sa mga ka kasiklatan sama niini nga babaye ug sa lalaki sa miaging storya, kinahanglan natong pangutan-on ang atong kaugalingon, “Ako ba, kita ba, sama ni Simon nga Pariseo, puno sa paghukom ug panghimaraut—o sama ba kita kang Cristo?”

“Ang tagbalay mitalikod gikan niadtong nagtamay sa iyang kadagaya, ug nagdapit sa usa ka klase nga wala mabusog, kinsa walay mga balay ug mga yuta. Siya nagdapit niadtong mga kabus ug gigutom, ug kinsa mopasalamat sa mga gasa nga gihatag. ‘Ang mga maniningil sa buhis ug ang mga bigaon,’ si Cristo miingon, ‘mag una kaninyo sa pag-adto sa gingharian sa Dios’ (Mateo 21:31). Bisan unsa pa

ka alaut ang mga matang sa katawhan nga gi daugdaug ug gisalikway sa mga tawo, dili sila ubos kaayo, alaut kaayo, alang sa pagtagad ug gugma sa Dios. Si Cristo nangandoy nga adunay mga tawo nga gikapoy, sinalikway, gidaugdaug nga moduol kaniya. Ang pinaka mga makasasala mao ang tumong sa Iyang lawom, mainitong kalooy ug gugma.”⁸

Panapos

Hinigugma nga mga kaigsoonan, ug mga batan-on! Tubagon ba nimo ang tawag sa pagpangita ug pagluwas sa nawala? Ang pagdapit sa ebanghelyo ihatag ngadto sa tibuok kalibutan—“sa matag nasud, ug kaliwatan, ug pinulongan, ug katawhan” (Bugna 14:6). Ang katapusang mensahe sa pasidaan ug kalooy mao ang pagpadan-ag sa tibuok yuta sa iyang himaya. Kini aron maabot ang tanang klase sa mga tawo—dato, kabus, taas, ug ubos. “Panggula kamo ngadto sa mga kadalanan ug sa mga kasiklatan,” miingon si Cristo, “ug pugsa sila sa pagsulod, aron ang Akong balay mapuno” (Lucas 14:23). Usa sa labing maayong paagi sa pagtuman niini nga tawag mao ang pagpadala sa inyong mga anak, apo, pag-umangkon nga lalake, ug pag-umangkon nga babaye sa mga programa sa colporteur ug misyonaryong mga eskwelahan, diin sila mabansay sa pagpaambit sa ebanghelyo uban ang kaisog ug gugma. Kamo, usab, mahimong mapanalanginan ug makatuman sa inyong pagkatinawag pinaagi sa pagtukod ug

mga relasyon uban niadtong anaa sa inyong komunidad—bisan sila adunahan nga mga propesyonal, nanlimbasug nga mga silingan, o bisan kinsa nga layo sa pagtuo—pinaagi sa pagpakita sa gugma ni Cristo pinaagi sa mabination nga mga lihok, praktikal nga tabang, mga pulong sa paglaum, o pinaagi lamang sa pagpaminaw uban ang pagbati. Pagpahat sa mga tinubdan sama sa pagkaon, bisti, o spirituhanon nga literatura, uban niadtong kinsa mahimong nalimtan o sinalikway sa katilingban, ug makiglabig it usab sa mga edukado ug inpluwensyado uban sa mahunahunaon nga mga diskusyon mahitungod sa walay katapusan nga mga kamatuoran. Pinaagi sa pagpakig-uban sa tanang tawo, sama sa gibuhat ni Cristo, atong makuha ang ilang pagsalig ug madapit sila sa Dakong Panihapon.

Hinaut nga ang Ginoo mogamit sa matag usa kanato, pinaagi sa organisado nga mga paningkamot ug personal nga pagsaksi, sa pagtuman sa Dakong Sugo (Mateo 28:19, 20) ug mahimong kahayag sa kalibutan samtang kita moadto, nga magdapit sa uban ngadto sa Dakong Panihapon. Amen! *R*

Mga Reperensya:

¹ *Christ's Object Lessons*, pp. 222, 223.

² *Ibid.*, p. 226.

³ *Ibid.*, pp. 229, 230.


⁴ *The Ministry of Healing*, p. 143.

⁵ *Ibid.*, pp. 24, 25.

⁶ *Christ's Object Lessons*, pp. 232, 233.

⁷ *Ibid.*, p. 234.

⁸ *Ibid.*, pp. 225, 226.



“ANG IMONG PAGTUO MAOY NAKAAYO KANIMO”

NI RICARDO GAIYE — ANGOLA

“‘Kon makahikap lang ako sa Iyang bisti, mamaayo ako.’ Mateo 9:21. Usa ka kabus nga babaye ang misulti niining mga pulonga—usa ka babaye nga sulod sa dose ka tuig nag-antus sa usa ka sakit nga naghimo sa iyang kinabuhi nga usa ka palas-anon. Siya migasto sa tanan niyang kinitaan sa mga mananambal ug mga tambal, apan gipahayag nga walay kaayohan. Apan sa pagkadungog niya kabahin sa Dakong Mananambal, nabuhi pag-usab ang iyang paglaum. Naghunahuna siya, ‘Kon makaduol lang unta ako aron makigsulti Kaniya, mamaayo unta ako.’

“Si Cristo nagpadulong sa balay ni Jairo, ang Judeo nga rabbi kinsa nangamuyo Kaniya sa pag-anhi ug ayohon ang iyang anak nga babaye. Ang masulub-on nga pangamuyo, ‘Ang akong gamay nga anak nga babaye nag-ungaw sa kamatayon: Ako nagahangyo Kanimo, umari ka ug ipandong ang imong mga kamot kaniya, aron siya mamaayo’ (Marcos 5:23). natandog ang

malumo, mabinationong kasingkasing ni Cristo, ug dihadiha milakaw Siya uban sa magmamando ngadto sa iyang puloy-anan.

“Sila miabante apan sa hinayhinay; kay ang panon sa katawhan midutdot kang Cristo sa tanang kiliran. Sa paghimo sa Iyang agianan latas sa panon sa katawhan, ang Manluluwas miduol sa dapit diin ang sinakit nga babaye nagtindog. Sa makadaghan misulay siya sa pagpaduol Kaniya. Karon ang iyang kahigayonan miabut na. Wala na siya makakita ug paagi sa pagpakigsulti ngadto Kaniya. Siya wala magtinguha sa pagbabag sa Iyang hinay nga pag-abante. Apan siya nakadungog nga ang pagkaayo gikan sa paghikap sa Iyang mga bisti; ug, nahadlok nga mawad-an siya ug usa ka higayon alang sa kahupayan, siya mipadayon sa unahan, nag-ingon sa iyang kaugalingon, ‘Kon makahikap lang ako sa Iyang sapot, mamaayo ako.’

“Si Cristo nahibalo sa matag handom sa iyang hunahuna, ug nagpaingon Siya sa

iyang gibarugan. Siya nakaamgo sa iyang dakong panginahanglan, ug Siya mitabang kaniya sa pagpakita ug hugot nga pagtuo.

“Samtang Siya miagi, siya mikab-ot sa unahan ug milampos sa paghikap sa sidsid sa Iyang sapot. Nianang higayona siya nahibalo nga siya naayo na. Niana nga usa ka paghikap mikonsentrar ang pagtuo sa iyang kinabuhi, ug dihadiha dayon ang iyang sakit ug kahuyang nawala. Dihadiha iyang gibati ang kahinam sama sa usa ka kuryente nga miagi sa matag lanot sa iyang pagkatawo. Miabot kaniya ang pagbati sa hingpit nga panglawas. ‘Nabati niya sa iyang lawas nga naayo siya niana nga hampak.’ Bersekulo 29.

“Ang mapasalamaton nga babaye nagtinguha sa pagpahayag sa iyang pasalamat ngadto sa Makagagahum nga Mananambal, kinsa nakahimo ug labaw pa alang kaniya sa usa ka paghikap kay sa gibuhat sa mga mananambal sulod sa napulog duha ka taas nga mga tuig; apan

siya wala mangahas. Uban sa mapasal-amaton nga kasingkasing siya misulay sa pagpahilayo gikan sa panon. Sa kalit lang mihunong si Jesus, ug milingi-lingi Siya nangutana, 'Kinsa ang mihikap Kanako?'

"Sa nagtan-aw Kaniya sa katingala, si Pedro mitubag, 'Magtutudlo, ang panon sa katawhan nagponisok Kanimo ug nagapiit Kanimo, ug ikaw nagaingon, Kinsa ang mihikap Kanako?' Lucas 8:45.

"'Adunay mihikap Kanako,' miingon si Jesus; 'kay akong nasabtan nga ang hiyas migula gikan Kanako.' Bersikulo 46. Siya makaila sa paghikap sa pagtuo gikan sa kaswal nga paghikap sa walay pagtagad nga panon. Adunay mihikap Kaniya sa lawom nga katuyoan ug nakadawat ug tubag.

"Si Cristo wala nangutana sa pangutana alang sa Iyang kaugalingon nga inpormasyon. Siya adunay leksyon alang sa mga tawo, alang sa Iyang mga tinon-an, ug alang sa babaye. Siya buot nga modasig sa mga sinakit uban sa paglaum. Siya buot nga mopakita nga ang hugot nga pagtuo maoy nagdala sa gahum sa pag-ayo."¹

Akong Kasinatian sa Kilid sa Higdaanan

Niadtung 1996, grabe ang akong sakit—nga halos magbitay na ang akong kinabuhi sa usa ka lanot - ug andam nga moadto sa bisan unsang publiko o pribado nga ospital, bisan pa sa ilang pagsalig sa naandan nga medikal nga praktis nga sagad gipasukad sa spirituhanon nga mga tradisyon. Sa probidensya, nakaadto ako sa usa ka institusyon sa kahimsog kansang mga suga nagsiga aron maduol adlaw ug gabii. Didto ko nagpapabilin ug kapin sa usa ka tuig.

Niini nga institusyon, ang girekome-dar nga dalan padulong sa pagkaayo ingon nga gipraktis lahi sa akong gilauman. Sa unang pipila ka bulan, ang reseta mao ang pagkaon sa hilaw nga pagkaon, pagtuon sa pulong sa Dios, ug pagpaminaw sa mga lektura. Dul-an sa tunga sa tuig ang milabay, pagkahuman nga ang mga kawani una nga nakatumong sa pag-ayo sa akong kalag sa katapusan miabut ang pagkaayo sa pisyolohikal nga nagtubag sa duha ka nag-unang mga problema nga nagdala kanako niini nga institusyon sa una nga higayon.

Ako anaa didto ug sa samang higayon ingon nga usa ka bata nga pasyente nga giubanan sa iyang lola. Ang iyang medikal nga kahimtang makalilisang. Siya anaa sa usa ka kritikal nga kahimtang, dili makalihok o makaatiman sa iyang kaugalingon, nga nanginahanglan ug kanunay nga pagtagad. Sa katapusan nga mga adlaw sa iyang kinabuhi, ang batan-ong babaye

nagpabilin nga naghigda, nakadawat ug pag-atiman ug suporta samtang siya nag-antus sa hilabihan ka grabe nga mga komplikasyon sa panglawas.

Ang iyang lola, kinsa usa ka main-ampoon kaayo nga tawo, mihalak diha sa sabakan sa iyang apo nga babaye. Ang batan-ong babaye dayag nga nangayo ug tabang sa halos tanang dagkong ospital ug mikuha na sa tanang tambal nga anaa, apan wala gihapon niya mabuntog ang kondisyon nga iyang giatubang. Isip kata-pusang paagi, ang lola karon kusganong mipahayag ngadto sa batan-ong babaye nga kinahanglan niyang ikumpisal ang iyang mga sala ngadto sa Dios, desperado nga nangatarungan sumala sa panultihon sa Biblia nga "ang tunglo dili moabot nga walay hinungdan" (Proverbio 26:2, kata-pusang bahin).

"Si Satanas mao ang sinugdanan sa sakit; ug ang mananambal nakiggubat batok sa iyang buhat ug gahum. Ang sakit sa hunahuna mopatigbabaw bisan asa. Siyam sa ikapulo nga bahin sa mga sakit nga gi-antus sa mga tawo adunay ilang patukor-anan dinhi. Tingali ang uban nagpuyo nga masamok sa panimalay, sama sa usa ka grabe nga hubag, nga mokaon sa mismong kalag ug makapaluya sa mga puwersa sa kinabuhi. **Ang pagbasol sa sala usahay makapahuyang sa konstitusyon** ug makabalda sa hunahuna."²

Ang kinasingkasing nga pangaliya sa debotadong lola dayag nga nakahatag ug tubag sa kasingkasing sa batan-ong babaye. Sa kalit, sa kakurat sa tanan, ang pasyente prangka nga mipahayag sa usa ka paghulagway sa usa ka grabe nga buhat nga iyang nahimo sa iyang kinabuhi nga sa dayag nga pagsupak sa Dios. Isip resulta niana nga kinaiya sa iyang pagka-batan-on, gibati niya nga daw nag-antus siya ubos sa dakong tunglo nga misangpot sa iyang kaugalingon niining pisikal nga sakit. Taudtaud na siyang naglaum nga mamaayo pinaagi sa tambal, apan misa-mot hinuon ang iyang kahimtang.

Karon ang batan-ong babaye mibati sa panginahanglan sa pag-atubang sa kamatuoran mahitungod sa kadautan nga dugay nang nagsamok sa iyang kalag—nag-ila sa iyang dakong panginahanglan kang Cristo, ang bugtong Manluluwas sa mga makasasala. Niining higayona, kadtung nakadungog sa iyang makasusubo nga kasaysayan mainitong nag-ampo alang kaniya.

Adunay usa ka leksyon nga makuha gikan niini nga kasinatian:

"Ang mananambal nagkinahanglan ug labaw pa kay sa tawhanon nga kaalam ug gahum aron siya makahibalo unsaon sa pagpangalagad sa daghang makalibog nga mga kaso sa sakit sa hunahuna ug kasing-kasing diin siya gitawag sa pag-atubang.

Kon siya walay alamag sa gahum sa di-osnon nga grasya siya dili makatabang sa usa nga sinakit, kondili makapasamot sa kalisdanan; apan kon siya adunay hugot nga pagkupot sa Dios siya makahimo sa pagtabang sa masakiton nga hunahuna. Siya makahimo sa pagtudlo sa iyang mga pasyente ngadto kang Cristo ug makatudlo kanila sa pagdala sa tanan nilang mga kabalaka ug mga kalibog ngadto sa dakong Tigdala sa Palas-anon.

"Adunay usa ka balaanong gitudlo nga koneksyon tali sa sala ug sa sakit. Walay mananambal ang makapraktis sulod sa usa ka bulan nga dili makakita niini nga gihulagway. Mahimo niyang ibaliwala ang kamatuoran; ang iyang hunahuna mahimong okupado kaayo sa ubang mga butang nga ang iyang pagtagad dili masentro niini; apan kon siya magmabinantayon ug magmatinuoron dili siya makapugong sa pag-ila nga ang sala ug sakit nagdala sa usag usa sa relasyon sa hinungdan ug epekto. Ang doktor kinahanglan nga dali nga makakita niini ug molihok sumala niana. Sa dihang naangkon na niya ang pagsalig sa mga sinakit pinaagi sa paghupay sa ilang mga pag-antus ug pagpabalik kanila gikan sa ngilit sa lubnganan, mahimo niyang tudloan sila nga ang sakit mao ang resulta sa sala ug nga ang nahulog nga kaaway mao ang nagtinguha sa pagdani kanila ngadto sa mga buhat nga makadaut sa panglawas ug kalag. Siya mahimong makadani sa ilang mga hunahuna sa panginahanglan sa pagdumili sa kaugalingon ug sa pagsunod sa mga balaod sa kinabuhi ug kahimsog. Sa mga hunahuna sa mga batan-on ilabina mahimo niyang isil sil ang hustong mga prinsipyo. Ang Dios nahigugma sa Iyang mga binuhat nga adunay gugma nga malumo ug kusgan. Siya nagtukod ug mga balaod sa kinaiyahan, apan ang Iyang mga balaod dili pagpamugos. Matag 'Dili ka,' sa pisikal o moral nga balaod, naglangkob o nagpasabut ug saad."³

Human ang batan-ong babaye sa institusyon misugid sa iyang mga sala ngadto sa Dios, imong makita ang lawom nga kalinaw sa iyang nawong. Kitang tanan nakaamgo nga kini nga kalinaw wala maggikan sa sulod niya. Kini miabut pinaagi nianang langitnong kalinaw nga makaplagan lamang diha kang Jesu Cristo.

Oo, paglabay sa pipila ka panahon, ang mas grabe nga mga sintomas sa iyang pisikal nga kahimtang misugod sa pagkunhod, apan siya miingon: "Karon ako kinahanglan nga mopahulay. Palihug, ako kinahanglan nga mopahulay. Ako kinahanglan nga mopaluhay." Siya milantaw sa tanang pag-antus nga iyang giantus ingon nga resulta lamang sa maong rebelyosong estilo sa kinabuhi, apan karon iyang giila ang katahom ug walay katapusang kaalam sa Usa nga Labing Gamhanan kansang mahigugmaong pag-



Kita sa tinud-anay nakatagamtam niining talagsaong pribilehiyo nga nagantihan uban sa mga pagpanudlo nga anaa sa Espiritu sa Tagna. Niini, ang Ginoo sa kaklaro naghulagway kon unsa ang kanoon, pamisti, mosulti, ug modumala sa atong mga patigayon. Kini nagbaton sa pinakamaayo nga pagbati ug spirituhanong suporta.

atiman siya karon mipahulay. Dili pa dugay namatay siya—nga malinawon, ug sa Iyang malumo nga kalooy.

Ang Plano ni Cristo alang sa Bug-os nga Kaayohan

Si Cristo naghinaminam sa pagdasig sa mga sinakit ug nagpakita nga ang pagtuo diha Kaniya nagdala ug kaayohan ug pagpasig-uli sa kalag ug lawas.

Sa tibuok nga planeta, minilyon nga mga tawo ang nanginahanglan ug tabang, gikan sa pinakayano hangtud sa labing komplikado nga mga kaso. Unsa ang pinakadako nga problema? Ang salmista miila sa Dios sa spirituhanong sukdan: “Walay maayo sa akong unod tungod sa imong kasuko, ni may pahulay sa akong mga bukog tungod sa akong sala” (Salmo 38:3).

Ang kadaghanan nahibalo nga importante ang pagsunod sa usa ka himsog nga pagkaon nga gibase sa prutas, utanon, ug lunsay nga tubig, sa pag-ehersisyo, pagpahulay, pagpainit sa adlaw, paginhawa ug daghang presko nga hangin, ug uban pa. Apan tingali ang labing importante sa tanan mao ang mental ug spirituwal nga kahimsog, nga kitang tanan lagmit nagpasagad niini.

Adunay daghan nga nagsunod sa usa ka higpit nga pagkaon, sa karelihiyoso nagpili sa ilang pagkaon ug sa daghang mga kaso nagdugang ug mga suplemento sa nutrisyon. Ang uban sayo nga momata sa buntag—ug daghan bisan sa dili pa matulog—aron mag-ehersisyo. Bisan pa niana sila nagpakaon sa garbo, kakawangan, kailibgon, kawalay pagtagad, ug pagtamay sa uban, wala magtagad sa labing maayo nga pisikal nga ehersisyo sa kalibutan (misyonaryo nga buhat—ang ebanghelyo uban sa atong mga tiil sa yuta—naglakaw, naglakaw nga paspas, nagdagan aron sa pagdala sa ebanghelyo.)

Ug aduna pay kadtong mga nabalaka nga matulog ug sayo aron maatiman ang

ilang mga lawas ug ang ilang emosyonal nga kaayohan, nga, siyempre, husto ug dili sayop. Bisan pa taliwala sa ilang trabaho, negosyo, o pagtuon, ang tanan nga intelektuwal nga kalihokan mahimo nga gipalihok sa usa ka hakog, hakog nga ambisyon alang sa ganansya ug kalipayan niining lumalabay nga kalibutan. Dili sila andam nga mohimo sa samang mga sakripisyo kon bahin sa misyonaryo nga buhat, pagsuporta sa mga baldado, mga masakiton, ug niadtong naapektuhan sa kasakit sa kamatayon o mga katalagman. Uban sa ingon nga mga batasan, sa daghang dili mabag-o nga mga kaso, sila kasagaran nga makaangkon sa duha mubo ug taas nga termino - sa kasakit, ingon man sa pisikal, mental, ug spirituhanon nga mga sakit alang sa ilang kaugalingon.

Ang tinuod nga tinubdan sa pisikal, mental, ug spirituhanong kahimsog mao ang Dios, ang mahigugmaong Amahan, ug si Jesus, ang bantugang Mananambal. Ang koneksyon sa hunahuna sa tawo uban sa hunahuna ni Cristo nga nagdala ug kusog sa hunahuna, kalag, kaugatan, ug mahinungdanon nga mga organo, naghatag usab ug kalagsik sa tibuok nga lawas - sa ingon malikayan ang sakit ug pag-ayo sa masakiton nga mga lawas.

Pag-ugkat sa Apdo sa Kapaitan

Ingon nga colporteur, ako gidapit sa paghatag ug pakigpulong sa sentro sa pag-imprenta sa usa ka dakong nasudnong bangko. Akong gipresentar ang atong mga libro ngadto kanila, lakip na ang libro, Mga Lakang Ngadto Kang Cristo (Steps to Christ). Sa pagtapos sa pakigpulong, gidala ako sa direktor sa departamento ngadto sa iyang opisina ug gipailaila ako sa usa ka niwang, anemic nga batan-ong lalaki nga taas ug buhok, nadaut ang panagway, ug usa ka tumor sa iyang tuhod—nga nagkiangkiang ug

naglihoklihod uban sa dakong kahasol. Siya nag-antus sa kasa-kit sa dughan ug sa likod.

Ako siyang gipangutana kung nga-nong anaa siya niini nga kahimtang, ug siya misulti kanako nga siya nagpuyo uban sa iyang amahan ug inahan ug sa iyang tulo ka manghod nga lalaki. Unya, sa dihang grabeng nasakit ang iyang amahan ug sa katapusan namatay, usa sa suod nga higala sa amahan mihiphip sa mga awtoridad ug gipeke ang mga dokumento alang sa balay nga gipuy-an sa ilang pamilya sa sentro sa ciudad, nga nangangkon sa korte nga iya ang balay. Ang korte miuyon ug ilang gipapahawa ang tibuok pamilya diha sa dalan.

Kining alaut nga pamilya karon wala nay maadtoan, ug bisan ang ilang mga paryente wala na magtagad sa pagkahibalo bahin kanila. Sa kadugayan, usa ka tawo ang miabut nga wala nila damha ug nakitan sila sa usa ka karaan nga payag tupad sa usa ka merkado, diin sila nagsugod sa pagpuyo sa makalilimos nga kinabuhi.

Kining makapahigawad nga kasinatian nakapukaw sa pagbati sa kasuko sa batan-ong lalaki. Ang iyang tulo ka igsoong lalaki kinahanglang mobiya sa ilang pagtuon tungod sa kakuwang sa panalapi; ang iyang inahan nag-antus ug sikolohikal (psychological) nga krisis, hypertensive crisis, ug pagkawala sa panan-aw—dugang pa, tungod niini nga trauma, usa ka igsoon nga lalaki ang nag-antus sa epilepsy. Karon, bisan tuod kining batan-ong lalaki, usab, nasa-kit, siya ra ang makahatag sa iyang pamilya bisan sa gamay nga suporta. Tungod sa iyang maluyahon nga panglawas siya kinahanglan mobiya sa unibersidad ug walay kompanya nga modawat kaniya sa pagtrabaho.

Dayon ang nagdumala o manager sa bangko, usa ka mabinationg tawo nga adunay buotan nga kasingkasing, midapit kaniya sa pagtrabaho uban kaniya

sa iyang departamento—sa paghinlo sa mga papeles ug mga kahon ug sa pag-atiman sa mga basura. Sa katapusan sa bulan, sa matag higayon nga ang manager makadawat sa iyang suweldo, siya mohatag ug gamay niini nga batan-ong lalaki. Ang batan-ong lalaki miingon nga naghulat siya alang sa operasyon sa iyang tuhod, tingali aron putlon ang iyang bitiis, apan kana nga adlaw wala moabut, tungod sa kakulang sa mga kapanguhaan. Mao nga gipailaila nako siya kang Jesu Cristo, ang Ginoo nga nag-ayo sa kalag. Mapasalamaton siya ug gikuha ang libro aron basahon. Paglabay sa usa ka semana, gipailaila nako siya sa kapasayloan ni Cristo, ug uban sa mga luha sa iyang mga mata, natural niyang gidawat kini. Dayon akong gihangyo siya nga pasayloon ang tawo nga nagpakaulaw sa iyang pamilya.

“Unsaon nako pagpasaylo sa usa nga nagdala ug daghang kaalautan kanako, sa akong inahan ug sa akong mga ig-soon?” nangutana siya. Gihangyo ko siya nga tugotan ang Dios nga molihok sa iyang kasingkasing ug itugyan kini nga pakigbugno sa Ginoo.

Paglabay sa pipila ka panahon, sa katapusan misugot siya nga mopasaylo. Miipauli ko ug gisultihan ang akong asawa, nga nagtuon ug medisina niadtong panahona. Nagkuha siya ug balde, nag-andam ug yutang kolonon nga dad-on, dugang pa nga mga sako sa uga nga yutang kolonon ug pipila ka repolyo ug mga sibuyas. Amo kining gidala tanan sa balay sa batan-ong lalaki. Misugod siya sa pagbutang ug yuta sa tuhod sa batan-ong lalaki ug mihatag kaniya ug mga instruksyon gikan sa Espiritu sa Tagna mahitungod sa paglikay sa makadaut nga mga pagkaon ug sa abunda nga paggamit sa presko, natural, gibase sa tanom nga pagkaon. Sa samang panahon kami naghatag tambal sa iyang igsoon ug inahan.

Oo, ang Ginoo naggamit sa natural nga mga tambal isip mga ahensya sa pagpang-ayo, apan usa ka mahinung-danong elemento sa proseso sa pagpahiuli mao ang kanunay nga makaamgo sa mosunod:

“Usa sa labing kasagarang mga sala, ug usa nga giubanan sa labing makadaot nga mga sangputanan, mao ang pagpatuyang sa usa ka dili mapasayloon nga spiritu. Pila ang nagbaton sa kasuko o pagpanimalos ug unya moyukbo sa atubangan sa Dios ug mangayo nga pasayloon sama sa ilang pagpasaylo. Sigurado nga wala silay tinuod nga pagbati sa ka importante niini nga pag-ampo o dili sila mangahas sa pagdala niini sa ilang mga ngabil. Kita nag-salig sa mapasayloon nga kalooy sa Dios matag adlaw ug matag takna; unsaon man nato sa pagmanggad sa kapait ug malisya ngadto sa atong mga isigka makasasala!”⁴

Ang labing Adunay Pribilehiyo sa Yuta

Kita ang adunay pinakapribilehiyo nga mga tawo sa kasaysayan sa kalibutan. Nagpuyo kita sa panahon sa labing dakong balaanong kahayag uban sa Biblia ug sa Espiritu sa Tagna. Kita sa tinuod nakatagamtam gayud sa talagsa-ong pribilehiyo nga nagantihan sa mga pagtulon-an nga anaa sa Espiritu sa Tagna. Diha niini, klaro nga gihulagway sa Ginoo kon unsaon nato pagkaon, pag-sinina, pagsulti, ug pagdumala sa atong mga negosyo. Kini naglangkob sa labing maayo nga emosyonal ug spirituhanon nga suporta. Kinahanglan nga mahimong hingpit nga mga trabahante aron ibutyag kini nga mga pagtulon-an sa tanan, isalikway ang paggamit sa sopistikado, subra nga proseso nga mga pagkaon, ug likayan ang mga sukaranan sa kalibutan ug siyentipikong pag-angkon nga wala gisuportahan sa Pulong sa Dios ug sa Espiritu sa Tagna. Kinahanglan natong pangitaon ang lawom nga relasyon sa Dios, ang bugtong hingpit nga Tiggarantiya sa atong pisikal ug psycho-emosyonal nga kaayohan.

Ang Tinuod nga Tinubdan sa Kaayohan

“Ang Manluluwas diha sa Iyang mga milagro mipadayag sa gahum nga padayon nga naglihok alang sa tawo, sa pagpaluyo ug sa pag-ayo kaniya. Pinaagi sa mga ahensya sa kinaiyahan, ang Dios nagabuhat, adlaw-adlaw, oras-oras, matag gutlo, sa pagpadayon kanato nga buhi, sa paglig-on ug pagpasig-uli kanato. Sa diha nga ang bisan unsa nga bahin sa lawas adunay kad-aot, ang proseso sa pag-ayo dihadhiha dayon magsugod sa pagpasig-uli sa kinaiyahan naandam aron mabalik ang kahimsog. Apan ang gahum nga nagabuhat pinaagi niini nga mga ahensya sa kinaiyahan mao ang gahum sa Dios. Ang tanang gahum nga naghatag ug kinabuhi gikan Kaniya. Sa diha nga ang usa maulian gikan sa sakit, ang Dios mao ang nagpahiuli kaniya.

“Balatian, pag-antus, ug kamatayon mao ang buhat sa gahum sa kaaway. Si Satanas mao ang maglalaglag; ang Dios mao ang tigpasig-uli.

“Ang mga pulong nga gisulti ngadto sa Israel tinuod karon niadtong kinsa nakabawi sa kahimsog sa lawas o kahimsog sa kalag. ‘Ako mao si Jehova nga nag-ayo kanimo.’ Exodo 15:26.

“Ang tinguha sa Dios alang sa matag tawo gipahayag diha sa mga pulong, ‘Hinigugma, ako nanghinaut labaw sa tanan nga ikaw unta mouswag ug nga anaa sa maayong panglawas, maingon nga ang imong kalag mouswag.’ 3 Juan 2.

“Siya mao ang ‘nagpasaylo sa tanan

nimong mga kasal-anan; nga nag-ayo sa tanan nimong mga sakit; nga nagtubos sa imong kinabuhi gikan sa kalaglagan; nga nagapurongpurong kanimo sa mahigugmaong-kalolot ug sa malumong mga kalooy.’ Salmo 103:3, 4.”⁵

Niini nga mga storya ug mga tudling, atong makita ang usa ka tin-aw nga kamatuoran: Ang spirituhanong pagkaayo sa kasagaran makahimo ug dako nga kalainan sa pagpasiugda sa pisikal nga pagkaayo. Ang hugot nga pagtuo ug paghinulsol adunay gahum sa paglig-on sa lawas sa talagsaon nga paagi. Ang babaye nga mihikap sa bisti ni Jesus naayo tungod sa iyang pagtuo, nga nagpakita kanato nga kita kinahanglan usab nga moduol Kaniya. Samtang atong ablihan ang atong masakiton sa sala, masulub-on nga kasingkasing aron makadawat sa Iyang kalooy, atong masinati ang kamatuoran nga “kon isugid nato ang atong mga sala, siya manumanon ug matarung nga mopasaylo kanato sa atong mga sala ug magahinlo kanato gikan sa tanang pagkadili matarung” (1 Juan 1:9). “Iyang gipahiuli ang akong kalag: Gitultolan niya ako sa mga dalan sa pagkamatarung tungod sa iyang ngalan” (Salmo 23:3).

Unsa kaha ang makapugong kanimo sa pagtagamtam sa dakong kalinaw nga gitanyag sa Dios? Imo bang gisusi ang imong kasingkasing aron tan-awon kon aduna bay sala nga wala nimo mailhi o usa ka palasanon nga imong gipas-an pa? Tingali ang garbo nagpugong kanimo sa hingpit nga pagsinati sa Iyang grasya. Hunahunaa kini: Unsa ang imong kinahanglan nga buhian aron mamaayo? Unsang tinago nga pakigbisog ang mahimong makapugong kanimo sa pagpangita ug kalinaw? Ang Dios nakakita niining tanan, ug ang Iyang makaayo nga kalooy anaa sa bisan kinsa nga moduol Kaniya uban ang pagpaubos.

Balik ngadto kang Cristo, ang Usa nga nag-ayo sa mga kalag ug lawas. Isugid ang imong mga sala, biyai ang mga bu-tang nga makababag sa imong pagkaayo, pagsalig sa Iyang walay kinutuban nga gahum, ug ikaw makakaplag ug kalinaw ug hingpit nga pagpasig-uli. Siya misaad, “Ako mao ang Ginoo nga nag-ayo kanimo” (Exodo 15:26), ug ang Iyang pulong dili gayud mapakyas. Pangitaa una ang pagkaayo sa kalag pinaagi Kaniya kinsa midala sa Iyang kau-galingon sa atong mga kasakit ug mga kasubo, ug ang tanan nga uban mabutang sa lugar sumala sa Iyang kabu-but-on. Amen! *R*

Mga Reperensya:

¹ *The Ministry of Healing*, pp. 59, 60.

² *Testimonies for the Church*, vol. 5, pp. 443, 444.

[Pagpatin-aw gidugang.]

³ *Ibid.*, p. 444.

⁴ *Ibid.*, p. 170.

⁵ *The Ministry of Healing*, pp. 112, 113.



GIPANGANAK UG GITUDLOAN SA PAGPANGALAGAD

NI CRISTIAN PAULESCU — RUMANIA

Nganong 100 ka mga tuig?

“Ang iglesia mao ang tinudlo nga ahensya sa Dios alang sa kaluwasan sa mga tawo. Kini giorganisar alang sa pag-alagad, ug ang iyang misyon mao ang pag-dala sa ebanghelyo ngadto sa kalibutan. Gikan sa sinugdanan kini mao ang plano sa Dios nga pinaagi sa Iyang iglesia ipakita ngadto sa kalibutan ang Iyang kahingpit-an ug ang Iyang pagkamaayo. Ang mga membro sa iglesia, kadtong Iyang gitawag gikan sa kangitngit ngadto sa Iyang kahibulongang kahayag, mopakita sa Iyang himaya.”¹

Isip katapusang kabilin sa wala pa ang Iyang pagkayab, ang atong Ginoong Jesu Cristo mihatag sa dakong sugo ngadto sa Iyang katawhan. Uban nianang dakong deklarasyon, ang iglesia natukod niining makasasala nga kalibutan aron sa pag-pangabudlay alang sa pagkabig sa mga ka-lag. Ang Iglesia gimandoan sa pagpaambit sa walay katapusang ebanghelyo sa matag tawo. Ang panahon, mga talento, ug mga tinubdan gisalig kanato — ang tanan uban niini nga katuyoan isip ilang labing taas nga tumong.

Sa pagtan-aw sa makatalagmanon nga kahimtang sa atong kalibutan, isip iglesia ni Cristo, kita kinahanglan nga seryoso nga mangutana sa atong mga kaugalingon sa mga pangutana sama sa:

“Dili pa ba daghan nga mga butang ang atong buhaton alang kang Cristo? Wala ba’y usa ka dako nga responsibilidad nga bisan unsang paagiha atong nalaktawan? Wala ba kita naghimo ug pakigsaad uban kang Jesus nga wala pa matuman sa atong bahin?”

Kita nagtago sa luyo sa mga pasangil, apan ang problema dili Komunismo, ni Romanismo, ni Liberalismo, ni Modernismo. Ang problema mao ang natulog nga Kristiyanismo! Importante ba ang akong gibuhat alang sa kahangturan? Kini ba nagpauswag sa bulohaton ni Cristo? Kung dili, bisan unsa pa ang atong pilion nga buhaton, **kini wala’y kapuslanan**. Usa ka tawo nakaobser-bar nga ang Dios wala magtinguha nga ang simbahan mahimong refriger-ator diin ang pagkadiosnon kinahanglan nga dili madu-not; hinoon, kini maoy usa ka incubator nga kinahanglang manganak ug bag-ong mga kinabig.

Ang Puloy-anan — ang Nag-unang Eskwelahan sa Misyonaryo

“Ang usa ka maayong pagkahan-ay, maayong pagkadisiplina nga pamilya nag-sulti ug labaw pa alang sa Kristiyanis-mo kay sa tanang mga sermon nga mahimong iwali. Ang maong pamilya naghatag ug ebidensya nga ang mga gini-kanan nagmalampuson sa pagsunod sa mga sugo sa Dios, ug nga

ang ilang mga anak moalagad Kaniya diha sa iglesia. Ang ilang inpluwensya motubo; kay sa ilang paghatag, sila makadawat sa paghatag pag-usab. **Ang amahan ug inahan nangitag mga katabang sa ilang mga anak, kinsa naghatag sa uban sa instruksiyon nga nadawat sa pan-imalay. Ang kasilinganan nga ilang gipuy-an gitabangan, kay diha ni-ini sila nahimong adunahan alang sa karon ug alang sa kahangturan.**”²

“[Ang Dios] nagtinguha nga makakita nga mapundok gikan sa mga panimalay sa atong mga katawhan ang usa ka dako nga pundok sa mga batan-on kinsa, tungod sa diosnon nga mga inpluwensya sa ilang mga panimalay, mitugyan sa ilang mga kasing-kasing ngadto Kaniya, ug milakaw aron sa paghatag Kaniya sa labing taas nga serbisyo sa ilang mga kinabuhi.”³

Ginikanhon nga Responsibilidad

Ang apostol mipahayag, “Wala na akoy kalipay nga labaw pa kay sa pagkadungog nga ang akong mga anak naglakaw diha sa kamatuoran” (3 Juan 1:4).

Ang Dios nagpanalangin kanato ug gag-may nga mga bata. Nganong gihatag man sila kanato? Aron atimanon alang Kaniya. Unsa ang atong responsibilidad? Ang Biblia nag-ingon kanato: “Bansaya ang bata diha sa dalan nga iyang pagalaktan: ug kon siya matigulang na, siya dili mobiya gikan niana.” (Proverbio

22:6).

“Ang pagdumala ug pagtudlo sa mga bata mao ang pinakahalangdon nga misyonaryo nga buhat nga mahimo ni bisan kinsang lalaki o babaye. . .

“Kita nagkinahanglan ug misyonaryo nga kadasig diha sa atong mga panimalay, aron kita makadala sa Pulong sa kinabuhi ngadto sa mga sakop sa atong mga pamilya ug makagiya kanila sa pagpangita ug panimalay sa gingharian sa Dios.”⁴

Nindot kaayo kon dad-on sa mga ginikanan ang ilang gagmay nga bata aron mapanalangan ug madedekar ngadto sa Dios, apan dili kini paigo. Ang sunod nga lakang mahinungdanon aron mapadayon ang pagbaton niana nga panalangin — pag-edukar sa bata uban ang tin-aw nga katuyoan sa pag-alagad kaniya ni Cristo alang sa pag-uswag sa Iyang gingharian. Ang matag bata gitawag aron mahimong instrumentong alang sa kaluwasan sa uban. Adunay duha ka posible nga direksyon sa pagserbisyo alang sa atong mga anak: “Ang mga bata mahimong mabansay alang sa pag-alagad sa sala o alang sa pag-alagad sa pagkamatarung.”⁵

Pagkat-on sa Pagserbisyo

“Thatang ang pipila sa imong mga oras sa paglingawlingaw sa imong mga anak; pakig-uban kanila sa ilang trabaho ug sa ilang mga dula, ug kuhaa ang ilang pagsalig. Ugmara ang ilang panaghigalaay.”⁶

Mahimong andam ka sa paghatag ug tambag, ug matag segundo mahimo ka nga nag-streaming sama sa usa ka radyo, nga nagpadala ug mga tipik sa tambag. Pero imbes nga tambagan lang ang imong anak, mas maayo nga ihatag nimo ang imong kasingkasing. Tudloi ang imong anak ug daghan pinaagi sa pagsulti ug dyutay.

“Ang matag inahan kinahanglang adunay panahon sa paghatag sa iyang mga anak niining gagmay nga mga paghi-gugma nga importante kaayo panahon sa pagkamasuso ug pagkabata. Niining paagiha ang inahan mobugkos sa mga kasingkasing ug kalipay sa mga anak sa iyang kaugalingon. Siya mao alang kanila kon unsa ang Dios kanato.”⁷

Unsaon nato pagtudlo ang atong mga anak sa pagserbisyo? Pinaagi sa pagtanyag kanila ug gugma. Hinigugma nga ginikanan, ang usa ka kinabuhi nga matahum nga gipuy-an nagpasabut nga mahigugmaon nga paghatag sa imong kaugalingon sa imong mga anak ug sa imong kapikas, paghatag sa mga tigulang sa usa ka pagtabang, pagpaminaw pag-ayo sa kasakit sa usa ka nahulog nga tawo, pagtanyag sa regalo sa imong presensya sa bisan kinsa nga nanginahanglan sa imong tabang.

Ang presente nga panahon gihatag kanato aron kita mamatay sa atong kaugalingon ug makasinati sa pagkabanhaw diha kang Cristo.

“Ug nga siya namatay alang sa tanan, aron sila nga mga buhi dili na magkinabuhi alang sa ilang kaugalingon, kondili ngadto kaniya nga namatay ug nabanhaw alang kanila” (2 Corinto 5:15).

Adunay usa lamang ka yawe alang sa pagka-epektibo ug pagkamabungahon. Si Jesus nagpatin-aw: Aron ang usa ka lugas sa trigo mamunga, kini kinahanglang mamatay. Ug si apostol Pablo nag-ingon: “Ako gilansang sa krus uban kang Cristo: bisan pa niana ako nabuhi, apan dili ako, kondili si Cristo ang nabuhi sa sulod nako” (Galacia 2:20, pagpatin-aw gidugang). Sa dihang si Cristo magpuyo kanato, unsa ang resulta? Kita magpuyo sa Iyang kinabuhi. Apan sama sa unsa ang Iyang kinabuhi samtang dinhi pa Siya sa yuta? Ang iyang tibuk kinabuhi usa lamang ka kinabuhi sa pag-alagad, puno sa gugma.

Ang Gahum sa Panag-ingnan

“Kadtong mga butang, nga inyong nakat-onan, ug nadawat, ug nadungog, ug nakita kanako, buhata” Filipos 4:9 (pagpatin-aw gidugang).

“Siya nga mahimong usa ka santos sa langit kinahanglang una nga mahimong usa ka santos sa iyang kaugalingon nga pamilya. Kon ang mga amahan ug mga inahan tinuod nga mga Cristohanon sa pamilya, sila mahimong mapuslanon nga mga membro sa iglesia ug makahimo sa pagdumala sa mga kalihokan sa simbahan ug sa katilingban subay sa parehas nga paagi diin sila nagdumala sa ilang mga katikaran sa pamilya. **Mga ginikanan, ayaw himoa nga ang inyong relihiyon usa lamang ka propesyon, apan himoa nga kini mahimong usa ka kamatuoran.... Gawas kon magpakita kamo ug kaaghup, pagkamabination, ug pagtahud sa inyong panimalay, ang inyong relihiyon mahimong kawang.** Kon adunay mas tinuod nga relihiyon sa panimalay, aduna untay labaw nga gahum sa iglesia.”⁸

“Ang Cristohanong panimalay kinahanglang nga usa ka butang nga leksyon, nga naghulagway sa kahamili sa tinuod nga mga prinsipyo sa kinabuhi. Ang ingon nga paghulagway mahimong usa ka gahum alang sa kaayohan sa kalibutan. . . . **Samtang ang mga batan-on mogawas gikan sa ingon nga panimalay, ang mga leksyon nga ilang nakat-onan mapahat.**”⁹

Kita gusto nga ang atong mga anak mahimong mga panig-ingnan nga angay nga awaton, ug kini maayo. Usa kini ka halangdon nga tinguha, apan kung unsa sila karon mao ang resulta sa atong gikinabuhi sa nangagi o kagahapon. Kon unsa ang atong gipugas kagahapon, atong anihon karon. Kinahanglang nga ang mga amahan mahimong mga pari sa pumuluho, sa panimalay. Ang mga inahan gikinahanglang sa pagmatuto sa ilang mga anak alang sa Dios. Ang mga bata kinahanglang matandog sa balaang gahum. Ug ang atong susi nga pulong (keyword) kinahanglang dili “ugma,” kondili “karon o dili na.”

Walay Gibuhat “nga Mga Tapulan”

“Ang mga bata kinahanglang tudloan sa bata pa kaayo nga mahimong mapuslanon, sa pagtabang sa ilang mga kau-galingon, ug sa pagtabang sa uban.”¹⁰

“Ang mga ginikanan kinahanglang modtudlo sa ilang mga anak nga ang pagkatapulan sala.

“Wala nay laing mas sigurado nga modala ngadto sa kadautan kay sa pagtangtang sa tanang palas-anon gikan sa mga bata, pasagdan sila ngadto sa usa ka walay pulos, walay tumong nga kinabuhi, sa pagbuhat sa bisan unsa, o sa pag-okupar sa ilang mga kaugalingon sumala sa ilang gusto.”¹¹

“Walay mga tapulan diha sa panimalay sa pagtuo. Ang matag sakop sa pamilya adunay pipila ka buluhaton nga gihatag kaniya, pipila ka bahin sa ubasan sa Ginoo diin magtrabaho.”¹²

Unsay epekto diha kanila sa paagi sa atong pagtudlo sa atong mga anak? Mabuhi ba sila o madunot na lang? Sa higayon nga imong hunahunaon lamang ang imong kaugalingon, ikaw mahimong mapahitas-on, arogante. Mao kini ang paagi nga ang mga bata motubo, kinsa nagpatuyang niini nga kinaiya. Ang resulta mao ang usa ka inano, laay nga kaliwatan, dili aktibo alang sa Dios. Ang Dios ug ang Iyang iglesia wala magkinahanglang sa mga ginikanan ug mga anak nga naglubong sa ilang mga talento dinhi sa yuta. Ang iglesia sa Dios nagkinahanglang ug aktibong mga magbubuhay, dili mga magtatan-aw.

“Ang trabaho padayong gihimo didto sa langit. Walay mga tapulan didto. ‘Ang akong Amahan nagtrabaho hangtud karon,’ miingon si Cristo, ‘ug Ako nagtrabaho.’”¹³

Nagdilaab nga Mga Siga

“Ang lampara, bisan unsa ka gamay, kon padayon nga magsiga, mahimong gamiton sa pagpasiga sa daghan pang mga lampara.”¹⁴

Sa kinaiyahan niini, ang kalayo manganak ug kalayo. Kung napalibutan kini sa uban nga dali nga masunog nga materyal, kini nagkinahanglang lamang sa usa ka aligato gikan sa gidukdok nga puthaw aron magdilaab ang kalayo. Apan gikan sa usa ka kandila, mga napulo ka libo ang madagkutan. Si Juan Bautista mipahayag nga Siya kinsa moanhi sunod kaniya “mobatismo sa Espiritu Santo ug sa kalayo. Kini ang labing dako nga panginahanglang sa atong kaadlawan — usa ka iglesia nga gibunyagan sa kalayo. Mao kini ang gikahadlok sa yawa ug sa iyang gingharian, usa ka iglesia nga gipasiga sa kalayo sa diosnong gugma. Kinsay makasugakod niini? Ang gugma sa Dios mahisama sa kusog nga dinamo, nga magduso kaniyo sa pagpangahas sa dagkong mga butang alang sa Dios. Hinigugmang mga kabatan-onan ug mga ginikanan, dili karon ang panahon sa pagpalong sa Espiritu ug limitahan ang gahum sa Dios, apan sa pag-uswag pinaagi sa pagtuo!

“Ang matag tinuod nga tinon-an natawo ngadto sa gingharian sa Dios isip usa ka misyonaryo. Siya nga moinom sa buhi nga tubig mahimong tuburan sa kinabuhi.”¹⁵

“Ang Dios mopalihok diha sa mga tawo diha sa mapainubsanon nga mga katungdanan sa pagpahayag sa mensahe sa presente nga

kamatuoran. Daghan kanila ang makita nga nagdali ngadto ug didto, gipalihok sa Espiritu sa Dios sa paghatag sa kahayag niadtong anaa sa kangitngit. Ang kamatuoran sama sa kailay sa ilang mga bukog, nga nagpuno kanila sa nagdilaab nga tinguha sa paglamdag niadtong naglingkod sa kangitngit. Daghan, bisan taliwala sa mga walay edukasyon, ang magmantala sa pulong sa Ginoo. Ang mga bata pagaaghaton sa Balaang Espiritu sa paglakaw aron sa pagpahayag sa mensahe sa langit. Ang Espiritu ibubu niadtong motugyan sa Iyang mga pag-aghat. Sa pag-salikway sa mga lagda sa tawo ug sa mabinantayon nga mga lihoc, sila moapil sa kasundalohan sa Ginoo.”¹⁶

Unsaon nako pagpalambo ang gasa nga labing gikinahanglan sa kalibutan?

“Ang mga kabatan-onan kinahanglan nga tudloan nga ang kinabuhi nagpasabot sa matinguhaon nga bulohaton, re-sponsibilidad, pag-atiman. Sila nagkinahanglan ug pagbansay nga maghimo kanila nga praktikal — mga lalaki ug babaye nga makasagubang sa mga emerhensya. Sila kinahanglang tudloan nga ang disiplina sa sistematiko, maayo nga pagkontrol nga pagtrabaho mahinungdanon, dili lamang ingon nga usa ka panalipod batok sa mga pagbag-o sa kinabuhi, apan ingon nga usa ka tabang sa bug-os nga paglambo.”¹⁷

Adunay kinahanglan alang sa:

1. Mga batan-on nga diosnon. Kinahanglang tudloan ang mga batan-on unsaon paghigugma si Cristo ug ang Iyang gingharian, unsaon pagtugyan sa ilang kaugalingon sa tibuok kasingkasing sa pag-alagad Kaniya, unsaon sa pagkaandam alang sa bisan unsang pagdumili sa kaugalingon, bisan unsang pagsakripisyo sa kaugalingon, ug alang sa bisan unsang buluhaton diin Siya magatawag kanila. Kinahanglan nga molihok ug maayo alang kang Cristo sa bisan unsang dapit — sa panimalay o layo sa panimalay, sa taas nga klase nga katilingban o sa ubos nga klase nga katilingban. Wala gidesinyo ni Cristo ang mga batan-on nga magpuyo sa usa ka kahimtang nga ubos o kasarangan.

2. Mga batan-on nga adunay naugmad nga panghunahuna. Matagbaw ba ang batan-on nga Cristohanon sa pagkaubos lamang sa ilang buluhaton alang sa gingharian sa Manunubos, samtang ang kalibutanon nga mga tawo maningkamot alang sa pagkamaayo sa ilang mga kalihokan ug mga trabaho? Pagbantay sa pagtuis sa imong pagsalig sa Balaang tabang, sa pagtuo nga ang kasibot sa kasingkasing mobaylo sa pagkawalay kahibalo. Ang sugo mao: “Higugmaa ang Ginoo, nga imong Dios, sa tibuok mong kasingkasing, sa tibuok mong kalag ug sa tibuok mong hunahuna” — ug kini magamit sa samang sukod sa pagserbisyo ug sa paghigugma Kaniya. Ang atong kabatan-onan nagkinahanglan ug balanse ug naugmad nga hu-nahuna.

3. Nagsakripisyo sa kaugalingon nga batan-on. “Ang “pagkalipay sa higayon” dili usa

Ingong nga sama kang Cristo wala magpasabot nga mahimong usa ka matinguhaon sa sosyal nga kalab-uton; kini wala magpasabot nga mahimong mogahum, kini wala magpasabot nga magpuyo sa kaharuhay, apan, kini nagpasabot ug paghatag.

ka butang nga kuptan, apan usa ka butang nga kinahanglan isakripisyo. “Kay ang Dios nahigugma pag-ayo, nga Siya mihatag. . .” Ang Dios mihatag kang Jesus ingon nga usa ka Gasa, aron kita mahimo nga mga tighatag. Karon labaw pa sa kaniadto, adunay panginahanglan alang sa matinugyanon nga mga alagad ni Cristo.

“Ang matag batan-on, matag bata, adunay buluhaton nga buhaton alang sa dungog sa Dios ug sa pagbayaw sa ka-tawhan.”¹⁸

Ang Labing Taas nga Pribilehiyo

Hinigugma nga mga batan-on, mahimong ulipon ka sa materyal o propesyonal nga pag-uswag, ulipon sa imong relo, telepono, o uban pang kagamitan, ulipon sa kaayohan, o ulipon sa wala masabtan nga damgo. Kining tanan o bisan unsa nga matang sa pagkaulipon nagpasabot sa usa ka usik nga kinabuhi. Ang pagkahimong sama kang Cristo wala magpasabot nga mahimong tigkatkat sa sosyal nga pag-uswag; wala kini magpasabot nga nalinga sa pagkontrolar, wala kini magpasabot nga magpuyo sa kaharuhay, kondili, kini nagpasabot sa paghatag. Ang tanan nga mahinungdanon gipasukad sa paghatag, ug ang kinabuhi dili takus nga mabuhay kung wala ang pagkamanggihatagon. Ang paghatag nagpasabot sa aktuwal nga pagpanag-iya. Gusto ba nimong pugson si Cristo diha kanimo nga dili ihalad ang Iyang kaugalingon? Kung gusto nimo nga buhaton kini, dili Siya magpuyo sa sulod nimo, apan hinoon magpabilin ka nga sulu-goon sa imong kaugalingon nga kahakog.

Mahimong dili ka makahimong dagkong mga butang; dili ka matawag nga usa ka empleyado sa simbahan. Walay serbisyo nga gamay ra kaayo ug walay bisan usa nga dako kaayo. Daghan ang gustong mousab sa kalibutan, apan kasagaran walay gustong mobuhat sa gagmay nga mga butang nga makapabati sa usa ka tawo nga siya gihigugma. Ang sukod nga imong gihatag mao ang sukod nga imong nadawat.

“Dili ba usa ka pribilehiyo nga mahimong kauban ni Jesus? Dili ba usa ka kadunganan nga malambigit sa dako nga buhat sa pagluwas sa mga kalag, nga molihok sa bahin nga gihatag kanato sa atong Manluluwas? Ug walay usa nga makahatag ug panalangin sa uban nga dili makadawat sa kaayohan sa iyang kaugalingon. ‘Siya nga nagabisibis pagabisibisan usab sa iyang kaugalingon’ (Proverbio 11:25).”¹⁹

“Ang atong pagtuo kinahanglan nga mabungahon sa maayong mga buhat, kay ang pagtuo nga walay buhat patay. Ang matag katungdanan nga gihimo, matag sakripisyo nga gihimo sa ngalan ni Jesus,

nagdala ug hilabihan ka dako nga ganti. Sa mismong buhat sa katungdanan, ang Dios mosulti ug mohatag sa Iyang panalangin. Apan Siya nagkinahanglan kanato sa tibuok nga pagtugyan sa mga galamhan. Ang hunahuna ug kasingkasing, ang tibuok nga pagkatawo, kinahanglang ihatag ngadto Kaniya, o kita mapakyas sa pagkahimong tinuod nga Cristohanon.”²⁰

Ang Ganti

“Busa magmakusganon kamo, ug ayaw pagpaluyaha ang inyong mga kamot: kay ang inyong buhat pagabalusan” (2 Cronicas 15:7).

Hinigugma nga mga batan-on, hinigugma nga ginikanan, pagkinabuhi matag adlaw nga daw nag-atubang ka sa usa ka makamatay nga sakit. Paghatag karon kon unsa ang imong nadawat gikan kang Cristo. Ang kalibutan nagkinahanglan gayud sa pagpadayag sa gugma sa Dios. Nanghinaut ko nga bisan human sa 100 ka tuig nga pag-lungtad, ang Reform Movement mahimong magkurog ubos sa gahum sa gugma ug sa kamatuoran diha kang Cristo. Ako nag-ampo sa kinasingsing nga kini nga Kalihokan o Movement dili maluya, kondili mahimong moboto sama sa usa ka bulkan, ug ang tibuok yuta mapalibotan sa gugma sa Dios.

Kamo ba, hinigugma nga mga batan-on, ug hinigugma nga mga ginikanan, naglangkob niini nga kalihokan o Movement sa dili madugay aron malukop ang tibuok kalibutan uban sa himaya sa Dios? Kining linog sa gugma mo-abot sa tanang kinatunmyan sa kalibutan — ug unya kini modulot sa kahangturan ug magpadayon didto. Ang pagpili imoha. Pagpili nga maalamon. Pilia ang pagsunog alang kang Cristo. Mahimong ka nga kahayag! *R*

Mga Reperensya:

- ¹ *The Acts of the Apostles*, p. 9.
- ² *The Adventist Home*, p. 32. [Pagpatin-aw gidugang.]
- ³ *Counsels to Parents, Teachers, and Students*, p. 131. [Pagpatin-aw gidugang.]
- ⁴ *Child Guidance*, p. 476.
- ⁵ *Counsels to Parents, Teachers, and Students*, p. 108.
- ⁶ *The Adventist Home*, p. 192.
- ⁷ *Ibid.*, p. 197.
- ⁸ *Ibid.*, pp. 317–319. [Pagpatin-aw gidugang.]
- ⁹ *Ibid.*, p. 31. [Pagpatin-aw gidugang.]
- ¹⁰ *Ibid.*, p. 283.
- ¹¹ *Ibid.*, p. 284.
- ¹² *Testimonies for the Church*, vol. 4, p. 454.
- ¹³ *The Adventist Home*, p. 287.
- ¹⁴ *Ibid.*, p. 32.
- ¹⁵ *The Desire of Ages*, p. 195.
- ¹⁶ *Testimonies for the Church*, vol. 7, pp. 26, 27.
- ¹⁷ *Education*, p. 215.
- ¹⁸ *The Adventist Home*, p. 280.
- ¹⁹ *Counsels on Health*, p. 508.
- ²⁰ *Testimonies for the Church*, vol. 4, p. 145.

PAGHIMOG MGA TINON-AN

NI OLGA ORTIZ – COLOMBIA

Ang Tinuod nga Edukasyon

Sa sinugdan, gitukod sa Dios ang pamilya isip uyokan sa katilingban — usa ka dapit alang sa pag-umol ug paglambo sa kinaiya, mga gawi ug mga mithi. “Ang sistema sa edukasyon nga gitukod sa Eden nakasentro diha sa pamilya.”¹ Ang balaanong plano gipahaum ngadto sa katawhan human sa pagkapukan. Ang tinuod nga edukasyon mao ang buhat sa pagtubos ug pagpahiuli sa katawhan, pagpalambo sa pisikal, mental ug spirituhanon nga mga galamhan sumala sa kinaiya ni Cristo. Kini dili limitado sa pagbaton sa kahibalo, apan nagtinguha sa pag-andam sa indibiduwal alang sa usa ka kinabuhi sa pagserbisyo dinhi sa yuta ug alang sa kahangturan.

Ang pundasyon niini anaa sa Pulong sa Dios ug sa giya sa Balaang Espiritu. Si Cristo isip representante sa Amahan, ang kadugtungan tali sa Dios ug sa katawhan, mao ang halangdon nga Magtutudlo sa katawhan, ug Iyang gihan-ay nga ang mga lalaki ug mga babaye nga mahimong Iyang mga representante. Ang pamilya mao ang eskwelahan, ug ang mga ginikanan mao ang mga magtutudlo. Kini nga prinsipyo matinud-anong gisunod diha sa yutan-ong kinabuhi ni Ginoong Jesus.

Ang Edukasyon ni Cristo

“Si Jesus nagpuyo sa puloy-anan sa usa ka mag-uuma, ug sa matinud-anon ug malipayon nagbuhat sa Iyang bahin sa pagpas-an sa mga palas-anon sa panimalay. Siya mao ang Komandante sa langit, ug ang mga manulonda nalipay sa Iyang pulong; karon Siya usa ka andam nga sulugoon, usa ka mahigugmaon, masinugtanon nga anak. Siya nakakat-on sa usa ka patigayon, ug uban sa Iyang kaugalingon nga mga kamot nagtrabaho diha sa buhatan sa karpentero sa gamay nga pandayan ni Jose. Sa yano nga bisti sa usa ka ordinario nga trabahador Siya naglakaw sa kadalanan sa gamay nga lungsod, padulong ug mipauli gikan sa Iyang ubos



nga buhat. Wala Niya gamita ang Iyang balaanong gahum sa pagpagaan sa Iyang mga palas-anon o sa pagpagaan sa Iyang kahago.”² Ang Iyang panimalay mao ang nag-unang eskwelahan, diin si Maria ug Jose, nga gigiyahan sa balaan nga mga baruganan, adunay sukaranan nga tahas sa Iyang paglambo ngadto sa pagkahingkod nga tawo. Ang kulturahon ug pamilyahanong palibot diin Siya midako, gilibotan sa kinaiyahan ug kayano, dugang nga nag-umol sa Iyang kinaiya ug nagpalig-on sa Iyang koneksyon sa Dios ug sa tawhanong mga panginahanglan.

“Sa mga kaadlawan ni Cristo ang mga Judeo nag-atiman pag-ayo sa edukasyon sa ilang mga anak. Ang ilang mga eskwelahan konektado sa mga sinagoga, o mga dapit sa pagsimba, ug ang mga magtutudlo gitawag nga mga rabbi, mga tawo nga giingon nga batid kaayo.

“Si Jesus wala moadto niini nga mga tulunggaan, kay sila nagtutudlo ug daghang mga butang nga dili tinuod. Inay sa Pulong sa Dios, ang mga pulong sa mga tawo gitun-an, ug sa kasagaran kini supak sa gitudlo sa Dios pinaagi sa Iyang mga propeta.

“Ang Dios mismo pinaagi sa Iyang Espiritu Santo mitudlo kang Maria unsaon pagpadako sa Iyang Anak. Si Maria mitudlo kang Jesus gikan sa Balaang Kasulatan, ug Siya nakakat-on sa pagbasa ug pagtuon niini alang sa Iyang kaugalingon.”³

Usa ka Sayop nga Konsepto

Sukwahi sa pagbansay nga nadawat ni Jesus diha sa panimalay, ang rabinikal nga mga eskwelahan sa Iyang panahon nawad-an sa panan-aw sa tinuod nga diwa sa edukasyon ug nakatumong sa mga rituwal, sa ingon natuhop sa walay sulod nga pormalismo. Kini miresulta sa usa ka edukasyon nga wala magpasiugda ug personal nga kadugtongan uban sa Dios ni makapalambo sa usa ka kinaiya nga gipasukad sa tinuod nga diosnong mga prinsipyo. Dili ba susama kini sa kamatuoran nga atong gipuy-an karon?

“Ang atong mga ideya sa edukasyon gamay ra kaayo ug ubos kaayo ang kinutuban. Adunay panginahanglan sa usa ka mas halapad nga kasangkapan, usa ka mas taas nga tumong. Ang tinuod nga edukasyon nagpasabut nga labaw pa sa pagpadayon sa usa ka piho nga kurso sa pagtuon. Kini nagpasabut nga labaw pa sa usa ka pagpangandam alang sa kinabuhi karon. Kini adunay kalabutan sa tibuok nga pagkatawo, ug sa tibuok nga yugto sa paglungtad nga posible sa tawo. Kini mao ang nagkauyon nga kalamboan sa pisikal, mental, ug spirituahanong gahum. Kini nag-andam sa studyante alang sa kalipay sa pagserbisyo niini nga kalibutan ug alang sa mas taas nga kalipay sa

mas lapad nga pagserbisyo sa kalibutan nga moabut.”⁴ Makasusubo, sa akademya niini nga kalibutan, ang kinaiya ug mga mithi nga importante kaayo sa kinabuhi sa tawo ug sa pagpangandam alang sa Langit napasagdan. Pinaagi sa pagsabot sa mga kamalian kaniadto, kita mahimong makadiskobre pag-usab sa tinuod nga katuyoan sa balaan nga edukasyon.

Unsay buot ipasabot niini?

Ang tinuod nga edukasyon nagagikan sa Dios ug ang katuyoan niini mao ang pagpasig-uli sa diosnong dagway sa katawhan. Ang tinuod nga edukasyon dili limitado sa pag-angkon sa kahibalo sa akademiko, apan naglangkob sa spirituhanon, moral, ug sosyal nga pagporma sa tawo. Busa kini usa ka sagrado ug solemne nga buhat. Diha sa sagradong mga kasulatan atong makita giunsa sa Dios pag-awhag ang mga ginikanan mahitungod sa edukasyon sa ilang mga anak. Nagpasabot kang Abraham, ang Ginoo mipahayag: “Kay ako nakaila kaniya, nga siya magasugo sa iyang mga anak ug sa iyang panimalay sunod kaniya, ug sila magabantay sa dalan ni Jehova, sa pagbuhat sa pagkamatarung ug sa hustisya” (Genesis 18:19). Tungod sa iyang suod nga relasyon sa Dios, giedukar ni Abraham ang iyang pamilya sa mga pamaagi sa Ginoo. Aron mahimo kini nga usa ka kamatuoran diha sa atong mga panimalay gikinahanglan usab ang pag-ugmad sa mga batasan sa mahigugmaong debosyon ngadto sa Manluluwas sa mga kalag, sa pagtutudlo sa atong mga anak nga pinaagi sa pag-ampo aduna silay Higala nga maminaw sa tanan nilang mga damgo ug mga kasubo. Ang tinuod nga edukasyon nagagikan sa Dios ug ang katuyoan niini mao ang pagpasig-uli sa diosnong dagway sa katawhan. Ang tinuod nga edukasyon dili limitado sa pag-angkon sa kahibalo sa akademiko, apan naglangkob sa spirituhanon, moral, ug sosyal nga pagporma sa tawo. Busa kini usa ka sagrado ug solemne nga buhat. Diha sa sagradong mga kasulatan atong makita giunsa sa Dios pag-awhag ang mga ginikanan mahitungod sa edukasyon sa ilang mga anak. Naghisgot kang Abraham, ang Ginoo mipahayag: “Kay ako nakaila kaniya, nga siya magasugo sa iyang mga anak ug sa iyang panimalay sunod kaniya, ug sila magabantay sa dalan ni Jehova, sa pagbuhat sa pagkamatarung ug sa paghukom” (Genesis 18:19). Tungod sa iyang suod nga relasyon sa Dios, giedukar ni Abraham ang iyang pamilya sa mga pamaagi sa Ginoo. Aron mahimo kini nga mahitabo diha sa atong mga panimalay gikinahanglan usab ang pag-ugmad sa mga kinaiya sa mahigugmaong debosyon ngadto sa Manluluwas sa mga kalag, sa pagtutudlo sa atong mga anak nga pinaagi sa pag-ampo aduna silay Higala nga maminaw sa tanan nilang mga damgo ug mga kasubo. Nga pinaagi sa pagbasa sa Biblia adlaw-adlaw ilang masabtan ang kinaiya sa Dios ug giunsa Niya sa Iyang maloloy-on nga gugma pagtagad kanato. Sa ingon makakat-on sila sa pagtagad sa uban nga adunay pagtahud, gugma ug pailub. Makakat-on sila nga mahimong maloloy-on ug malumo, sama nga ang ilang langitnong Amahan maloloy-on ug malumo sa tawhanong rasa nga Iyang gilalang nga malumo. Ang pagsabot sa tinuod nga edukasyon magdala kanato sa pag-ila nga ang katapusang tumong niini nga proseso mao ang pagporma sa kinaiya, kay kini lamang ang bahandi nga atong madala ngadto sa Langit.

Resulta sa Sayop nga Desisyon

Ang pagporma sa kinaiya usa ka sukaranan ug dili mamatikdan nga proseso sa kinabuhi; kinaiya mao lamang ang butang nga atong madala ngadto sa Langit ug kini gitukod diha sa panimalay. “Ang usa ka kinaiya nga naporma sumala sa diosnon nga panagway mao lamang ang bahandi nga atong madala gikan niini nga kalibutan

ngadto sa sunod. Kadtong nailalum sa pagtutudlo ni Cristo niining kalibutana magadala sa matag diosnon nga pagkab-ot uban kanila ngadto sa langitnong mga mansyon. Ug sa langit kita padayon nga molambo. Unsa ka importante, unya, ang pagpalambo sa kinaiya niini nga kinabuhi.”⁵ Ang sagrado nga buhat sa mga ginikanan mao ang pagpahimangno ug pagtutudlo sa ilang mga anak sa pagkahadlok ug pagsunod sa Dios aron uban sa tabang sa Balaang Espiritu sila makapalambo ug kinaiya nga susama sa ilang Amahan sa Langit. Ang Ginoo mipahayag, “Kining mga pulonga nga akong gisugo kanimo niining adlaw maanaa sa imong kasingkasing, ug igatudlo mo kini nga makugihon sa imong mga anak, ug isulti kini sa magalingkod ikaw sa imong balay, ug sa magalakaw ikaw sa dalan, ug sa imong paghigda, ug sa imong pagbangon” (Deuteronomio 6:6, 7).

Sa diha nga ang mga ginikanan dili magtagad sa mga giya sa pagtutudlo nga gihatag sa Dios ug ang ilang solemne nga obligasyon gipadaplin, ang ilang mga anak maedukar sa kaaway sa mga kalag. Ang kaso ni Eli nga saserdote maoy magpahinumdum kanato. Sa 1 Samuel 2:12 kita gisultihan: “Karon ang mga anak nga lalaki ni Eli mga anak nga lalaki ni Belial; sila wala makaila kang Jehova.” Ang mga bata nagkinahanglan ug mabinantayon nga pag-atiman ug paggiya nga wala pa sukad, kay si Satanas naningkamot nga makontrolar ang ilang mga hunahuna ug mga kasingkasing ug isalikway ang Espiritu sa Dios.

“Ang makahahadlok nga kahimtang sa mga batan-on niining panahona naglangkob sa usa sa pinakalig-on nga mga ilhanan nga kita nagkinabuhi na sa katapusang mga adlaw, apan ang kalaglagan sa daghan mahimong direktang masubay ngadto sa sayop nga pagdumala sa mga ginikanan. Ang spiritu sa pagbagulbol batok sa pagbadlong migamot ug nagapamunga sa iyang pagkamasupilon. Samtang ang mga ginikanan wala mahimuot sa mga kinaiya nga ilang giugmad sa ilang mga anak, sila napakyas nga makita ang mga sayop nga naghimo kanila kung unsa sila.”⁶

Ang mga ginikanan kinahanglan nga makasabot nga ang Cristohanong edukasyon kinahanglan nga magpunting dili lamang sa salabutan, kondili sa pagpalambo sa kinaiya, moral nga pag-umol, ug pagpangandam alang sa kinabuhing dayon. Dili nila matuman sa hustong paagi ang ilang mga responsibilidad gawas kon ilang dawaton ang Pulong sa Dios ingon nga lagda sa kinabuhi. Kinahanglan nilang sabton nga sila mag-edukar ug mag-umol sa kinaiya sa matag bililhong tawhanong bahandi nga gipiyal sa ilang pag-atiman, aron dihaduha makakita sa mga prinsipyo sa tinuod nga edukasyon ug sa kamahinungdanon sa

pagpalambo sa kinaiya isip usa ka proseso nga adunay walay katapusang mga implikasyon. Sa atong panahon, kinahanglan magmabinantayon kita ilabina sa panaghigalaay nga gihimo sa atong mga anak. Ang mga kaubanan ba nga ilang gipili isip mga higala makatabang ba nila sa pagpakita sa dagway sa ilang Langitnong Amahan o sila ba makainpluwensya kanila sa pagpakita sa prinsipio niini nga kalibutan? Ang unod ba sa media nga ilang gitan-aw makapabalaan kanila o kini ba magpaubos sa ilang mga prinsipyo ug makadaot sa ilang spirituwal nga mga batasan? Sa paggiya kanila sa pigot nga dalan, ang ehemplo sa pamilya mahimong importante kaayo.

Ang Ehemplo sa Puloy-anan

Ang Cristohanong edukasyon magsugod diha sa sayo nga panuigon uban sa panig-ingnan sa iyang unang mga magtutudlo, ang mga ginikanan. Mao kini ang hinungdan nga giawhag kita nga magbaton ug dyutay nga langit diha sa atong panimalay, aron ang mga bata makakat-on pinaagi sa pagsundog sa panig-ingnan sa ilang mga ginikanan. Sa Galacia 5:22, 23 ang mga bunga sa espiritu gihubit ingon sa gugma, kalipay, kalinaw, pailub, kalolot, pagkamaayo, pagkamatinumanon, kalumo ug pagpugong sa kaugalingon—mga hiyas nga naglangkob sa usa ka lig-on nga Cristohanong kinaiya. Si Haring Solomon nagpahinumdom kanato, “Bansaya ang bata diha sa dalan nga iyang pagalaktan, ug kon siya matigulang na siya dili mobiya gikan niana” (Proverbio 22:6). Si apostol Pablo usab nag-awhag kanato sa pagbag-o sa hunahuna ug kinaiya sumala sa kabubut-on sa Dios (Roma 12:2). Sa Mateo 5:48 si Jesus Mismo nagtawag kanato nga mahimong hingpit ingon nga ang atong langitnong Amahan hingpit, nga nagpasabot sa usa ka makanunayon nga pagtubo diha sa pagkahisama kang Cristo. Ang pag-uswag sa kinaiya usa ka nagpadayon nga proseso sa pagbag-o nga nanginahanglan sa pagpangilabot sa Balaang Espiritu ug sa pasalig sa indibiduwal. Ang nag-unang katuyoan sa Cristohanong edukasyon ug kinabuhi mao ang pagpalambo sa kinaiya. “Ang matag tawo, nga gilalang diha sa dagway sa Dios, gitugahan ug gahum nga susama nianang sa Maglalalang—pagka-indibidwal, gahum sa paghunahuna ug sa pagbuhat. Ang mga tawo diin kini nga gahum naugmad mao ang mga tawo nga nagdala sa mga responsibilidad, kinsa mga lider sa patigayon, ug kinsa nag-inpluwensya sa kinaiya. Kini mao ang buhat sa tinuod nga edukasyon sa pagpalambo niini nga gahum, sa pagbansay sa mga batan-on nga mahimong mga mahunahunaon, ug dilli lamang tigsalamin sa uban nga mga tawo. Imbis matugob ang

ilang mga pagtuon sa kon unsa ang gisulti o gisulat sa tawo, tugoti ang mga studyante nga magiyahan sa mga tinubdan sa kamatuoran, ngadto sa dakong kaumahan nga abli sa pagsusi sa kinaiyahan ug pina-dayag. Tugoti sila sa pagpamalandong sa dagkong mga kamatuoran sa katungdanan ug padulngan, ug ang hunahuna mouswag ug malig-on. Imbis sa edukado nga mga mahuyang, mga institusyon sa pagkat-on mahimong magpadala ug mga tawo nga kusgan sa paghunahuna ug paglihok, mga tawo nga mga batid ug dili mga ulipon sa mga sirkumstansya, mga tawo nga adunay gilapdon sa hunahuna, katin-aw sa hunahuna, ug kaisug sa ilang mga gituohan.

“Ang mao nga edukasyon naghatag ug mas labaw pa kay sa mental nga disiplina; kini naghatag ug mas labaw pa kay sa pisikal nga pagbansay. Kini nagpalig-on sa kinaiya, aron ang kamatuoran ug ang katul-id dili masakripisyo sa hakog nga tinguha o kalibutanon nga ambisyon. Kini nagpalig-on sa hunahuna batok sa dautan. Imbis sa naglabaw nga kinaiya mahimong usa ka gahum sa paglaglag, ang matag motibo ug tinguha madala ngadto sa pagpahuyon sa dakung mga baruganan sa matarung. Samtang ang kahingpitan sa Iyang kinaiya gipamalandong, ang hunahuna mabag-o, ug ang kalag malalang pag-usab diha dagway sa Dios.”

Ang mga ginikanan kinahanglang magugmad ug malipayon ug mahimsog nga palibut alang sa ilang mga anak pinaagi sa pagpahilayo kanila—ug pagpahibalo kanila—sa gahum sa negatibong mga inpluwensya ug sa unsa nga paagi nga ang maong mga inpluwensya makapahisalaag sa kinaiya ug sa katapusan modala kanila palayo sa Dios. “Ang mga lihok, kanunay nga gibalikbalik, nagporma ug mga batasan, ang mga batasan nagporma ug kinaiya. Sa kamapailubon buhata ang gagmay nga mga katungdanan sa kinabuhi. Hangtud nga imong gipakamenos ang importansya sa pagkamatinud-anon sa gagmay nga mga katungdanan, ang imong pagtukod sa kinaiya dili makatagbaw. Diha sa panan-aw sa Labing Gamhanan, ang matag katungdanan mahinungdanon. Ang Ginoo mi-ingon, ‘Siya nga matinud-anon sa labing gamay kasaligan usab sa daghan.’ Sa kinabuhi sa usa ka tinuod nga Cristo-hanon walay mga dili mahinungdanon.”⁸

Ang kompleto nga pagporma sa kinaiya kinahanglan nga ibase sa mosunod nga mga prinsipyo:

1. Pagsalig sa Dios: Pangitaa ang Dios adlaw-adlaw diha sa pag-ampo ug pagtuon sa Biblia (Filipos 4:13).
2. Disiplina ug pagpugong sa kaugalingon: Pagpugong sa mga hunahuna, mga pulong, ug mga buhat (Proverbio 16:32).

3. Pagserbisyo sa uban: Pagporma ug usa ka halangdon nga kinaiya pinaagi sa paghigugma ug pagtabang sa uban (Mateo 25:40).

4. Instruksyon nga gipasukad sa balaang mga prinsipyo gikan sa pagkamasuso (Proverbio 22:6; 2 Timoteo 3:15).

5. Paglahutay sa pagbag-o: Ang pag-uswag sa kinaiya usa ka nagpadayon nga proseso hangtud ang kalag magpakita sa hingpit nga dagway ni Jesus. (2 Corinto 3:18; Early Writings, p. 71).

Pagkat-on Pinaagi sa Pagbuhat

Ang yutan-ong kinaadman nagpamatuod sa unsay gitukod sa Ginoo diha sa balaang plano sa edukasyon. Ang mga bata mas makakat-on kon sila makadugtong sa kahibalo ngadto sa ilang palibot pinaagi sa paggamit niini sa praktikal sa ilang adlaw-adlaw nga kinabuhi. Gikan sa sayo nga panuigon ang mga bata kinahanglan nga makakat-on sa usa ka mapuslanon o praktikal nga trabaho nga modala sa pagpalambo sa mga kahanas nga mahimong sukaranan sa pagpalambo sa mga kalidad sama sa responsibilidad, disiplina, paglahutay, ug pailub. Dugang pa, kini nagtugot kanila sa pagbag-o sa edukasyon ngadto sa usa ka makahuluganon ug makapauswag nga kasinatian nga makatabang kanila dili lamang sa pagpasar sa mga eksaminasyon, apan sa malampuson mosagubang sa mga hagit sa kinabuhi. Kining tanan kinahanglang ipasukad sa Balaang Kasulatan.

Edukasyon sa Biblia

Gikan sa sinugdan, giestablisar sa Dios ang edukasyon isip usa ka hiniusa nga proseso. Sa Genesis 1:27 gisultihan kita nga ang tawo gilalang sa dagway ug pagkahisama sa Dios. Kini nagpasabot nga ang diosnong kahibalo ki-nahanglan mahimong basehan sa tanang pagtulonan. Ang Proverbio 9:10 nag-ingon nga “ang pagkahadlok sa Ginoo mao ang sinugdanan sa kaalam: ug ang kahibalo sa balaan mao ang pagsabut,” nga nagpasiugda nga ang tinuod nga edukasyon magsugod sa usa ka lig-on nga spiritu-hanong pundasyon nga kinahanglang mohimo sa mosunod nga sukarananag baruganan: “Ang buhat sa edukasyon ug ang buhat sa pagtubos usa ra,”⁹ nga nagpasabot nga ang pag-tudlo kinahanglang mosangpot sa spirituhanong kausaban.

1. Nakasentro kang Cristo: Ang Dios kinahanglan mao ang sentro sa tanang pagtudlo (Colosas 2:3).



Gikan sa sayong panuigon sa mga Kabataan kinahanglan mokat-on sa usa ka magamit o praktikal nga bulohaton nga mopahiangay sa paglambo sa mga nakat-onan nga mahimong nag-una sa pagpundar ug mga kalidad sama sa responsibilidad, disiplina, pagkamalahutayopn ug pagpailub.

2. Integral: Kini kinahanglan nga naglangkob sa pisikal, mental ug spirituhalon nga kalamboan (Lucas 2:52).

3. Praktikal ug aplikado: Dili lamang teoretikal, apan nakatumong sa adlaw-adlaw nga kinabuhi ug pagserbisyo sa uban (Mateo 25:40).

4. Pag-umol sa kinaiya. Ang edukasyon kinahanglan nga mohulma sa kinaiya sa pagpakita sa dagway ni Cristo. “Ang pagkadili hakog nagpailalum sa tanang tinuod nga kalamboan. Pinaagi sa dili hinakog nga pagserbisyo atong madawat ang kina-tas-ang kultura sa matag galamhan. Sa labi nga nagabuhat sa kinatibuk-an kita mahimong umalambit sa diosnong kinaiya. Kita angayan sa langit, kay atong gidawat ang langit sa atong mga kasingkasing.”¹⁰

5. Nakatutok sa paglaum ug katubsan: Kini kinahanglan nga mag-andam sa tawo alang sa karon nga kinabuhi ug sa kahangturan. “Ang buluhaton sa kinabuhi nga gihatag kanato mao ang pagpangandam alang sa kinabuhing dayon, ug kon atong tumanon kini nga buhat sumala sa giplano sa Dios nga atong buhaton, ang matag tentasyon mahimong molihok alang sa atong pag-uswag; kay samtang kita mosukol sa pagdani niini, kita mouswag sa balaanong kinabuhi. Sa kainit sa panagbangi, samtang nag-apil sa mainiton nga spirituhalonong pakig-gubat, ang dili makita nga mao ahensya anaa sa atong kiliran, gisugo sa langit sa pagtabang kanato sa atong mga pakigbugno, ug sa krisis, ang kusog ug kalig-on ug kadasig gihatag kanato, ug kita adunay labaw pa sa tawhanon nga gahum.”¹¹

Ang Cristohanong edukasyon dili limitado sa panimalay o eskwelahan, apan naglambigit sa simbahan isip su-karanang haligi sa spirituhalonong kalamboan. Pinaagi sa iglesia, ang mga batan-on makadawat ug giya, suporta ug ehemplo sa pagtuo nga makatabang nila sa pagtubo sa ilang relasyon sa Dios ug mapalig-on sa umaabot nga panahon.

Sa Katapusan nga Mga Panahon

“Ug sila nga mahaanha kanimo motukod sa karaang mga dapit nga biniyaan: ikaw mopatindog sa mga patukoranan sa daghan nga mga kaliwatan; ug ikaw pagatawgon, Ang mag-aayo sa nangatumpag, ang mag-uuli sa mga alagianan aron pagapuy-an” (Isaias 58:12). Kining solemne nga tawag naglakip sa edukasyon:

“Si Satanas migamit sa labing maalam nga mga paagi sa paghulma sa iyang mga plano ug mga baruganan ngadto sa mga sistema sa edukasyon, ug sa ingon makaangkon ug lig-on nga pagkupot sa mga hunahuna sa mga bata ug kabatan-onan. Kini mao ang buhat sa tinuod nga magtutudlo sa pagpugong sa iyang mga lalang. Kita anaa ubos sa solemne, sagrado nga pakigsaad ngadto sa Dios sa pagmatuto sa atong mga anak alang Kaniya ug dili alang sa kali-butan; sa pagtudlo kanila sa dili pagbutang sa ilang mga kamot ngadto sa kamot sa kalibutan, apan sa paghigugma ug pagkahadlok sa Dios, ug sa pagtuman sa Iyang mga kabalaoran. Sila kinahanglan nga madani sa hunahuna nga sila giumol sa dagway sa ilang Magbubuhat ug nga si Cristo mao ang sumbanan diin sila pagaumolon. Ang labing maini-ton nga pagtagad kinahanglan ihatag ngadto sa edukasyon nga magahatag ug kahibalo sa kaluwasan, ug magapahiuyon sa kinabuhi ug kinaiya ngadto sa diosnon nga pagkahisama. Kini mao ang gugma sa Dios, ang kaputli sa kalag nga gihabol ngadto sa kinabuhi sama sa mga tanod nga bulawan, nga adunay tinuod nga bili. Ug gitas-on nga mahimong makab-ot sa tawo wala pa hingpit nga naamgohan.

“Alang sa katumanan niini nga buhat ang usa ka halapad nga patukoranan kinahanglan ibutang. Usa ka bag-ong katuyoan kinahanglan nga madala ug makakaplag ug lugar, ug ang mga studyante kinahanglan tabangan sa pagpadapat sa mga prinsipyo sa Biblia sa tanan nilang bulohaton. Bisan unsa nga hiwi, bisan unsa ang natuis gikan sa husto nga linya, kinahanglan nga klaro nga itudlo ug likayan; kay ang pagkadautan dili ipadayon. Importante nga ang matag magtutudlo kinahanglan nga higugmaon ug buhaton ang maayong pamatasan ug buhaton

diha sa agian-an sa tanang studyante.”¹²

“Apan isulti mo ang mga butang nga angay sa maayong doktrina” (Tito 2:1).

Aron mahimo kini nga buluhaton kinahanglan nato nga suportahan ang usag usa ug maghimo mga hiniusang suporta diin mahimo kini nga katuyoan. Karon dinhi sa Colombia, pinaagi sa Oded Educational Foundation, nagpalambo kami ug usa ka pamaagi sa edukasyon nga naglangkob sa tibuok nga pagkatawo. Ang bugtong tumong mao ang pagpahiuli sa dagway sa Dios sa atong mga anak ug kabatan-onan, diin ang orihinal nga plano nga gitukod sa Dios alang sa edukasyon napasig-uli. Mga ginikanan adunay responsibilidad sa paghatag ug importante nga kon-eksyon ngadto sa Dios — paghatag ug mga kasinatian nga nagtugot sa mga bata sa pagdugtong sa ilang nakat-onan ngadto sa tinuod nga kalibutan. Apan, kini dili lamang usa ka katungdanan sa mga ginikanan; ang iglesia nahimo usab nga sukaranan nga suporta sa pagtuman niining dako nga misyon.

Ang Dios nagtawag kanato sa pagkinabuhi pinaagi sa pagtuo, ug kini dili lamang mahitungod sa pagsimba o pagsunod sa pipila ka mga kostumbre, kondili mahitungod sa pagtugot kang Cristo sa paghulma sa atong mga kasingkasing ug mga kinaiya. Kini nga pagbag-o kinahanglan nga makita sa atong paagi sa paghunahuna ug paglihok.

Ang atong misyon nga mahimong kahayag sa kalibutan nagsugod sa edukasyon sa mga bata, kabatan-onan, ug mga hamtong sa pagsangyaw sa ebanghelyo. Hinaot nga ang kaalam sa Ginoo mao ang atong patukoranan, aron kita hatagan niyag panabot ug tudloan kita sa dalan nga angay natong pagalaktan! (Proverbio 1:7; Salmo 32:8) *R*

Mga Reperensya:

- ¹ Education, p. 33.
- ² The Desire of Ages, p. 72.
- ³ The Story of Jesus, p. 30.
- ⁴ Education, p. 13.
- ⁵ Christ's Object Lessons, p. 332.
- ⁶ Testimonies for the Church, vol. 4, p. 199.
- ⁷ Education, pp. 17, 18.
- ⁸ Messages to Young People, p. 148.
- ⁹ Education, p. 29.
- ¹⁰ Ibid., p. 16.
- ¹¹ Christian Education, p. 122.
- ¹² Testimonies for the Church, vol. 6, p. 127.

P.O. Box 7240
Roanoke, VA 24019-0240

NAGALIHOK? Palihug pahibal-i kami.

PADAYON SA PAGLAKAW KARON!

Ni Barbara Montrose

Pagkahuyang sa atong tawhanong kinabuhi!
Atong nakita nga kini nga kalibutan kawang lamang. . .
Sa usa ka paagi, kita makadumala nga ania dinhi—
Adunay paglaum tungod kay ang Cordero gipatay.

Sa tumong sa presente nga kamatuoran:
Gikan sa tanang makabalda—pahilayo!
Ang pagpangita sa Ginoo mao ang atong gikinahanglan;
Sa kaugalingong presensya ni Cristo—magpabilin nga lig-on.

Ang atong tibuok kinabuhi nga panaw dili dulaan,
Pagbiya sa mga gasa nga Iyang gihatag.
Busa, paghimo ug plano sa pagsunod kang Cristo
Ug pilia ang Iyang dalan — maglig-on, magmaisugon!

Mga kalag sa halayo ug sa duol nangita sa kamatuoran;
Tingali adunay usa nga imong nahibal-an nga nangandoy. . .
Ilubong lang nianang nangita nga kasingkasing
Usa ka siga misilaob, hinay nga nagdilaab.

Panahon na aron isulti ang tinuod nga kamatuoran.
Wala nay away ug pagbahinbahin;
Wala nay pagbagulbol ug pasangil.
Ipakita nato ang pagtuo sa tanan natong mga lihok!

Daghan ang nangawala nahisalaag, naglaum;
Dili karon ang panahon alang sa walay pulos nga higayon.
Ang tingog sa Dios milanog sa kusog ug klaro—
Karon na ang higayon sa pag-uswag!

Gisangkapan sa kamatuoran sulod sa atong mga kasingkasing
Ug ang mga ngabil nagdilaab gikan sa бага,
Mahimong kitang moampo karon, “Ginoo, tultoli ang akong mga lakang
Sa usa ka hinigugma nga tawo—nianang mao nga kalag”

Ang adlaw misalop na; mubo na ang panahon.
Ang mando nga nahibal-an natong tanan:
Ang atong nabanhaw nga Cristo nagtawag sa kusog ug tin-aw—
Oo, karon na ang panahon! Panggawas ug lumakaw!